

**SEVENTH LEGISLATIVE ASSEMBLY OF MIZORAM
(EIGHTH SESSION)**

LIST OF BUSINESS

FOR SEVENTH SITTING ON WEDNESDAY, THE 23rd MARCH, 2016
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **Pu LALSAWTA**, Minister to lay on the Table of the House "The Mizoram State Public Sector Enterprises' Early Retirement Rules, (ERR) 2015".
3. **Pu CHALROSANGA RALTE**, to lay on the Table of the House the following :
 - i) Statement of Action Taken on the further recommendations of Subject Committee-I contained in the Third Report relating to Transport Department.
 - ii) Statement of Action Taken on the further recommendations of Subject Committee-I contained in the Fourth Report relating to Disaster Management & Rehabilitation Department.

PRESENTATION OF REPORTS

4. **Pu K. SANGTHUAMA** to present to the House the following Reports of Public Accounts Committee.

- i) Seventeenth Report on Action Taken by the Government on the Recommendations contained in the Third Report of the Public Accounts Committee on the Report of C&AG of India for the year 2009-2010 relating to Industries Department (Geology & Mining Wing).
- ii) Eighteenth Report on Action Taken by the Government on the Recommendations contained in the Fourth Report of the Public Accounts Committee on the Report of C&AG of India for the year 2009-2010 relating to Public Works Department.

FINANCIAL BUSINESS
DISCUSSION AND VOTING ON DEMANDS

5. **Pu JOHN ROTLUANGLIANA**, Minister to submit to the Vote of the House various Demands under his charge.
6. **Pu LALRINMAWIA RALTE**, Minister to submit to the Vote of the House various Demands under his charge.

NGURTHANZUALA
Secretary

.....

S P E A K E R : “Remruat lawk lova thil tih chu a kal sual thin a, Remhria an tam erawh chuan a hlawhtling thin”.

(Thufingte 15:22)

Tunah zawhna zawt turin Er.Lalrinawma i lo sawm ang.

Er.LALRINAWMA : Pu Speaker, ka lawm e. Ka zawhna :

- a) Bairabi – Zamuang Road-a Tlawng lei dawh hi tun dinhmunah physical achievement leh financial achievement engzat percent nge ?
- b) He lei chhuat hi sea level atangin engtia sang nge a nih ?
- c) Bairabi Dam hi khuah ni ta se a chim phak ang em tih a ni e, ka lawm e.

SPEAKER : Awle, Department neitu Leader of the House Pu Lal Thanhawla chhang turin i sawm ang.

Pu LAL THANHAWLA, CHIEF MINISTER : Pu Speaker, ka lawm e. Member zahawm tak Er.Lalrinawma zawhna Starred Question No. 79-na chhanna chu hetiang hi a ni e:-

- a) Bairabi – Zamuang Road-a Tlawng lei dawh hi tun dinhmunah physical achievement chu 88% niin financial achievement chu 828.46 lakhs a ni.
- b) He lai chhuat hi sea level atanga a san zawng dik tak chhinchhiah a lo ni thin lova, Google earth atanga a lan dan chuan feet 150 a ni.
- c) Bairabi Dam hi khuah pawh ni se, lei hi tuiin a chim pha lovang.

SPEAKER : Zawhbelhna a awm em? Awle, a neitu Pu Rinawma i sawm ang.

Er. LALRINAWMA : Pu Speaker, ka lawm e. Physical achievement hi 88% tiin min chhang a, financial achievement hi a pawisa faiin

min chhang leh daih a. Ka hriat duh lai chu physical achievement leh financial achievement a inkhuangrual em tih kha a ni a. Pu Speaker, financial achievement lai hi a percentage-a min chhan theih chuan ka lawm ngawt ang.

SPEAKER : Awle, Chief Minister i lo sawm ang.

Pu LAL THANHAWLA, CHIEF MINISTER : Pu Speaker, ka lawm e. Mathematics thiam loh vanga Matric pawh vawi engemawzat fail ka ni a, khati lampang kha chu ka chawk chhuak thiam dawn miah lova. Member zahawm tak hi engineer a ni a, a lo chawk chhuak ve mai dawn emaw ni ka ti deuh va. 828.46 lakhs hi 68% ang vel a ni, khawngaih takin lo chawk chhuak sela a dik lo min correct sela.

Er. LALRINAWMA : Pu Speaker, ka lawm e. Min rawn chhang bung deuhva ka hriat vang a nia kan zawh deuh kherna chhan. A zawhna hi a rawn pehhel nalh em a tih thu ah.

Tin, ka zawhbelhna, Bairabi Dam hi khuah lo ni ta se, tuna project kal lai a ni emaw PWD enkawlna hnuaiah hian a chim chhiat tur kawng a awm em tih leh eng project kal lai te nge kan neih tih kha ka zawhbelhna a ni e.

Pu LALRUATKIMA : Pu Speaker, ka lawm e. Bairabi - Zamuang road a lei dawh khu khawthlang lam chak lakna ber a ni lo thei lova, Mamit lam kawng a chhiat em avangin khawthlang lam khu an kal vek a, Mar-boat-in an inthiar kai a, kan hotuten an hriat ka ring a. Hei hi engtika zawh tur nge? Tunah hian ruahmanna thar a awm zel ang a, an zawh har em avang khuan, contractor te pawh an nawr theih lawm ni tih kha ka zawt a ni.

*Speech not corrected

Pu LAL THANHAWLA, CHIEF MINISTER : Pu Speaker, a pawimawhna hi sorkarin a hria a, tunah hian sorkarin ngawrh takin a khawih a ni. Khulai khu dawh zawh thuai a nih loh chuan, Palm Oil Mill te pawh hian harsatna an tawh phah a, khuta tang khuan raw-material supply tamna ber tur a ni a. A khawl neitute pawh an lo kal a, an hotu lu ber te nen pawh kan sawiho a, khulam atanga raw-material a lo kal loh avangin, tun ang zela kan kal chuan 65 crores vel ang hi kan lost reng dawn a ni. Chuvangin keimahni sorkar tan tak hian a pawimawh a, chuvangin ngawrh taka thawh mek a ni.

Tin, Bairabi Dam siam tur hi tuna lui hnar lam a nih avangin chim chhe lo tura ngaih a ni a, ama'rawhchu, rel kawng te a kal mek a, chulai erawh chu a chim dawn nge dawn lo hriat a ni chiah lova.

Tin, tuna kan lui neih zawng zawng te pawh tunah hian kan inruahmanna company te hnenah kan pe a. MoU hmangin kan ram leh hnam tana project kha a thalo a nih chuan ennawn leh zel tur a ni a. Tin, environment tan te pawh tha lo a awm thei a, chungte pawh chu ennawn tur a ni a. A tul ang zelin ramin a tawrh lohna tura en tur a ni.

Tin, Bairabi – Zamuang road a Tlawng lei dawh mek hi cheng nuai 612.50 sanction a ni a. Design tihdanglam a nih avangin a man a lo tam ta a, contract agreement cheng nuai 1221.04 mila revised estimate thehluh chu a ni a, a vaia an sanction theih loh avangin. Pawisa sanction sa in a daih ta lova, tunah hian an zawh theihna tur cheng nuai 486.16 state sorkarin ruahman belh in sanction hmuh thuai kan beisei a ni.

Tin, Bairabi lei metre 40 inkar dan zelah ban awmin metre 160-a sei, double lane permanent bridge a ni a. 28th June, 2008-ah contractor ABCI Infrastructure Pvt. Ltd. Silchar nen contract agreement siam a ni a, furin a zui tak

avangin December 2008-ah chauh hna tan theih a ni a, a zawh hun tura ruahman chu Decmeber 28, 2010 daih a ni tawh a ni. Harsatna hrang hrang avangin a nih tur ang a ni thei lova, a tira ruahmanna hautak leh tha zawka tihdanglam leh a nih avangin leh fur chhunga thawh theih a nih thin loh avang leh hrasatna hrang hrang avangin a hun chhung pawhsei a ni a. Tunah hian chhun leh zanah ngawrh taka thawh mek a ni a. Ban kar pali zinga pahnih chu nikum hmasa lama zawh a ni a, ban kar pathumna chhuat chu March thla chhungin zawh a ni ang. Rokhawlhna dangin min tlakbuak loh chuan he lei dawh hna hi May 2016 chhunga zawh ngei beisei a ni. A hmunah te pawh riah chilh a ni a, kan economic live line atan a pawimawh em avangin chumi pawimawhna hria chuan sorkarin, a bik takin Department concern in theihtawp a chhuah mek a ni.

S P E A K E R : Pu R.L.Pianmawia i lo sawm ang.

Pu R.L. PIANMAWIA : Pu Speaker, Starred Question No.80-na, Rural Development Department changtu Minister zahawm tak chhan atan:-

- a) VLA hnathawk te hi engchen atana lak nge?
- b) VLA te hi ban theih dan a awm em?

SPEAKER : Awle, department changtu Minister zahawm tak Pu R.Lalzirliana chhang turin i lo sawm ang.

Pu R. LALZIRLIANA, MINISTER : Pu Speaker, member zahawm tak Pu R.L. Pianmawia zawhna chhanna chu-

- a) VLA te hi contract-in kumkhat atan zel lak an ni a. An thawh that dan azirin rawih chhonzawm zel an ni.
- b) Amaherawchu Mizoram MGNREGA Personal (Recruitment and Condition of Contract) Guidelines, 2014 para 20-in a sawi angin VLA leh he scheme hnuuia

thawktu dang te pawh an hnathawh danah emaw, eirukna leh pawisa hman chungchang a ni emaw, eng ang pawhin a ruaitu sorkar mit a tlunglo a nih chuan engtik hunah pawh ban theih an ni.

SPEAKER : Zawhbelhna a awm em? A awmlo hlauh e, a tihzia e. Zawhna No.81-na neitu MLA zahawm tak Dr. K. Beichhua zawt turin ilo sawm ang.

Dr. K. BEICHHUA : Pu Speaker, ka lawm e. Disaster Management & Rehabilitation Department changtu Minister zahawm tak hnena ka zawhna chu:-

Aizawl khawchhungah hian lirnghing leh ruahsur nasa a building hlui, hlauhawm zual siamthat ngai zual zirchianna a awm em tih hi a ni e.

SPEAKER : Minister zahawm tak hi a awm lova, Pu B.D. Chakma Minister a authorized a, tunah chhang turin i lo sawm ang.

Dr. B.D. CHAKMA, MINISTER : Pu Speaker, MLA zahawm tak Dr. K. Beichhua zawhna chhanna chu:-

Hazard Safety Cell, PWD ten public life line building 173 chu a him leh him loh an zir chiang tawh.

Tin, Disaster Management & Rehabilitation kaltlangin National School of Safety Programme hnuaiyah Aizawl khawchhung bika school building 172 te chu zirchian a ni tawh bawk.

SPEAKER : A neitu Minister kha a awmloh avangin zawhbelhna kha a awm theilo a ni tih kan hria a.

Zawhna No.82-na kan la ang a, a neitu MLA zahawm tak Dr. K. Beichhua zawt turin ilo sawm ang.

Dr. K. BEICHHUA : Pu Speaker, ka lawm e. PWD changtu Minister zahawm tak hmena ka zawhna chu :-

- a) Mizoram hmun hrang hranga leilawn te tun dinhmunah hian a him tawk em?
- b) Department atangin a him leh him loh enfiah a ni hlawm em?

SPEAKER : Awle, a changtu kan leader zahawm tak Pu Lal Thanhawla chhang turin i lo sawm ang.

Pu LAL THANHAWLA, CHIEF MINISTER : Pu Speaker, member zahawm tak Dr. K. Beichhua Starred Question No. 82-na chhanna chu:-

- a) Mizoram hmun hrang hranga lei te hi dawh hun azirin a then an him tawk laiin lei hlui deuh te chu a tira ruahman ang (design load) dawl tawh lo an awm nual.
- b) Department atangin a him leh him loh hi kartin ngun taka enfiah reng a ni.

SPEAKER : Zawhbelhna a awm em? Aw zawhna neitu ilo sawm ang.

Dr. K. BEICHHUA : Pu Speaker, ka lawm e. Khatia kartin enfiah a lo nih chuan a tha leh tha lo pawh a hriat theih ang a, leilawn himlo hi tun dinhmunah hian engzatnge awm tih kha pakhatna ni ta se. Pahnihna chu dawhthat ngai engzatnge awm? Pathumnaah chuan thawm that emaw han khawih hleka hman leh mai theih tur kan hluihlawn te kha a awm em tih zawhna ka siam belh e.

SPEAKER : Awle, department changtu Chief Minister zahawm tak chhang turin i lo sawm ang.

Pu LAL THANHAWLA, CHIEF MINISTER : Pu Speaker, a hmasain heng vel endikna hi a khawl emaw khatianga tul apparatus kha kan nei tha lem lova, a endan hi a theorian viau ang em tih kha hriat a harsa a. Tin, bridge lampang expert kha kan nei rih bawk lova, chutiang chu ni mahse chuti chungin member zahawm takte hriat atan, PWD enkawlte hi a bialtu ten kartin an endik ziah a. Mahse sawi ang khan bridge expert kan neih loh avang leh load test tihna hmanrua kan neih loh avangin ena a landan (visual observation) atang chauhin kan lei dinhmun hi a hriat theih a ni a.

PWD hnuaia lei te hi enfiah veka load a lak theih chin bituka lei tawntirh ve ve ah signboard tar vek tur leh District Magistrate notification chhuah tura hma la theuh turin inhriattir a ni a, ni 10.12.2015 leh ni 8.03.2016 ah. Tin, heng bakah hian lei vengtu a tulna hmun apianga dah vek turin Division tin te hriattir an ni bawk, hei hi kumin 16.02.2016 ami kha a ni a. Tin, lei endik lam mithiam bik, hmanrua nena endika lei ten rit an laktheih chin load capacity siamfela a tul anga tihngheh dan rawttu tur ruai turin hmalak mek a ni.

Tin, PWD Division hrang hrang atanga report dawn danin hengte hi lei hlui, a tira ruahman ang design load pha lova phurh theih chin (restricted load) bituk mek te an ni. Mamit Division-ah bailey bridge over river Sazep on Tuipuibari, West-Kawnpui road-ah, tin Kawrthah Division-ah bailey bridge over Putara Lui, bailey bridge over Luite Thiang, bailey bridge over Borai Lui, bailey bridge over Chengkawl Lui, bailey bridge over Peka Lui, bailey bridge over Teirei Lui on Bairabi – Zamuang road a ni a. Serchhip Division-ah Pu Speaker, bailey bridge over river Mat on Serchhip-Thenzawl road, khi pheih khi chu an venna a rei tawh a, a part khi an ruk thin avangin. Bailey bridge over river Tlawng on Serchhip-Buarpui road, bailey bridge over river Tuichang on Keitum-Artahkawn road. Tlabung Division-ah bailey bridge over river De on Phairuang-Bunghmun road, bailey bridge over river Tuisen on Phairuang-Bunghmun road, bailey bridge over river Zawlpui on Phairuang-Bunghmun road, bailey bridge over river Sailungret on Phairuang-Bunghmun road, bailey bridge over river Kau on Phairuang-

Bunghmun road. Tin, Saitual Division-ah bailey bridge over river Tuivawl on Saitual-Phullen road; Champhai Division-ah bailey bridge over river Tiau on Indo-Myanmar border. Khawzawl Division-ah bailey bridge over river Tuichang on Khawzawl- Sihzawl road, bailey bridge over river Phalte on Khawzawl-Sihzawl road.

National Highway Division-I ah bailey bridge over river Dialdawk on National Highway 44(A), bailey bridge over river Tut on National Highway 44(A). Bailey bridge over Tut river on National Highway 44 A, bailey bridge over river Dap Lui on National Highway 44 A, bailey bridge over River Teirei on national Highway 44 A Kolasib Division-ah bailey bridge over river Kawnpui West at National Highway 154, bailey bridge over river Tuichhuahen at National Highway 154, bailey bridge over river Serlui at Bilkhawthlir-Saiphai, Matasura road, bailey bridge over river Chhimluang at Buhchangphaisen road, bailey bridge over river Chite at Vairengte, Phainuam-Saiphai road.

National Highway Division-II hnuai ah bailey bridge pahnih (2) Luak lui leh Luak zan lui, National Highway 150 ami te chu eng lirthei mah tlan lo turin SDO (Civil) Sakawrdai chuan ni 14.07.2015 khan thupek a tichhuak a. Tin, heng lei pahnih (2) te hi siamthat turin Ministry of Road & Highway atangin sanction hmuh tawh a ni. Heng lei hlui deuh tarlanah te hian rit phurh theih chin hriattirna tar a ni a, a thenah chuan Magistrate atanga hriattirna pawh chhuah a ni.

Tin, heng a hnuai ami te hi PWD kawng te an ni a, design load anga hman theih an la ni. Tuikual bridge on Chhingchhip-Hmuntha road; Tuikum bridge on Chhingchhip-Thentlang road; Tuivawl bridge on Saitual-Saichal-N.E.Bualpui road; Tuivai bridge on Phullen-Phuaibuang road, Chite bridge on Aizawl by-pass road; Tlawng bridge on Aizawl-Thenzawl-Lunglei road; Tuivai bridge on Khawzawl-Sinzawl-Thanlung road; Vanva bridge on Haulawng-Bualpui, five road; Ngengpui bridge on Naukawn-Chamdul Valley road; Tuichang bridge on Hnahthial-Tumtu kawng road;

Chawngte bridge between Chawngte Lui-Chawngte Ng and Chawngte P; Chawngte bridge between Chawngte P and Chawngte C; Chawngte Lui on Diltlang, Chawngte road. Suspension bridge on Aizawl - Reiek road; R.C.C bridge over river Chite on Armed Veng – Zemabawk; R.C.C Bridge over river Chite on Bethlehem – Zemabawk; Hengte hi Pu Speaker, kan lei neih chin te leh tuna department-in a enkawl dan leh a him thei ang tur zawnga a kalpui dan tlangpui a ni, Pu Speaker.

SPEAKER : Zawhna Starred Question No. 83-naah kan kal thei e. A neitu MLA zahawm tak Pu Lalruatkima i lo sawm ang.

Pu LALRUATKIMA : Pu Speaker, ka lawm e. Ka Starred Question No. 83-na PWD changtu Minister zahawmtak chhan atan :-

- a) NLCPR sum hmanga Tuipui 'D' lei dawh chim ta kha dawhthat leh a ni tawh em? Ni se khawi sum atanga thawh nge? Lei dawh that leh nan hian sum engzatnge ruahman leh a nih ?
- b) Lei dawh mek kha engvanga chim nge a nih a, lei design-tu kha tute nge? Original estimate engzatnge, contractor hnenah khan engzatnge sum pek a nih tawh ?
- c) Lei dawh that lehah hian design thlak a ni em? A nih chuan tute design nge ?
- d) Lei dawh chim avang khan Enquiry Commission din a ni em? A nih chuan a mawhphurtute chungah action lak a ni em tih ka zawt e.

*Speech not corrected

SPEAKER : Awle, department neitu kan House Leader zahawm tak Pu Lal Thanhawla i lo sawm ang.

Pu LAL THANHAWLA, CHIEF MINISTER : Pu Speaker, member zahawm tak Pu Lalruatkima zawhna Starred Question No. 83-na channa chu –

- a) Tuipei 'D' lei dawh chim ta kha dawhthat leh mek a ni. NLCPR atang leh a tir lama state atanga sanction belh pawisa atang thovin thawh a ni. A bakah ₹ 34.02 lakhs ruahman belh a ni.
- b) Lei dawh mek kha a chim chhan chiah finfiah a ni lo na in, a khaina thir tlangpui (main surrender cable) anchor block-a thlunna hmawr a put vang ni a ngaih a ni a. A chim hlimah contractor-in Hnahthial Police Station – ah FIR a thehlut a. Vawiin thlengin result PWD lam chuan hriatna a nei lo. He lei design-tu hi M/S Guha Niyogi & Associates, Kolkata a ni. He lei atana a tira estimate sanction zat chu ₹266.21 lakhs a ni a. Lei a chim thleng khan contractor hnena pawisa pek chu ₹243.59 lakh a ni.
- c) Lei dawh that leh a nih hian design thlak hret a ni a, a design tu chu a tira design-tu tho M/S Guha Niyogi & Associates, Kolkata a ni.
- d) Lei chim hlimah khan contractor-in FIR a thehlut a, a hranpain Enquiry Commission din a ni lova, tu chungah mah action lak a ni lo.

Pu LALRUATKIMA : Pu Speaker, wawiin chu he House zahawm takah hian lei a lar khawp mai a. Sub – standard works niin kan ngai em tih kha ka zawhna ni sela. Tin, Contractor hian ama hnathawh tur engvanga design nge a nih? Engati nge PWD in a design mai loh tih kha ka'n zawt a ni.

*Speech not corrected

Pu LAL THANHAWLA, CHIEF MINISTER : Pu Speaker, a chim chhan hi inthladah vang a ni nge kha chu ka hre lo a, a hmang duhtu tur te hian an hmang chak tawh khawp a, an nawr nasa tawh bawk a, chung karah chuan an hna te pawh an uluk tawh thei lo te pawh a ni ang a. Tin, mipui nawrna zah leh hlahv vang te pawhin an

thawk uluk thei lo te pawh a ni ang a. A chhan leh vang chu puhmawh tur kan zawn dawn chuan a tamin ka ring a.

Tin, a thawktu ten engatinge an design tih hi, a thawktute hi designer an ni tho a, register rintlak an ni a. Chuvangin department-in a rintawk avangin anmahni vek a design tir a ni. Tin, hetiang bridge lam design-tu hi hmun tinah an awm hranpa lova, a remchang kha hman mai a ni. Tin, chhonzawm leh thuai kan duh a, chumi avanga thawh chu a ni. Tin, Hnahthial – Darzo kawng hi Border Roads Organisation enkawl a ni a, PWD in mawhphurhna a nei lo chungin Darzo kaia lei awm lo mipui tana harsatna sutkian chu sorkarin a ngaih pawimawh em avangin he lei hi state PWD mawhphurhna ni lo mahse mipuite mamawhna avangin state sorkarin a thawk a ni.

Tin, thawh tan a nihna bul tak phe chu kan hotuten sawlai min va dintir ve khan tuna kan President Pranab Mukherji hian min rawn campaign pui a. Hnahthial-ah vantlangah thu a sawi laiin hmun danga ka kal a ngaih avangin ka awmpui tluan chhuak lo a, chutih laiin Kawlchaw-a kan hotute thahnemngaih nain ka nupuiin, ‘ani in lo thlantlin chuan khulaiah khuan lei kan dawh ang,’ tih note a zuk pek hi a zia ang ang khan a chhiar chhuak a, chuta tanga lokal chho zel chu a ni.

Tin, Border Roads ho pawh hi a tirah chuan an tlawmngai viau a, a chhan chu design tha tak sawta Kawlchaw-a Pu Rajiv Gandhi-a nen kan tih tir ang saw an lo tum ve mek a. Chuvangin, ka hnenah pawh vawi engemaw zat an lo kal nghe nghe a, mahse an tih tur hi a rei dawn avangin tunah hman kan duh tawh si a. Chuvangin, tuna tul tawh, duh tawh thlam bang pin hunah tih ang deuh a nih avangin kan kal tlang ta a ni. Chutiang chu a ni a, chuvangin Border Roads ho kawngah a tulna avangin state PWD a inrawlh ve mai a ni.

Tin, March 2012 khan NLCPR atangin ₹ 216.21 lakh hmuh a ni a. July ni 27, 2007 ah tender chhuahin November ni 19, 2012-ah work order pek a ni. A tira zawh

hun tura ruahman chu 18.11.2013 a ni. A tir atanga sanction kha rate hlui a nih avang leh suspension bridge siam that a nih avangin sanction-in a daih ta lova. State sorkarin nuai 50 a sanction belh nen nuai 2,66,21,000 ruahman a ni. A chim hnua do belh nan ban pahnih atana ruahman belh nuai 34 sang hnih nen a vaiin sum ruahman chu nuai 30,02,300 a ni. A chim hnua dawh nawn leh a nih hian a sir tawna tower atanga metre 20 a hlaah a dona, additional tier lak ve ve a ni a. A khaitu thir hrui hi a hmaa ft 8-a in vuak thuah leh hmun lia cheh beha ft 12 a sei vuak thuahin hmun sarih ah uluk taka cheh/clip vek a ni bawk. Tunah chuan DoNER ministry leh state sorkar atanga pawisa hmuh tur hmuh kim a ni tawh a. Tun thlenga contractor hnena pawisa pek tawh chu nuai 27,09,500 a ni a. Motor tlanna tur thing phel phah leh rawng hnawih hna thawh mek niin March, 2016 chhung ngeia zawh tumin ngawrh takin an thawk zel a ni.

Tin, Pu Speaker, kan hmanhmawh angin a hna hi tan theih a ni lova, sum kan neih hnu ah pawh khan. A chhan chu Kawlchaw-ah mega watt 460 tui khuah tum a nih avangin khami khan khawilai chin nge a rawn chim ang tih te kha ngaihtuah a ngai a, anni ho nen khan vawi tam tak thut ho ngaiin kei pawh a hmunah vawi hnih vawi thum ka kal phah nghe nghe a. Chutichuan a chim chin tur awm ang an ruahman hnu ah khan tun ami hi ruahman a ni a. A chhan chu anni ho hian chinese expansionism avangin Mizoram hi tlemin min tin san deuh a. Chuvangin sawlai saw priority an pek zingah a tel lo niin kan hria a. Chuvangin keimahnin kan kawng ni lo mahse a tulna avangin kan lo bia kha a ni a. Chu chu sum tam tak senga kan ti hi khu lam pang lui kawr khatiang vel avang khan harsatna an tawh ang tih hlauhna avangte pawhin a hna hi duh angin tan theih a ni lova, mahse, mamawhna avangin tan a ni a, khatiang khan zawh hmain a lehlamah chuan vanneihthlak tak zawkin hliam nasa public lam atanga awm lovin anmahni a contractor te khan engngemaw chenah an tuar ta a, a pawh hle a. Amaherawhchu, mipui erawh chu kan him thung a ni.

Pu LALRUATKIMA : Pu Speaker, khawngaihin a zawhna neitu nih manah. Contractor te khan hremna pawh an tuar lova, hrem ahnekin hna pek belh leh an ni ta

zawk a. Hei hi khawiah mah thil thleng ngai ni pawh hian a lang lova. Chuvangin hei hi kan sorkar kalphung tur a nih dawn chuan contractor te an inthlahdah zel dawn tihna a ni a, a fel lo khawp mai a. December ni 12, 2014 daih tawha chim a ni a, kan hriat angin. A chhak lam S.Vanlaiphai te, sawlam Thingsai tan te chuan fur a lo ni ang a, inkalpawhna harsa fur khat an tuar leh tawh a ni a. Chuvang chuan engatinge anmahni design vek a chim a, a chim tawh a, anmahni vek kha engatinge an pek leh kher kher kha, engatinge helaiah hian thil dik lo tak a awm a nih loh chuan Pu Speaker.

*Speech not corrected

Pu LAL THANHAWLA, CHIEF MINISTER : Pu Speaker, Sangau tlangdung leh Vanlaiphai lam ten an mamawh tih kan hriat em em lutuk avanga saw saw Border Road chan a ni chungin meisa tlawh chung a hma la kan ni.

Tin, vanduaina lo thleng tur hi hre lawk ila chuan thlen tir loh dan tur kan lo ngaihtuah daih tur a ni.

Pu LALRUATKIMA : Pu Speaker, thawktute, mipuiten an tuar a. Kan Police pakhat pheih chuan hliam a tuar a, tun thleng sawn a taksain a tawrh phah a ni, tiang chu a ni a. Mipuiten tuar lo anga he House zahawm taka han sawi kha chu a dik chiah dawn em ni ka'n ti a ni.

*Speech not corrected

SPEAKER : I thianpa kian ve rawh le, in leader khan zawhna a zawt duh alawm. Pu Zawma.

Pu VANLALZAWMA : Pu Speaker, ka zawh belh duh chu, tun ami kha chu temporary atana tih a ni a. BRTF ho khan tha ve tak tak kha dawh kha an la tum zel nge ni an chhuahsan ta deuh? Tum zel ni ta se enge tuna a dinhmun tih kan House Leader kha ka'n zawh belh duh a ni.

Pu LAL THANHAWLA, CHIEF MINISTER : Pu Speaker, an design siam tirh chuan minrawn hmu a, an design siamte pawh an headquarter lamah an thehlut tih te pawh ka hria a. Amaherawhchu, tun hnu zelah hian chumi chu kan buaipui tak avangin kan la inbe leh ta lova. Thil pawimawh tak a ni a, ka lo ko ang a, an Chief Engineer te ka lo bia ang.

Tin, lei chim te, mi vanduinaw tawh te hi hre lawk ila chuan sorkar hian tumah vanduinaw tawh tir hi kan duh lova. Khawi lei mah chim tir pawh kan duh lova. Vanduinaw an tawh lohna tur atan leh a chim lohna tur atan hma kan la tur a ni a. Amaherawhchu, hriat lawk loh a ni a. Tin, tuna chim pheih chu under construction a ni a. Chuvangin a ngaihna tehchiam a awm lova. Anmahni a thawktute pawh an inhliam a. Khami under construction-a thil chhia ah khan puhmawh tur an awm tehchiamin ka ring lova. Puhmawh tur duh talh kan awm a nih chuan, Pu Speaker, a contractor te leh a design tute kha an ni a. Amaherawhchu, sawlai saw a hmanhmawhthlak zia kan hria a. Chuvangin a hmanhmawhthlak zia ang zelin a rang thei ang ber tur sorkarin a duh a. Chuvangin a ngaiate kha design tirin thawh tir leh an ni a. Experience te pawh an lo nei tawh a. Tin, chu chu a ral leh lam mipuite tana hamthatna tur a ni tih kan hrechiang a. Chuvangin a rang thei ang ber tur chi khan kan kal a ni mai.

Dr. K. BEICHHUA : Pu Speaker, zawhbelhna. Kan hriat angin a neitu ni lo contractor kan pe a, kan thawh tir a, kan design tir bawka, kan pe nawn leh a. Mizoram PWD hian hetiang design hi a design ve thiam em tih hi ka zawh belhna a ni e.

Pu LAL THANHAWLA, CHIEF MINISTER : Kan dawh teuh tawh a, thiam an awm a. Amaherawhchu, a pawimawh zualah hian thiam leh zual rawih te a that takin nakinah sawisel duh talh te pawhin sawisel tur an hriat loh nan tiin kan hotuten an ngaihtuah a ni.

SPEAKER : Zawhna No. 84-na, a zawhna neitu Pu R. Vanlalvena zawt turin i sawm ang.

Pu R. VANLALVENA : Pu Speaker, ka lawm e. Ka zawhna Starred Question No. 84-na, Vigilance Department changtu Minister zahawm tak hnena ka zawhna chu hei hi a ni:-

Mizoram sorkar hnathawk zingah kumtin property return theh lut lo an awm em? Awm ta se action lak theih a ni em? Ka lawm e.

Pu LAL THANHAWLA, CHIEF MINISTER : Pu Speaker, member zahawm tak Pu R. Vanlalvena Starred Question No. 84-na chhanna chu:- Sorkar hnathawk zingah kumtin annual property return thehlut lo an awm thin. Gazetted Officer tan phei chuan property return theh luh loh hi CCS (Conduct) Rules kalh a nih avangin an chungah disciplinary proceedings draw theih a ni a, Mizoram State Government Employees (Performance Appraisal Report) Rules, 2010 ang phei chuan an PAR-ah pawh ziah sak loh tur a ni. APR thehlut lo tan vigilance clearance pek theih a ni bawk hek lo.

S P E A K E R : Zawhbelhna a awm em ? Zawhbelhna a awm lo maw? A lawmawm e. Zawhna No.85-na MLA zahawm tak Dr.Ngurdingliana zawt turin i lo sawm ang.

Dr. NGURDINGLIANA : Pu Speaker, ka lawm e. Zawhna ka rawn siamah hian a tlar hnuhnung ber 2 an rawn dah a. Tlar 8 vel thlawh khumin tihian an rawn chhawp chhuak a. Mahse, ka'n zawt tho ang e, a chhan chu niminpiah lama thil thlengte a nih avangin.

Ka Starred Question No. 85-na Transport Department changtu Minister zahawm tak chhan atan Bairabi to Sairang (51 km) broad gauge line hi engtikah nge zawh a nih theih ang ?

S P E A K E R : Chhang turin a changtu Minister zahawm tak Pu John Rotluangliana i lo sawm ang.

Pu JOHN ROTLUANGLIANA, MINISTER : Pu Speaker, member zahawm tak Dr. Ngurdingliana zawhna chhanna chu – Railway-in an sawi dan chuan kum 2019 velah rel hi Sairang luh thlen tir theih beisei a ni a. Amaherawhchu, Ministry of Railways hi Mizoram state sorkar hnuai a nih loh avangin chiang takin a sawi theih loh.

S P E A K E R : Zawhbelhna, zawhna neitu Dr. Ngurdingliana.

Dr. NGURDINGLIANA : Pu Speaker, ka zawhbelhna chu Rail kawngin a paltlang tur ram chungchangah harsatna awm thei a awm em ?

S P E A K E R : Transport Minister chhang turin i lo sawm ang.

Pu JOHN ROTLUANGLIANA, MINISTER : Pu Speaker, hemi chungchangah hian compensation rawn claim leh court lama kalte an awm a. Court lam khan compensation an claim ang kha pek tur a ti a ni. Ama'rawhchu, sq ft ah ₹ 200/- te a nih tak avang khan a sang lutuk a. Chu chu Railway-in Supreme Court-ah an khing mek a, chu chu nghah a ni a. Ama'rawhchu, nimirpiaha an hotupa lo kal sawi hmang chuan hemi hi a nih pawhin kan hnathawh tibuaילו chuan, pek tur an tih chuan kan pe thei tho a. Amaherawhchu, hei hi kan pek chuan nakin zelah sorkar tan precedence tha lo tak a siam thei ang a, in en ve phe chu a tha khawp mai a ti a. Chu chu tuna an dinhmun chu a ni e.

S P E A K E R : House Leader.

Pu LAL THANHAWLA, CHIEF MINISTER : Sum thianghlimlo pawisak lohna hian kan ram hi nasa takin a tihnuhumin, a tihnuhumin zel ang tih hi a hlauhawm hle a ni. Khulai khu tender te an peih fel a, an han tih vel tantirh-ah kha chuan Sairang hi kum 2015-ah lo thlen theih hram kan tum ang an ti a. Mahse, rin aiin compensation chungchangah khan an buai rei ta a. Tin, vawiinah hian a la buai chho mek zel a, Court-ah te an kal a. Tin, awm lo lai tam takah te khan LSC te a lo awm zel a, chu chu nakin zelah pawh kan ram thanmawh bawh a ni ang tih a hlauhawm hle a ni.

Tichuan, Sairang atangin Lawngtlai thlenga la kal turin tih fel tawh a ni a. Mahse, chungte pawh chu helaia member zahawm takte hian hre vek ilangin, tute emaw Land Revenue & Settlement Department atangin mi lawilo deuhthe nen inkawpin khawi khawiah emaw LSC te an lo inpe zel a, chu chu kan ven tlan a ngai a. Development hi kan duh a nih chuan a kalkawngah harsatna hling awm lo hi a tha a. Awm miah lo chu a awm thei lo mai thei, mahse, hetiang kawngah hian Tuirial Hydel Project kha hre reng rawh tih hi Mizoram mipuite kan in warning na ni sela. Chuti a nih loh chuan Rail kawngte pawh hi 2015-ah chuan kan lo thleng thei ang an tih kha, chumi hnu-ah chuan 2018 min tiam leh a, tunah chuan 2019 an sawi ngam tawh tawh chauh a ni. Hei hi kan zavaia kan hriat a, kan hnam kan ram thanmawh bawh a nih phah ang tih a hlauhawm khawp mai.

Pu K. SANGTHUAMA : Pu Speaker, kan Minister zahawm tak khan per sq ft ah ₹ 200/- vel niin a sawi a. Compensation lak hrim hrim hi thil sual phei chu a ni hauh lova. Dan ang an ti a nih chuan lak tur pawh a ni mai a. Amaherawhchu, per sq. ft-a ₹ 200/- hi chu han ngaihtuah vang vang hian a tam khawp mai a. Entirnan, sq. ft-a ₹ 200/- a nih chuan bigha 1-ah 28 lakh vel a ni a. A hrim hrimin hengah hian kan sorkar hian hetiang em em lo deuh hian tih dan a awm lawm ni? Duh duha kan san a, duh duha kan tih mai chuan kan ramah hian compensation hi kan inpe seng lo ang tih hi a

hlahawm hlein ka hria a. Chhim tawp thlengin Rail kan la kal tir dawn a ni a. Khawia pawisain nge maw daih seng reng reng ang le? Chuvangin Court-ah te an duh ang thal thala an rem mai a nih chuan sq. ft-ah nakinah phei chuan ₹ 400/500 a lo ni chho zel ang a, hei hi kan sorkar pawhin ngaihtuahna a sen viau ngaiin ka hria a. Tunge compensation-ah hian a rate hi siam thin tih kha ka'n zawt teh ang.

S P E A K E R : Minister zahawm takin a chhang thei em?

Pu JOHN ROTLUANGLIANA, MINISTER : Pu Speaker, a rate siamtu kha kan ni lova, ka hre lo tawp mai a, ka chhang lo mai ang e.

S P E A K E R : Zawhna dang a awm tawh lo niin a lang a. Starred Question 86-naah kan kal ang a, a neitu Er. Lalrinawma, MLA zahawm takin zawt sela, tunah i lo sawm ang.

Er. LALRINAWMA : Pu Speaker, ka lawm e. Public Works Department changtu Chief Minister zahawm tak hnena ka Starred Question No. 86-na - Tun dinhmunah 'The Public Premises (Eviction of Unauthorised Occupants) Act, 1971' hman a nih theih nan Department-in eng chen nge hma a lak tawh?

S P E A K E R : Department changtu kan Chief Minister zahawm tak Pu Lal Thanhawla chhang turin i lo sawm ang.

Pu LAL THANHAWLA, CHIEF MINISTER : Pu Speaker, member zahawm tak Er. Lalrinawma zawhna Starred Question No. 86-na chhanna chu- The Public Premises (Eviction of Unauthorised Occupants) Act, 1971 hi Department-in ngun takin a zir Chiang Mek a, thla khat chhungin sorkar-ah suggestion leh comment nen a theh lut thei tawh ang tih a ni a. Mahse, chutih mek laiin member ten kan hriat atan The Public Premises (Eviction of Unauthorised Occupants) Act, 1971 hi central Act a ni a.

India ram pumpui Jammu & Kashmir pawh a huam a ni. 1971-a siam a ni a, 1980-ah te, 1984-ah te leh 1993-ah te amend (siamthat) a ni a. He Act-in a tum ber ni a lang chu Central sorkar hian a hnathawkte tan Members of Parliament te leh mi pawimawh, nihna sangte tan chenna in leh lo, residential accommodation a siam sak thin a. Tin, chubakah temporary accommodation, Rest House leh Tourist Lodge-ah te pawh a siam sak lailawh thin a. Chutianga chenna a pek te chuan an term tawpin emaw, an service a lo zawhin emaw, pension retirement etc. hnu ah chung accommodation te chu an chhuahsan tur a ni a.

Hetiang accommodation sorkarin a pek chhuahsan duh lo te hi an awm thin a, chutiang hnawhchhuah nana duan chu ni berin a lang. Hei kan MP zahawm tak takte zingah pawh, Minister-te hial pawh an bungalow luah te chhuahsan duh lo evict ngai te an awm a. Hmanni lawkah pawh khan UP-a Minister pahnih chu Eviction Order an pek hnu ah khan an chhuak ta hram niawm tak a ni a. Chutiang mi luhlulte chung a hman atan chuan a ni deuh berin a lang a. Central sorkar ram te, University leh Institute, central hnuai a awm, ram hmun te; tin, New Delhi angah chuan state sorkar hmun Mizoram House ang te pawh a huam thei ang a.

Tin, Mizoram angah chuan sipaiin an ram hmun neih e.g. BSF ram angah te hian hman tur niawm takin a lang a. He Dan hi Mizoram-ah pawh Assam hnuai a District kan nih lai 1971-a an lo extend tawh a nih hmel a, chuvangin apply tur chu niawm tak a ni. Hei hi kan Dan thiam ten an la bihchian a tulin ka ring a, kan adopt ngai turte a ni em, engtingge ni ang ?

Amaherawhchu, U.T. kan nih khan adoption of Law & Order ah khan kan telh awm hi hriat a ni lova. Chumi hnu ah 1987-a state kan lo nih khan adopt hran leh tur a ni a, mahse, kan adopt na awm hi kan la hmu lova, chuvangin kan enchiang mek a ni. Law Department lamah chiang zawkin kan lo hriattir ang a, tichuan thil pawimawh a nih avangin hmanhmawh tur niin a lang a. Central lamin an

duan angin Mizoram sorkar hnuaiah pawh kan Dan hrang hrangte an la relevant em tih zir chian mek an ni hlawm a, commission pawimawh tak kan nei a. Heta pawimawh deuh mai chu 'The Road Side Land Control Act, 1975' hi niin a lang a. Hei pawh hi PWD lamin an enchiang mek a, Revenue Department leh Law Department te nen NR hman tangkai dan tur an duan vat loh chuan kan District headquarter te pawh hi a chep lutuk dawn a, kan kalkawng te pawh hi nekchep a ni zel dawn a. Chuvangin hengte pawh hi thil pawimawh ber a nih avangin sorkarin a rang lama en tura ngaihtuah mek a ni.

S P E A K E R : Zawhbelhna, Pu Rinawma.

Er. LALRINAWMA : Pu Speaker, ka lawm e. A nih leh lo ni ta sela, Estate Officer, PWD in a neih hi engti tura lak nge a nih tih ka zawt e.

S P E A K E R : Chief Minister zahawm tak chhang turin ilo sawm ang.

Pu LAL THANHAWLA, CHIEF MINISTER : Pu Speaker, tuna Dan zawhnaa kan sawi mek hi hman a la nih loh chuan Estate Officer hranpa neih a la ngai lova. Mahse, PWD-in an neih chu anmahni ram ang chi te leh encroachment atangte leh sorkar department hrang hrangte pawh hmun dil hi an awm reng a ni, khawi laiah emaw te leh District headquarter ah te leh khawiah pawh hian. Mahse, sorkar ramte hi nekchep a ni zel bawk a. Chumi a nih avang chuan Estate Officer an nei a ni mai thei a. Tin, chumi piah lamah chuan Dan ka han sawi kha, chungte avang chuan a hmanhmawh thlak viau a ni.

Sorkar ram hi kan neihna apiangah nimin lamah pawh member zahawm tak Pu Sangthuama bialah te pawh awm tlat an awm a, khatiang chi hote lakah pawh ven an ngai a. Tin, road side reserve te pawh hi kan hman loh chuan ornamental trees

kum tina kan phun te hi a kang chhe zel a. Tin, kan ram khawpuite pawh kan chepna chhan pawh hi mi duham, sorkar pawisa lo, Dan pawisa lo te vang a ni.

S P E A K E R : Awle, zawhna No.87-naah kan kal leh ang a, a zawhna neitu MLA zahawm tak Pu Lalruatkima zawt turin ilo sawm ang.

Pu LALRUATKIMA : Pu Speaker, ka zawhna Starred Question No. 87-na Rural Development Department changtu Minister chhan atan- MGNREGA atan kum 2011-2016 chhungin sum engzatnge hmuh a nih? Matching share engzatge pek a nih ?

*Speech not corrected

S P E A K E R : Awle, tunah department changtu Minister chhang turin ilo sawm ang.

Pu R. LALZIRLIANA, MINISTER : Pu Speaker, member zahawm tak Pu Lalruatkima zawhna kha, MGNREGA atan kum 2011-2016 chhungin sum engzatnge hmuh a nih? Matching share engzatnge pek a nih tih chhanna chu -

MGNREGA atan kum 2011-2016 chhunga sum hmuh zawng zawng zat chu ₹ 116177.2024 lakhs a ni e. MGNREGA hnuai kum 2011-2016 chhunga matching share pek dan chu a hnuai ami ang hi a ni e:-

1) Kum 2011-2012	-	₹ 299.999 lakhs
2) Kum 2012-2013	-	₹ 2821.919 lakhs
3) Kum 2013-2014	-	₹ 1194.694 lakhs
4) Kum 2014 – 2015	-	₹ 225.483 lakhs
5) Kum 2015-2016	-	₹ 1373.853 lakhs
Total	-	₹ 8610.948 lakhs.

S P E A K E R : Zawhbelhna Pu Lalruatkima.

Pu LALRUATKIMA : Pu Speaker, ka lawm e. Job card a pung zel a, NLUP a hlawhtling kan ti thung bawk si a, kan ram chu buh thar lah dawhkan atangin kan ziaak pung kan ti bawk si nen, a buaithlak khawp mai a. Ka zawhbelhna chu, kum 2015-16 chhungin District hrang hrangah ni engzatnge inhlawhna siam a nih tawh? Tin, mipuite inhlawhna tura siam hi minimum wages angin hlawh hi pek a ni em? A nih loh chuan enge a chhan tih hi ka'n zawhbelh a ni.

*Speech not corrected

S P E A K E R : District-wise kha hun a duh rei viau nain Minister-in a chhang thei tho ang em? Chhang turin ilo sawm ang.

Pu R. LALZIRLIANA, MINISTER : Pu Speaker, tawitein a chhan theih tho ang chu.

2015 leh 2016-ah hian a tlangpui chuan a average-in ni 35 inhlawhna hi hmuh a ni a. Tahchuan District wise- chuan Aizawl-ah ni 35, Lunglei-ah ni 34, Saiha-ah ni 36, Champhai-ah ni 35, Kolasib-ah ni 37, Serchhip-ah ni 37, Lawngtlai-ah ni 34 leh Mamit-ah ni 34 a ni a. Tin, helaiah hian an hlawh ang tur hi chu minimum wages Mizoram in kan neih ang ni lovin, central hian NREGA-ah hi chuan an hlawh tur zat hi anrawn tuk a, chutiang zat chu pek an ni thin a.

Tin, thil lawmawm deuh chu helaiah kan financial year tawp dawnah Finance Department-ah kan innawr tawn a, tiang hian sanction kan hmuh ang ang kan inpe vak vak a. Heng hi kan officer ten thil engemaw an tih dik loh a ni tih te kan sawi thin a. A nih bik lohna chhan chu, tunah pawh hian NREGA-ah pawh kan hotute Delhi-ah an zu kal a, crore za chuang minrawn sanction leh tur an la nei a. Tunah engemaw zat anrawn hawn tawh a, chu chu financial ending-ah hian kan state chauh

kan buai bik lo a ni tih hi chu a chiang hlein ka hria. Chuvangin, ni 100 inhlawhna kan ti a, ni 30 bawr vel chauh inhlawh thei tur anga kan inngaih kha ni 72 bawr vel chu kumin pawisaah hian kan inhlawh thei dawn niin kan hria a, kan lawm khawp mai.

S P E A K E R : Zawhbelhna a awm tawh lo vang a, House Leader.

Pu LAL THANHAWLA, CHIEF MINISTER : Pu Speaker, he programme hi mipui mimir ten inhlawhna an neihna tur atan leh chumi ruala asset siam na tur atana hmanraw tha ber te zinga ngaih a ni a, UPA sorkar laia lo chhuak a ni. Tuna sorkar thar khuan rek cher deuh tumna awm a hriat a ni a, Prime Minister meuh tawngkam atangte pawhin. Chuvangin, Congress party hotunu ber/hotulu berin Congress President te min ko khawm a

Pu LALRUATKIMA : Pu Speaker, khawngaihin a zawhna nen khan a relevant chuang lo a. Concern Minister-in min chhang tawh a, House Leader a zahawm khawp mai a, zawhna dawt leha khawm kal ang u, minute tam a awm tawh lo.

*Speech not corrected

Pu LAL THANHAWLA, CHIEF MINISTER : Pu Speaker, ka rawn chhanpui a ni. Hei hi ka right a ni a, ka thawhpui Minister hi ka chhanpui thei a, tuma tihbuai phak a ni lo. Disciplinary action i lak duh chuan i la thei. Chuvangin Pu Speaker, tuna a chhanna kha ka khawp kham lo ni lovin, a background leh tuna a dinhmun dik tak leh tuna sanction a hmuh belh tur ang chi te a lo chhuahna chhan kha he ram mipuite hian hria se ka duh avangin ka rawn sawi a ni.

S P E A K E R : Nakin zelah House Leader chuan a duh hun apiangah a intervene thei a ni, khawiah pawh, kha kha hriat tur.

Question hour a zo tawh a, kan zingah member thenkhatin tulna dang dang avangin House-a awm loh phalna an rawn dil a. Chungte chu – Pu Lal Thanzara, Minister zahawm tak, Pu C.Ngunlianchunga, Minister zahawm tak, Pu S.Laldingliana leh Pu Joseph Lalhimpua te an ni. Hemite 4 hian vawiinah hetah hian a then chawhma an tel thei lovang a, a then chu ni khat pumpui an tel thei dawn lo a ni tih kha House ka hrilh ni se.

Tunah chuan Laying of Papers-ah kan kal ang a, Minister zahawm tak Pu Lalsawta'n "The Mizoram Public Sector Enterprises' Early Retirement Rules (ERR), 2015" rawn lay sela.

Pu LALSAWTA, MINISTER : Pu Speaker, i phalna leh he House remtihain "The Mizoram State Public Sector Enterprises' Early Retirement Rules, (ERR) 2015" chu House able-ah ka rawn lay e.

S P E A K E R : Awle, a copy kha sem ni se. Awle, tunah chuan MLA zahawm tak Pu Chalrosanga Ralte, Subject Committee- I Chairman ni bawh chuan Statement of Action Taken tih chi hnih (2) he House-ah hian rawn pharh sela, amah i sawm ang.

Pu CHALROSANGA RALTE : Pu Speaker, ka lawm e. Vawiina Subject – I in statement kan lay tur te hi Transport Department leh Disaster Management & Rehabilitation Department chungchanga session hmasa lama Main Report leh Action Taken Report kan pek tawh kal zel recommendation kan siam te a concern department ten an bawhzui dan a ni a. Subject Committee term hi tunah siamthar a lo ni leh dawn ta a. Chairman ka nih ve chhunga kan department thlanchhuah report bakah Action Taken Report leh Statement thlenga zo fel hmana kan awm avangin ka thawhpui member zahawm tak tak te chungah leh kan department thlanchhuah thawktute chungah lawmthu ka sawi hmasa a ni.

Pu Speaker, i phalna leh he House zahawm tak remtihain –

- (i) Statement of Action Taken on the further recommendations of Subject Committee – I contained in the Third Report relating to Transport Department.
- (ii) Statement of Action Taken on the further recommendations of Subject Committee – I contained in the Fourth Report relating to Disaster Management & Rehabilitation Department te hi he House zahawm takah hian ka rawn lay e, ka lawm e.

S P E A K E R : Awle, a copy kha sem ni se. Awle, tunah chuan MLA zahawm tak Pu K.Sangthuama Chairman, PAC in report pahnih thehluh tur a nei a, thehluh turin i sawm ang.

Pu K.SANGTHUAMA : Pu Speaker, report pekna hun min siam sak avangin ka lawm e. Vawiina PAC in report kan pek tur hi Action Taken Report pahnih a ni a. Assembly Session hmasaa report kan pek tawh bawhuina a ni.

Pakhatna: Seventeenth PAC report hi Geology & Mining Wing, Industries Department hnuai a awm lai ami a ni a. Sorkar sum hmuh dan rinhlelh chungchanga ni 23.3.2015-a main report kan pek tawh recommendation te department-in a bawhzui dan a ni ber a. Hemi thu kal zelah kan sorkar officer pension tawh pakhat lakah tunah hian departmental proceeding draw mek a ni a. Assembly Committee hian thil dik lovah chuan a titu chung action la tura recommendation siam hi thil tih nuam lo tak, mahse kan ram tan a pawimawh si a, kan ti lo thei lo thin a ni. Chuvangin, he kan report a further recommendation kan siam te pawh hi chak taka bawhzui zel turin department lam te kan chah duh nghal a ni.

Pahnihna: Eighteenth PAC report hi PWD chungchang a ni a. Work department zawng zawng ten contract hna an pek dawna agreement an sign tur reng

rengah fimkhur taka ti thin tura kan duhna chungchang a ni a. He thilah hian sorkar dan dinglai pawh a awm reng a. Hei hi department hian ngai pawimawh thin se kan duh a ni.

Awle, Pu Speaker, i phalna leh he House zahawm tak remtihna :-

- (i) Seventeenth Report on Action Taken by the Government on the Recommendations contained in the Third Report of the Public Accounts Committee on the Report of C&AG of India for the year 2009-2010 relating to Industries Department (Geology & Mining Wing).
- (ii) Eighteenth Report on Action Taken by the Government on the Recommendations contained in the Fourth Report of the Public Accounts Committee on the Report of C&AG of India for the year 2009-2010 relating to Public Works Department te hi he House zahawm takah hian karawn present e. Ka lawm e.

SPEAKER : Awle, khawngaihin a copy kha sem ni se.

Nimnah khan House remtihna kan la tawh a. Nimina kan tih dan ang chiah khan kal leh a ngai dawn a, tunah Financial Business ah kan kal tawh ang a. Vawina kan tih tur chu Minister zahawm takte pahnih Pu John Rotluangliana leh Pu Lalrinmawia Ralte te demand sawihona kan nei dawn a ni.

Tunah hian a hmasain Pu John Rotluangliana, Minister zahawm takin a Demand No. 17, 42, 43 te House-ah hian sawiho atan rawn pharh se la, amah i lo sawm ang.

Pu JOHN ROTLUANGLIANA, MINISTER : Mister Speaker Sir, on the recommendation of the Governor of Mizoram and with your permission Sir, I move the

Demand No. 17, 42, and 43 for ₹ 3,17,54,40,000 only for meeting expenses during 2016-2017 in respect of the following Departments:-

Demand No. 17 : Food, Civil Supplies & Consumer Affairs	-	₹ 2,47,47,64,000
Demand No. 42 : Transport Department	-	₹ 53,31,74,000
Demand No. 43 : Tourism Department	-	₹ 16,75,02,000
TOTAL	-	₹ 3,17,54,40,000

Thank you.

SPEAKER : Awle, tunah chuan Minister dang kan sawm leh ang a, Minister zahawm tak Pu Lalrinmawia Raltein a Demand Nos. 28, 33, 36 leh 37 a pawisa hman turte he House a sawiho atan rawn pharh se, amah i lo sawm ang.

Pu LALRINMAWIA RALTE, MINISTER : Mister Speaker Sir, on the recommendation of the Governor of Mizoram and with your permission Sir, I move the Demand Nos. 28, 33, 36 and 37 for ₹ 1,40,76,45,000 for meeting expenses during 2016-2017 in respect of the following Departments:-

Demand No. 28 : Labour & Employment Department	₹ 25,88,27,000
Demand No. 33 : Soil and Water Conservation Department	₹ 16,48,59,000
Demand No. 36: Environment and Forests Department	₹ 73,14,55,000
Demand No. 37: Co-Operation Department	₹ 25,25,04,000
TOTAL	₹ 1,40,76,45,000

Thank you, Sir.

SPEAKER : Awle, kan Minister zahawm takte pahnihin an Department chan Demand hrang hranga pawisa hman turte he House-ah an rawn pharh ta a. Tunah sawihona kan tan ang a, a pahnih khan vawikhatah sawiho leh mai ila a tha ang e. Khawngaihin a sawi duh khan han sawi tan mai rawh u le.

A hnuhnung lam nih hi khawngaihin inchuh tawh lo ila a tha awm mang e, hunin min nghak si lo a. In rawn inngaihtuah lawk tawh thin ang a, sawi mai teh u khawngaihin. Aw, Pu Ngurdingliana.

Dr. NGURDINGLIANA : Pu Speaker, ka'n ding hmasa ber mai ang e. Demand pali rawn sawi ka tum a. Demand no. 17-na Food, Civil Supplies & Consumer Affairs leh demand no. 42 Transport, demand No. 43 Tourism Department leh demand no. 36-na Environment and Forests Department a ni.

Ka lo chhiar danin department inenkawlna tur chungchangah Object Heads of Account helai Demand for Grant bua kan hmuh ang te atang chuan a senso tamna ber hi chu salaries leh medical expenditure a ni a, amaherawhchu, (*SPEAKER : Kan inthlak lawk ang e, khawngaihin sawi zel rawh.*)

(*DEPUTY SPEAKER : Awle, chhonzawm rawh le.*)

Dr. NGURDINGLIANA : Department te a lian a, expenditure helaia lo lang pawh hi a awm ka ti khawp mai.

Tichuan, demand no. 17-na Food and Civil Supplies atangin ka'n tan ang a. Hei kan hria a, nikum lamah mega-block a awm dawn tih hriain a changtu Minister te, Parliamentary Secretary leh department lama Commissioner atanga a hnuaihnuung ber thlengin tan an la a. State dangah te zinin, ram dangah te pawh zinin rel kawng siam kan hma lawka a awm avangin engtingge buhfai kan chawh luh theih ang tiin kawng

tinrengin ngaihtuahna sengin hun, sum leh pai sengin an vak chhuak a. Mizoram mipuiin kan hria a, he rel kawng an siam chhung hian harsatna pakhatmah buhfaiah a ni emaw, gas chungchangah a ni emaw, khawnvartui chungchangah a ni emaw kan tawng lo a ni. Chu a chhapah hnianghnar fein, rawn la thuai thuai ru tih ngai khawpin veng hrang hrangah, khaw hrang hrangah te mike atanga au ri kan hre zawk a nih kha. Hemi kawngah hian department, Minister atanga IV Grade thlengin lawmawm ka ti a, waviinah hian lawmthu sawi ka duh a ni.

Tin, tunhnaiah central sawrkarin Food Security Act hmang turin India rama state zawng zawng te, Union Territory te hnawhsarum takin order titih deuh angin tihian thupek a rawn siam a. Keini pawh sorkar hmasa, kan term hmasa khan chhuanlam siamin khatih hunlaia UPA sorkar hruaitu keimahni kan party te an ni nachungin kan pehhel thin a ni. Amaherawhchu, a loh theih loh dinhmunah kan din takah chuan department te pawh an han inbuatsaih a, kawng tinrengin staff lak belh chungchangah te pawh computer khawih thiam te pawh hmanhmawh deuhin an han la a. Khang zawng zawngah khan Food Security Act hman tha ti chung siin theihpatawp an chhuah chungin, khawilayah emaw felhlel chu a awm ngei ang, a hriat a, chanchinbuah a rawn chhuak chamchi a, veng tinah mike te pawhin an au a ni. Kar hmasa lawka kan Supply Minister-in huaisen taka heng hi chu April thla chhungin kan chingfel ang a tihah khan kei chu innghat tawh mai ila. Mega block chhunga buhfai, khawnvartui, gas hnianghnar taka min pe theitu ten ‘ka ti ang’ a tih hi chu lo nghak phawt mai ang u tih kha ka ngen duh a ni.

Tin, hemi piah lamah ka’n sawi belh leh duh chu, keimah bikah kan bialah lawmthu sawi ka duh a. Kan member dangte pawh khan min lo thik deuh a nih pawhin min lo thik mai ula, a lawmawm em a. Hei kan bial, hmar thimpui bial tih a ni a, chumi hre reng chuan NABARD sum kaltlangin Khawlian-ah kudam changkang tak, quarters min pe a, kan sa zo tawh a. Phullen-ah chutiang bawkin kudam leh quarters kan sa zo a. Suangpuilawn-ah kudam leh quarters kan sa bawk a, trio thawtin ti hian department-in malsawmna min han pe a. Tin, chuachhapah mega block kan tih chhung zawng khan kan

kudam kha vawikhatmah ruah a la nei lo zui a, lawmthu hlir hi a ni ringawt mai a. Tin, hemi piah lamah kan kudam chhe deuh tawh Phuaibuang Vanbawng, Khawruhlian te work progress-ah khan min telh rawh u kan ti ngam tawh lova, mahse min la rawn telh hram a, chuvangin kan Supply Minister, kan Parliamentary Secretary-te, kan Commissioner, tupawh a hnuai ber thlengin Supply Department chu nopui lo dawm pui che u hi kan bial chuan kan chak khawp mai. In lo kal hun hunah kan theihtawpin kan lo dawngsawng ang che u tih kha ka'n sawi duh a.

Tin, Transport chungchangah ka'n lut leh duh a, Demand no.42-na ah. Ka sawi ang khan salary leh wages leh medical hi chu department hnathawk an tam avangin a sang lo thei lova, a awm ka ti khawp mai. Transport Department hian harsatna tam tak an tawk ve niin a lang a, amaherawhchu, sorkar-in ngaihtuah sakin helai Directorate building complete nan hian heta ka rawn ziah danah hi chuan ₹ 200 lakhs deuhthaw an pe niin ka hria a, a lawmawm ka ti khawp mai, sorkar chungah pawh. Anni hi nitin mipui khawih thil enkawltu an nih avangin office changtlung neih an ngai a.

Tin, anmahni hi direct-a mipui deal an nih avang hian computer an mamawh hle mai a. Work progress-ah emaw, demand-ah khan computer head ang zawng chuan fund rawn release kha ka hre lova, amaherawhchu, other charges-ah khan a awm tho in ka hria a, kha tah khan sorkar-in ruahmanna a rawn siamsak niin ka hria a, a lawmawm ka ti bawk a. Tin, Transport Department an nihna angin bus thar an mamawh em em a tunah hian vehicle purchase-na tur column-ah khan ₹ 200 lakh chuang fe rawn dah a ni a, a lawmawm ka ti a. Tin, hemi piah lamah light motor vehicle te pawh an mamawh em em a chumi hre reng chuan motor leina tur pawh engemawzat non-plan atangin dah a niin ka hria a, hei pawh hi a lawmawm em em a ni.

Infrastructure building chungchangah hian, tuna demand ka rawn sawi mek Transport Department leh Food & Civil Supply Department hi department entawn tlak

tak an niin ka hria a, hmunhma pawh an nei tha a, chuvangin in luah hawh chungchangah pawh an expenditure kha a tlem hlein ka hria a, a lawmawm ka ti khawp mai.

Tin, tunlaia kan chai Life Time Tax kan tih te, Road Tax, Passenger Goods Tax tih leh Route Permit chungchang, All Mizoram Permit kan sawi te pawh hi kan Minister-in department officer ten nen ruahmanna an nei mai theiin ka hria a, a wind up hunah henge te pawh hi min rawn chhang se ka duh a. Tunlai boruakah hei hi mipui ti ti ber a nih avangin ruahmanna fel tak an nei niin ka ring a, chungte pawh chu min rawn hrilh thei sela.

Tin, Aizawl khawpui bik lo thang zelah ruahmanna mumal tak kan neih a ngai a. Kan hriat danin tunah hian city bus service lai 261 a awm a, taxi hi 3525 lai a awm tawh a. Mipui kea kal vel tan chet hi a har khawp mai a, chuvang chuan engtin nge traffic jam hi kan sutkian theih ang tiin rawtna hrang hrang pawh a awm a. Intlan chhawk chungchangah ruahmanna an nei fel thei tawhin ka ring a. Tha ka tih mai mai chu, Delhi-a an tih ang khuan number inkawp leh inkawp lo tlan loh ni kha siam tawp mai sela. Sorkar motor a ni emaw, mimal motor a ni emaw kan zavai khan min hrut sela. Amaherawhchu loh theih loh VVIP entirnan, Governor, Chief Minister, Speaker, Home Minister, Chief Secretary, DGP leh Fire Services te kha chu exempt ila, Delhi-a an tih ang khuan. A bak hi chu tupawh hi min hrut vek mai sela phunnawi pawh kan awm lo ang a, kan zavaia that tlanna a nih pawh ka ring a. Khangte pawh kha kan hotuten ngaihtuahnaah han seng mai mai sela tih kha ka'n sawi duh a ni.

Hemi piahlamah Tourism Department ka'n lut leh duh lawk a. Kan lo chhiar angin work progress-ah te, demand for grant-ah te hmalakna lutuk tur sum tam tham chu a awm lo na a, a awm chhunah a tam thung a, hei hi a lawmawm ka ti a. A bikin Thenzawl, Centrally Sponsored Scheme atanga lo kal tur hi a awm bawk niin ka hria a, hei hi a department ang chuan lawmpuiawm ka ti a. Hmun danga an kal chhoh zelna turah hi chuan Tourism Department ah hian tun ang tluka Tourist Lodge kan ngah

hi a awm lova. Ka hriat soal loh chuan 9 kan privatize tawh a, a dang tunhnaia sak zawh te pawh hi in down sizing lam ni lovin hmasawwna lam zela kan kalna niin ka hria a, la privatize chhonzawm thei zel se tih hi ka duh a. Tin, hmun hrang hrangah hmun nuam tak tak, kan pi leh pute sulhnu en tur tam tak kan nei a, hengah te hian senso sang lutuk si lovin hut ang deuh bathroom tha siin hmun tam takah inbenbelna tur a awm a. Heti zawngte hian hma la zawk ila a va tha awm e te ka ti a, rawtna ka rawn nei duh a.

Kan hriat angin kan bialah pawh Khanpui khi privatized a ni tawh a, a chhak lawk Vanzau khi tunah khian hluihlawnin a la awm hrih mai mai a. Khingte pawh khi hma min rawn laksak turin kan Minister zahawm tak ka rawn ngen bawka ni.

A tawp berah demand no.36-na Environment & Forest Department hi ka'n lut duh a. Forest Department hmalakna hi a chhuanawm ka ti a. Forest Department-a thawk officer-te leh a hnuaihngung ber thlengin an commitment hi a thuk em emin ka hria a. Mimal taka ka vei a nih bawka avang hian forest chungchang hi chu TV ah te, internet-ah te, chanchinbuah te emaw forest kaihnhawih article ziaak a nih hi chuan ka bih vat zel a. Chuvangin, an Department hmalakna pawh hi ka vilpui ka ti ve a, tui vang a ni a. Tin, a pawimawhna kan hriatchian avangin heng kawngah pawh Department in tuna hma a lak meknaah pawh a lawmawm a.

Governor's speech-a a rawn sawi ang khan, tuna kan geographical total area coverage 93.00 a nihnaah pawh khan hna an thawk nasa hlein ka hria a. Peng hrang hrang VFDC kaltlangin National Afforestation Programme te, Green Mizoram Programme te hlawhtling takin 13th Finance Commission atang khan hma an la daih tawh a, an hmalakna hi chhonzawm zel sela.

Tin, ka sawi tawh ang khan, heng national park kan neih te, sanctuary kan neih bakah hian khaw hrang hrangah khawtlang mipuiin ram an thehchhuak thei ka tih

tawh kha, khang te pawh kha hma rawn la zelin kan Zoram nuam hi rawn siam chhonzawm zel turin ka'n duh a ni.

A tawpnaah chuan Pu Speaker, thingkung pakhat man to zia hi hre rengin (₹ 32 lakh) thingkung tam tak kan neih theih nan Forest Department. hian hma rawn la sela. Vawiinah demand ka rawn sawi te leh a dang te kha he House hian pawmpui ngei turin ka rawn thlawp a ni e. Ka lawm e.

DEPUTY SPEAKER : Tunge sawi ve leh ang le? Pu K.Sangthuma.

Pu K. SANGTHUAMA : Pu Deputy Speaker, ka lawm e. Tuna kan sawiho turah hian demand no.17-na Food, Civil Supplies & Consumer Affairs tih kha sawi hmasa ila.

Tunlaih kan hmuh theuh angin leh kan hriat theuh angin food security chungchangah ration card kan siam thar a ni a. Hemi ration card siam tharah hian kan hriat theuh angin dik lo a tam hle mai a. Hming dik lo te pawh a awm a, tin, pian kum chungchangah te, heng hi enge ni a chhan bul tak chu sorkar tan pawh hriatchian a har viau ang a. Mahse, a tlangpui thu ah chuan duh anga kan fimkhur tawk loh vang hi niin a langin ka hria a. Tin, Pu Deputy Speaker, chu mai ni lovin an hmanhmawh lu deuchte pawh a ni mai thei a. Thil hi hmanhmawh deuha tih rum rum hi chuan tihdik tawk loh te pawh hi thil awm thei chu a ni teh meuh mai a. Amaherawhchu, a thawktute hi an inthlahdah deuh nge ni a hriat loh va, tunhnu zelah chuan hetiang hi fimkhur deuhhlekin ni sela. Hming ringawt pawh min chhut sual sak chuan kan thin a rim deuh hlur mai a ni. Kei ka hming an ziah pawh hian Sangthuama an tih ringawt hi chuan a dik lo ka ti a, kan telh loh hi chuan a khingbai tlatin ka hria. Chutiang chiah chuan hming ziah chungchangah te pawh hian dik lo engemaw zat a awm a, hengah hian kan fimkhur tawk lo deuh a ni tih vawiinah hian han sawichhuah ka duh a. Hun kal zel tur atan chuan fimkhur deuhhlekin Department te hian ngaihtuahna rawn hmang sela a that ka ring a.

Tin, pakhat lehah chuan food security selection chungchang hi khawimaw lai laiah dik tawk lo deuh awma sawina a awm a, hei pawh hi fimkhur lehzuala tih a thain ka hria a. Tunhma pawhin AAY te kan han thlang a, dik tawk lo eng eng emaw a awm fo thin. Hei hi central sokar atanga tunhma atanga an rawn ruahman, wawiina kan tihhlawhtlin tak a nih avang hian helaiah hian induhsak bikna emaw, engemaw awm miah lova a dawng awmina an dawn hluah hluah hi a tha a. Chuvangin, lo tihsual palh a awm a nih pawhin hetiang kawngah hian huaisen taka a dik lo na na na chu paih leh emaw, hmu tur zawkina an hmuh loh te a awm thei thin. Entirnan, khawi maw laia concrete building tha tak nei te, hetah guidelines a awm vek a, wawiinah sawichhuah kher a ngai lova. Chuvangin, khatiang chi motor lo nei tawh te, tlema awm thei deuh te, chutiang ho tih a rethei tak zawk tih loh pawh thil awmthei a ni a. Chin chhuakin tunah kan hre mai rih lova, a lo chhuak anga kan hre zel ang a. Chutiang thil a lo awm a nih pawhin huaisen taka paih ngam, belh ngam turin kan Minister zahawm tak pawh hi ka chah duh a ni.

Tin, demand 42-na Transport chungchangah hian, hei lifetime tax kan ti a, 6%vel lak kan tum a ni a. Tunlai car hi a tlangpui thuin a hman tlak deuh te hi chu nuai 7 atanga nuai 10, nuai 15 te a lo ni a. Tichuan nuai 10 velah khan ₹ 60,000/- pek a ngai ta a, chu chu kum 15 tan tih a ni a. Kum 15 hrim hrim tan kha chuan kum 1-a kan pek tur kha tam phei chu a tam chiah lova, ₹ 4000-5000 velte a lo ni mai a. Amaherawhchu, a tlangpui hian kum 15 kan hmang lo hrim hrim a, kum 10-ah te chuan hralh kan duh mai a, kum 5/6 ah te pawh hralh kan lo duh a. Chuvangin, a lifetime hi kum 15 a lo ni si a, taxi-ah te phei chuan kum 15 chhawr hi an tlem viau ang a, auto rickshaw-ah te pawh. Khatiang kha sorkarin ngun takin ngaihtuah nawn leh hi a theih lo em ni tih hi wawiinah hian ka sawi duh a.

Tin, taxi intlanhhawk chungchang hi, kan kawng chu a tawt tih kan hria a, a dik chiah a, kan kawngte a lo te a. Kolkata te pawh khu 1967, kan sumdawn vanglai chuan a tawt em em a, taxi-ah, rickshaw-ah kan kal a, 'kal ngaihna a awm tawh lo, kein i

kal mai ang,' kan ti a, kan chhuk fo tawh a ni, kum 50 kal taah khan. Amaherawhchu, vawiin thleng chuan an la kal tho a. Chuvangin, a taxi ngawr ngawr lam hi mawhchhiat lo ila, kum tin lirthei sing tel kan lei a, Aizawl District-ah ngat pawh hian, chu chu kan kalphung a lo ni a. Chuvangin, taxi ngawr ngawra kal lo hian, kan duh a nih chuan kan motor zawng zawng hi intlanchhawk ta mai ila a tha lawm ni? A,B,C,D... tihin a awm a, tichuan, ni khat kha MZ 01A, a nihnihna ah MZ 01B, chutiang zel chuan kal ila, thla khatah vawi khat chiah ding hian kan intlanchhawk thei vek a ni. Chuvangin, hetiang lam deuha ngaihtuahna siam hi a tha lawm ni, a taxi ngawr ngawr 2000/3000 vel emaw lek Aizawla awm hi mawhchhiat ngawr ngawr bik lo hian. Kan hotute, kan sorkar leh kan Department hian ngaihtuahna helaiah hian rawn hmang sela, tichuan kan hlim tlang thei deuh lo maw? Chutiloa in ngur in ngur mai a, keini bik, chuti khati ti ti lovin. Thla khata vawi khat chiah din hi chu keini motor nei ho zawng zawng tan pawh hian a harsa hian kei chu ka hre lova. Chutiang zawng deuhhleka ngaihtuahna chu vawiinah hian ka'n sawichhuak duh ve hrim hrim a ni.

Tin, motor replacement chungchang, taxi te, sumo te, bus te, heng pawh hi replacement hi a awm theih loh chuan a tha in kei chu ka hre lova. Chuvangin, helaiah hian ngaihtuahna thar rawn hmang leh se a tha in ka hria.

Tin, Falkawn Referral Hospital-ah hian bus te chi emaw, bus pangngai emaw chi hi tlantir ngei ngei awm niin ka hria a. Sawti laiah sawn town bus, a nih loh pawhin line bus emaw hi tlantir theih ni sela. Chu chu hmanni khan ka zawt a, 'an duh lo alawm, owner in an duh lo,' association-in an ti a. Engah nge an duh loh? Sorkar thu a ni a, an duh loh chuan a duh tur kha pe mai rawh u. Line bus a tlan duh 15 hi a hranin pe mai rawh u, a hnawk lo hrim hrim. Chuvangin, an tlan duh lo a nih chuan a tlan duh an tam ang. Kha kha kan Department leh kan sorkar hian lo hria ula. Tichuan, awlsam takin kan kal thei ang a, tlawm zawkin kan kal thei dawn a ni. Chuvangin, an tlan duh tlat lo a nih chuan a tlan duh tur kha 15 vel emaw, 10 vel emaw, 5 emaw pawh ni se, kha kha pe

mai ula, tlan mai sela, tichuan sawlai damdawi in pan tur pawhin awlsam zawkin transportation-ah hian kan awm thei dawn niin ka hria a, rawtna ka'n siam ve duh a ni.

Tin, demand no. 43-na Tourism chungchangah hian privatisation-te kan ti a, tender-te an ko a, a dik khawp mai. Amaherawhchu, kan han enchian hian duhthu a sam lo viau mai a. A thente chu sang tak tak a kum khat atan, thla khat atan ti a chhang te pawh an awm a. Mahse, khang kha re-tender te an awm leh a, hetah hian fimkhur viau ngaiin ka hria a. Sum kan harsa a, sum kan duh a, sang deuh kha chu lak mai awm niin ka hria a. Sang zawk la lova, re-tender leh eng eng emaw a awm leh hi chuan a tha in ka hre chiah lova. Chuvangin, Tourist Lodge chungchanga privatization kalphung hrim hrim hi chu a tha a. A that hrim hrim ang ai hian tender kan tih dan chungchangah hian fel tawk lo a awm a, a fel lohna te chu vawiinah hian kan sawi vek seng lo ang a. Hei hi kan Minister zahawm tak pawh hian lo enpui deuh sela a tha awm mang e aw ka'n ti a nih chu. (DEPUTY SPEAKER : Warning) Warning a ni tawh maw, Pu Deputy Speaker, minute hnih khat chauh, khawngaihlin.

Demand no. 28-na Labour & Employment-ah hian kal leh ila. Register lo a hna pek hi nimirah khan zawh a ni a, mahse, a zat a hriat theih loh a. Tunah hian engemaw zat chu awmin a lang a. Hengah hian fimkhur deuh hlek chu ngaiin ka hria a. Chuvangin, heti laia a zat kan hre thei lo a nih pawhin Labour & Employment hian in register-na neitu in ni a, eng ang hi nge helaia in register lova hna hi an pek tih chu ngaihven deuh hlek ula chuan a tha khawpin ka hria.

Tin, demand no. 36-na Environment & Forests-ah hian han sawi leh duh ka nei a. Nikum lam budget aiin crore 5 chuang zetin a tlem niin a lang a, hei hi engtizian nge? Forest-hi a pawimawh angreng viau a, chuvangin helaiah hian tih tlem thut duhna hi engnge a chhan tih te pawh hriat a tha viauin ka'n ring a.

Tin, teak hi vawiin thleng hian hralh hleihtheih a ni lo. Vaibelchhe tam tak man tunah hian Mizoram-ah a thar tawh a, a awm tawh a, kum 30/40 te a ni a. Vawiin thleng hian hralh theih lohinh a la awm ta mai mai a, tah hian kan ram sum hnar tur vaibelchhe sang tel man chu a awm hrim hrim. Sangkhat mai pawh a ni lovang, vaibelchhe 10 man tur nei te pawh an awm a ni. Vaibelchhe 10/20/30 Pu Speaker, minute 2/1 chauh. Hei hi ngaihtuahna thar hmang turin ka'n chah duh a.

Tin, pakhat leh ah chuan Forest chungchang hi khaw tinah hian tunhmaa lal lal lai kan tih, lal lal hnu pawh a ni ang chu, District Council hun lai pawhin forest reserve khaw tin hian kan nei vek a, hei hi tunah hian nei mang lo an awm ta niin ka hria a. Chuvangin Forest lam hian ngun takin ngaihtuahpui ila emaw, LAD lam hian khawtinah hian forest reserve mumal tak kan ramah hian nei leh ila. Tichuan khaw tinin sq. km 2/3 theuh kan lo neih pawh khan khaw 700, khaw 1000 dawnah chuan forest tam deuh kan siam thei dawn tih hi ka'n chah ve duh bawk che u a ni e. Pu Speaker, kha kha ni mai sela, hun a chep si a, kan sawi zung zung thei mang si lova, ka duhtawk mai ang e, ka lawm e.

DEPUTY SPEAKER : Le, tunge han sawi ve leh ang le? Pu K. Lalrinthanga.

Pu K. LALRINTHANGA : Pu Deputy Speaker, ka lawm e. Demand No. 17-ah khan rawn sawi ka duh chu food security chungchang hi a ni a. Mizoramah hian chhungkua zawng zawng ration card kan inpe thin a. Tuna Food Security Act hian Mizoram mipuite zinga a huam tur chin chu mipui nuai 7 vel chauh niin ka hria a. Chutiang a nih chuan an rawn duan anga kan inpe dawn a nih chuan mi tam takin ration card kan nei thei dawn lova. Mi nuai 7 chauh kha pek tur niin a lang a. Khami kha kan insiamthatna hun tur niin ka hria. State

dangah mi hausa leh awm thei deuh te, sorkar hnathawkah pawh officer deuh te chu ration card an inpe ngai lo a. Mizoramah thung chuan kan induhsak tawn te pawh a ni ang a, mi zawng zawng kan inpe a. Buhfai manah subsidy-in pawisa tam tak sorkar-in a seng a, tun hi kan insiamthatna hun tur ni awm takah ka ngai a. Nimahsela, kan Minister hian kan mipuite a la khawngaih nge ni hetiang hian mi zawng zawngin ration card kan lak theihna turin ruahmanna a han siam leh hi lehlamah chuan a rilru that thlak hle in ka hria a.

Helaiah hian kan ngaihtuah chian deuh te pawh a thain ka ring a. MLA ten ration card kan tibo tawh a, sorkar-ah ration card kan nei tawh lova, khatiang zel khan sorkar hnathawkah pawh Secretary te, Director te, khatiang te kha chu ration card te surrender-in tiang khan awm ve ta sela, chutichuan a chung lam atangin zawi zawiin thahnemngaihna azarah kan ziaawm chho zel ang a. Supply Department atanga buhfai mana alo thlawna tam tak kan inseng thin hi pawisa save-na tha tak ni turah ka ngai a. Ration card mi tam tak chuan kan nei nachungin ration card atanga buhfai la lo hi mi tam tak an awm tih chiang takin keimah ngei pawhin ka hria a. Keini te pawhin kan la ngai lo ang tluk a ni a, bazaar-ah buhfai kan lei mai a, khatiang khan kan eitur chu kan ti a. Mi tam tak khatiang a bazaara buhfai lei a ration card atanga buhfai la lo hi an awm a. Khatiang te khan thahnemngaia (an thil tih a lo lanchhuahna tur atan) ration hi tihlem dan kawng hi awm zawk se thain ka hria a, chu chu ka han tarlang a ni.

Demand no. 42-na Transport-ah khan lawmthu kan Minister hnena sawi ka duh chu, Vairengte thleng khuan bus a tlan ngai ta lova. Sumo service-in an ticket rate an tisang tual tual mai a, kan mipui ten an tuar nasa deuh a. Hmanniah an hnenah kan sawi a, chutichuan Vairengte-ah bus service kar khatah wawi 2 tlan tawh turin ruahmanna min han siam sak a, lawmawm ka ti hle. Chu chuan private-in sumo te, maxi-cab te a han tlan tir a, a rate tisang lutuk tur kha a control thei deuh dawn niin ka hria a, a lawmawm ka ti hle a ni.

Tin, chutih rual chuan Auto-rickshaw te, taxi permit chungchangah hian kan Minister hian ngaihtuahna a siam ni a ka hriat chu, permit pek vak tawh loh hi a tum niin ka hria a. Hei hi a thatna te pawh awmin ka hria a. Mahse, a tul rih lohna te pawh a la awmin ka ring a. Aizawl khawpui angah te leh Auto-rickshaw service-na khaw thenkhat District Headquarter-ah te chuan an tawt tawh avang te leh a nei tawh ten eizawna hlawk tehchiam loa an tlanna chin te pawh a awm thei a. Amaherawhchu, khaw thenkhat Auto-rickshaw service ve theihna ah la tawt si lo, Auto-rickshaw service kan la inchan tawh lohna khuate pawh a la awm a. An tawt tawhnaah hi chuan permit pe tawh lo ta pawh ni sela, permit pek la ngaihna hmun khuaah hi chuan min la chhonzawm sak sela. Chutichuan, kan mipui ten Auto-rickshaw service te pawh an chhawr tangkai zual ve thei deuh ang a, a hlawk deuhin ka ring a.

Chutih rual chuan ngaihtuahna thui deuh kan siam a thain ka hria a. Engvangin nge Aizawl-ah te taxi service hi hnawk kan tih tak riau tih lai hi min chhut chian sak em aw ka ti a. Mizoram-ah state sorkar kan nih atanga taxi permit kan pek chhoh dan kha a kum bi hian nakinah wind-up hunah min rawn hrilh ta sela. Chutichuan, tunge ni, tu hunlain nge ngaihtuah chiang mang hlei lova khawpui tawt dan tur pawh ngaituah chiang mang loa permit lo pe vak vak tih te pawh kha a hriat theihin ka ring a. Chu chu member-ten ngaihtuahna kan lo siam theihna turin ka han chah duh a ni.

Tin, nichinah ka hmaa sawitu khan sawlai Falkawn-ah line bus kal ve sela ti a ngaihtuahna a neih a rawn sawi kha tha hlein ka hria a. Hmun thenkhatah bus service te a kal that duh vak lohna hmun a awm a. Mimal thenkhat an han service a, chutia hlawk deuh hlek ni a an hriat hnu ah hian association ho hian an rawn chuh leh vat a, mahse khatiang kha a awm hmaa mimalin thahnemngai taka an han tih khan mipuiin an han hmang tangkai chho ta thin a ni a.

Tun hmain Aizawl leh a chhehvel atangin office kal tur hruai turin bus te service tir thin a ni a. Chutiang chuan mipuiin tangkai takin an chhawr a. Chumi hnu ah chuan private bus service pangngai kal tir a ni a. Chutiang bawka Falkawn-ah pawh kan tih chuan mipuiin an chhawr tangkai a ni tih an hriat a, passenger te an awm a ni tih bus owner association te pawhin a hriat chuan chak takin an tlan leh mai dawn niin ka hria a. Ka hriat danin University kawngah te pawh khuan private bus han tlan tir dawn chuan association hoten an do tlat ni awm te pawhin ka lo hria a. Private bus (hemi service pangngai ni lo) pangngaia han chuan thlakna tur khung lai vela han kalna tur hi a vang riau a ni. Chuvangin kan Minister hian hetiang kawng hi a ngaihtuah a thain ka hria a ni.

Tourism Department-ah hian kan Minister hi ka ngen duh chu, Serlui bialah khuan han zin pawha riahna tur hi kan nei lova, Buhchangphai leh Saiphai-ah te khuan riahna tur kan nei lova. Kum 2012-13 bawr vel khan Tourism Department khan Tourist Lodge awm turin a siamin ka hria a. Mahse, min divert sak daih mai a, tun thlengin riahna tur kan la nei lo a ni. PWD bungalow awmna hmun Saiphai siam tha tura biakin, 'PWD-in bungalow kan mamawh lo, riah tulna a awm lo,' tiin min chhang a. Chutiang a nih chuan Department dang min pe ula kan tih leh an tang ang tek leh bawk si a. Chuvangin Tourism atang hian riahna tur hmun kan neih ve theih nan te min buatsaih sak turin ka han ngen nawn leh duh a ni e.

Tin, Soil & Water Conservation Department hnuaiah hian sorkar term hmasa ah khan, Phaisen khua ah khuan an kum 50-na an lawm a, chutah chuan Dumkhal Lui kam vel khu kan Chief Minister-in tuin a lak hek nasat zia a hmu a, 'Pu Rin, Department bia la, project lo siam tir la, central sorkar-ah kan hotuten project lian pakhatmah kan la nei lo, Soil and Water Conservation hnuaiah hian bawhzui a nih theihna tur in,' a ti a. Chutichuan lehkha ka ziak a, anni pawhin an han buaipui a. Mahse hun rei tak, project kha an lo siam thiam reng reng lo mai

a, Director in min chhan dan khan, 'project siam thiam kan nei lova, kan training tir zet,' a ti a. An training tir hnu chuan project te chu an han siam ve ta a, vaibelchhe 75 vel chu an siam ve awm e. Amaherawhchu, an bawhzui hlawhtling hleithei lova. Chuvang chuan, tuna kan Minister thar hian min bawhzui sak sela thain ka hria a. Khulaiah khuan leilet zau tak a awm a. A ram lei khu balu lei a nih avangin tuihawk luangin nasa takin leilet-te a la hek a ni tih kha ka han tarlang duh a.

Chutih rual chuan Soil & Water Conservation Department hnuaiah hian rubber dah a ni a. Kan mipuiten a that zia an hrechiang a. Keini bial Serlui bial angah te chuan nasa takin kuhva an ching a. Kuhva chingtu tam takte pawh khuan rubber hi a tha dawn a ni tih hriain an ram awlah te chuan kuhva lampangah hma la chhonzawm lehin, Soil & Water Conservation hnuaiah rubber hi tihtakzeta tihchhoh an tum tan leh tawh a. Phaisen khua te chuan hmannah an rawn kal a, a huhovin 'cluster in siam kan duh a, hma min lakpui rawh' te an rawn ti a. Bilkhawthlirin a huhovin an siam tan tawh bawh a. Chutiang chuan khaw hrang hrang khuan siam an duh tawh a. Chuvang chuan hun lokal leh zel turah tun dinhmunah chuan pawisa dah te pawh ala tam lo maithei a. Tunhma atangin rubber chi tha, tuna kan chin thin ang hi lo ching tan tawh chu ni ila Mizoram mipuiten nasa takin kan tangkaipuiin, sum leh pai pawh kan neih tam phah ang a, project te pawh nasa takin kan titam thei dawnin ka ring a, chu chu ka han tarlang a ni.

Forests Department hnuaiah hian ka tarlan duh chu Mizoram U.T. hunlai khan Cachar nena kan inrina lai bawr vela Mizoram chhunga teak thing te Cachar Forest-in enkawl turin an ti niawmin ka lo hria a (ka hriatsual loh chuan). Kum 1972-ah U.T. kan ni a, tunah 2016 kan chuangkai tawh a, Cachar-in Mizoram forest an enkawl khu kan buaina tam ber niin ka hria. Mizoram sorkar hian enkawl ta sela chu kan buaina tam zawk hi kan sukiangin

ka ring. Ramri vela kan buaina reng reng lo intannin hi chu Cachar Forest hovin silai nen, Police te nenrawn tibuai kan mi te pawh man fo an ni a. Chutiangte a nih avang chuan Mizoram sorkar hian kan area chunganga forest te hi chu enkawl ta ila chuan kan harsatna awm fo thin hi sutkian theih a nih ka ring. Kan Minister-te demand hi pass turin karawn thlawp a ni e. Ka lawm e.

DEPUTY SPEAKER : Pu John Siamkunga

Pu JOHN SIAMKUNGA : Pu Deputy Speaker, vawiina kan demand sawi tur kan Minister zahawm tak tak pahnihte demand hi cheng maktaduai sangli zanga sawmriat pathum lai a ni a, a tam tham khawp mai a. Chuvangin, sawi pawh a nuam hlein a phurawm hle a ni.

Ka han sawi hmasak ber duh chu demand no. 28-na Labour & Employment chungchang hi. Nimina kan Minister zahawm takin zawhna a chhanna ah khan Mizoram-ah hna zawnglai in register mipa 21170 an awm a, hmeichhia 15759, an vaiin 36929 hna zawnglai an ni a. Khami kan hmuh khan kan lo va tam em ve aw tih te ka thinlungah a lo lut a. Hna hmu lova vei vei leh, thalai hna zawng mek kan lo tam zia te kan hmuh khan engatinge heti em em a hna hmulo kan lo tam le tih te ka ngaihtuah chhuak rum rum a. Amaherawhchu, kan zawng zau deuh a, India ramah hian eng dinhmunah nge kan din tih te kan en zau deuh a, Labour Bureau Director General Daljit Singha'n 2012-2013 inkara survey an lo beihna, employment & unemployment report ka han en a, chu chu an pharh hlim deuh mai a ni a, nimin lam kha niin ka hria, financial express-ah khan chiang deuhvin a lo lang a. Khami atanga kan chhut erawh kha chuan Mizoram hi a titha pawl tak kan lo niin hna hmulo kha kan lo ziaawm hle zawk mai hian a lang a. Thalai hna hmu lo ngah zingah chuan Sikkim hi a ngah ber an lo la ni tlat mai a, 136% lai an lo ni, a dawttuah chuan Arunachal Pradesh an ni a, 130%, tichuan Tripura-in a dawt a, Goa-in a la

dawt leh a ni. Goa te pawh unemployment problem nasa hle lo tura kan lo ngaih laiin keini ai chuan an lo nasa hle a ni tih kha a hriat a.

Tin, kum 15 – 29 inkar hna hmu loah khan Chhatishgarh kha unemployment problem nei te ber an ni a, pahnihnaah Karnataka niin Mizoram hi thalai hna hmulo tlemnaah chuan 5 (panga) na kan ni a ni. Chumi a nih avang chuan kan sorkar hi a fak tlak mang e, theihtawpin hma a la a, Labour & Employment Department hnuaiyah Youth Commission-te dinin hna nasa takin a zawn sak a, hmun hrang hrangah awmze neiin a thawnychhuak a. Chutianga a tihna zarte chu a ni ngeiin ka ring a, vawiinah hetiang a India ram state hrang hrangte tehkhawngah pawh a sang pawl, hna hmulo tlemnaah a sang pawl 5 (panga)-na lai kan lo la ni phak hi a lawmawm hlein ka hria a.

Mahse, chutih ruala ka sawi duh chu tunlai hian T.V scroll-ah te hian an rawn tilang a, Singapore velah te awmpui tur an duh nasat zia te, khawchhak lampangah an thawm theih dan te an rawn sawi a. Thlakhatah ₹ 25,000/- hlawhin an ruai thei a ni tih te itawm takin an rawn tarlang a, kan thalai tam tak khatiang beiseia zi mum mum hi an awm a ni. Chung mite chuan khawilai lai emaw hi an pan a, khawilai lai emawah hian training an pe a, skype or imo hmangin nge ka hre lo, an han inbiak tir vel a, chumi hmang chuan an in thawnychhuak thin niawm ten ka lo hria a. Hei hi thil tha tak niawma a lan rual hian bihchian deuh a ngai em aw? Khawilayah emaw kan mite kan inthawn chho puk puk ang a, a hnuah kan buaipui ngai zek te hi an ni thei ang em tih ka ngaihtuah a. Singapore-ah te pawh kan en zel chhin a, hna hmulo hi an lo la tam ve em em tho a ni, unemployment problem a lo nasa ve tho a, tunah khian ram tereuh te ti lo chuan mi 94600 lai khi hna zawng ve tho an lo la ni tih te kha a lo lang a.

Tin, Malaysia lamah te pawh thawn chhoh theih an ni a, awmpui tur an duh tam khawp mai an tih laiin khilalah pawh hna hmulo khi 3.2% lai an lo la ni ve tho va. Chuvangin, kan thil tih turah hian kan chian tawh a pawimawh hle a, khang thalai rual eizawng tura hmun danga kan thawnchhuak kha a sual ka tihna a ni reng reng lo, a him tawh em tih erawh hi chu kan enpui a ngai mang e aw tih kha ka'n ngaihtuah deuh a.

Tin, nimirah kan Minister zahawm tak chhannaah khan minimum wages chungchang a rawn chhang a. Unskilled te, semi skilled, skilled-II tih te an hlawh tihsan tum a lo ni a, rawtna te an lo siam mek a ni tih han hriat khan he sorkarin tlema hlawh hnuai zawkte pawh khai chhoh zel tumin nasa takin a beia, a hlawh tlem unskilled te pawh ₹ 50/- laiin nitin hlawh tihpun tura rawtna te a lo awm a, a then ₹ 60/-, a then ₹ 80/- in. Khang te kha kan sorkarin hma a lakna ropui tak niin ka hria a, kha kha ka'n sawi duh a.

A pahnihaah chuan demand no.17-na Food, Civil Supplies & Consumer Affairs chungchang tawite sawi ka duh a. Food security hi kan sorkarin huaisen takin a han kal tlangpui ta a. Tunah hian food security ang chuan mi pakhatin kg 5 thla khat tla turin an rawn ruahman a ni. Chumi chu kan tla lo tih hi mitinin kan hre vek a. Chumi a nih avang chuan kan sorkar chak tak hian kg 3 hi chu i subsidy tel leh mai ang u tiin kg-ah 15/- in a pek belh dawn a ni. A lawmawm tak zet a ni, hei hi mipuiin kan hriatchian pawh a pawimawh tak zet. Mi pakhatin kg 5 chauh hi a ni food security-a kan chan tur chu. Ama'rawhchu, kan sorkar in a thlawnin kg 3 min la pek belh dawn a. Chutichuan mi pakhat tla tawh a thla khat tla hi ₹60/- in kan lei thei tawh dawn tihna a ni. Kuhva ei thin te chuan pack 2/3 vel lek man khan thla khat tla buhfai an lo lei thei tawh dawn tih a Chiang a. Chuvangin, kan sorkarin hetiang a huai taka hma a la leh food security mai bakah subsidy-a kg 3 zel mi nuai 7 chuang an han pe tur hi ropui tak a ni. Sorkar tha a ni tih kha a Chiang hlein ka hria.

Tin, chutih rual chuan food storage leh ware housing chungchang tawite sawi ka duh a. Thingsai-ah kan godown min rawn repair sak dawn a, concerned Minister hnenah pawh lawmthu ka sawi a. Chutih rualin Tarphe godown khi a chhe khawp mai a, khaw 3 a chawm ve a. Tunah pheih chuan dah ngaihna a awm tawh loh avangin hall-ah an in sawn lut tawh a. Godown thla te ka han la a, ka han kal chilh vek a, tihngaihna thlawt a awm tawh lo a ni. Hei hi kan Minister hian min lo hriat sak sela, tunah chuan community hall-ah kan dah mek a. Tunlai hian Tuiphai Group YMA inkhawmpui a nih avangin hmun dangah an han suanchhuak leh rih a. Chutiang chuan kan buai angreng khawp mai a. Tin, Cherhlun te pawh a hlui tawhin a upa tawh a. Kan Minister zahawm takin min lo chhinchhiah sak sela tih kha kan sawi tel duh bawk a.

Tin, Transport chungchang hi Pu Deputy Speaker, han sawi belh ka duh a. Taxi chungchang te kan member zahawm tak tak ten an lo chhui tawh a. Kan hriat atana pawimawh ka tih chu heng public service reng reng hi public convenience atana tih a ni, public tibuai tura tih a ni reng reng lo. Public convenience an nih loh a, public tana an hnawh chinah chuan sorkar hian an kal dan tur hi a rel dawn lawm ni tih hi ka ngaihdan a ni. Mimal thil chu ka va sawi thei lo. Ka mimal ngaihdanah chuan mipuite chet awlsam zawkna tura kan tih ten chet awlsam lohna an rawn siam tawh a, an tam luat avanga mipui kan buai tawh si chuan sorkar tha chuan a tih tur kha a ti mai dawn lawm ni tih kha kei ka ngaihdan zawk a ni. Chuvangin, public convenience ni lo a, public tana hnawksak an lo nih tawh chin awm thei te a nih ngai chuan kha kha uluk zawkin sorkarin a ngaihtuah a, public tana tlema hnawksak leh chet velna awlsam lo zawnga daltu an lo nih chuan sorkar thu tlukna hi kan ngaihpawimawh thiam te hi a tha lawm ni tih kha ka mimal ngaihdan a ni a, ka'n sawi chiang duh a.

Tin, motor hire man te sorkarin kan control loh Association hrang hrang han awm ta te hi a pawh khawp mai a. Hengah te hian kan hiring charge hi a inang lova. Kilometre khatah cheng chuti zat bithliah deuh tawp tawp te a awm a ni. Keini thingtlang hla lam bialtu tan pheih chuan a hrehawm duh khawp mai a. Ruang kan han inthawn a,

ruang pakhat thawn nan singkhat dawn kan han hmang thin te hi chu kan hlawh hi a tibuai nasa a ni. Kan bill let thei tawh si lova, kan hlawh atang liau liaua kan pek kha a lo ni tawh thin a. Khang kha kan harsatna a ni. Chuvangin, heng mipui mimirin kan hman tur hire tura rawn chhawp chhuah te pawh hi a rate hian awmzia awm sela. Tin, anmahni duh dan dan a chhewp tawp tawp lo deuh te hian kal theih ni sela a tha lawm ni tih kha ka sawi tel duh baw k a.

Tin, rail broad gauge kha Bairabi ah kan sorkar chak tak hian a hruai lut ta ruau mai a. Kan Minister te, kan Parliamentary Secretary te leh bialtu ten an lo hmuak a. Chu chu kan hre vek a, hei hi hlawhtlinna ropui tak niin ka hria. Tin, chutih rualin nichinah kan Minister zahawm takin 2019-ah chuan Sairang rawn thlen tir tum a ni tiin min hrilh' a tih lai tak mai kha. Compensation chungchangah hian kan buai nasa tawh a Mizoram hi, compensation a awm a te chuan, a phu chuan an la ngei tur ni. Phai ram nen tehkhin theih kan ni lo, phai ramah chuan an eizawna pi pu atanga an lo neih, an enkawl lai, an ui ngawih ngawih tap chung a an thlahliam te a ni, sorkarin a laksak chuan. Laksak lo thei se tia an ngen ngawih ngawih, an ui ngawih ngawih, an inngahna, an intunnunna a ni. Chung te chu square Ft-ah lo to deuh se a awm a ni. Ram lak dan thar an siam te pawh kha tlemin lo sang deuh mahse a awm tho. Mahse, keiniyah chuan chulai hmunah chuan ram enkawl reng reng lo ten square ft a ₹ 200/- kan han chhiar dawrh thin te hi chu ram thanmawh baw k chu a tling a ni, a dik thei lo. Chuvangin, kan enkawl lai, kan intunnun nan tak tak kha ram kha kan hmang a nih chuan thu hran. Ni reng reng lo, tute remhriat avanga kan lo neih ve ngawt, sorkar ei tum reng reng niawm taka square ft a man sang pui pui kan han ti te hi chu ram hmangaihna thinlung pu atang chuan a paw i tak zet a ni tih kha ka'n sawi tel duh a.

Pu Deputy Speaker, tlem te Tourism hi kan sawi lawk, khawngaihni i phalnain. Tourism-in infrastructure lampang te kan nei tha ve angreng tawh viau va. Chutih laiin eco-tourism hi tourist-te hiptu tur ber a ni a. Chulaiah chuan pawimawh bera

kan hriat tak ber chu mikhual kan chhawn thiam lo thin a tun hma chuan, tunah chuan kan chhawn thiam sawt tawh khawp. Hei aia chhawn thiam hi kan la zir leh pawh a ngai.

Tin, chumai ni lo, ei tur ah pawh hian kan hip tel a ngai a ni. Vawiina kan kal dan hi a dik lovin ka hria. Khawiah emaw kan han zin a, khawilai hotel emaw ah kan han chawl a. Kan han enzui reng a, kan chawhmeh ngei mai kha a belpui a an han chhung ri burh mai han hriat te hian ei leh hi a chakawm tawh lo reng reng. Chuvangin, khawvel changkang apiangah ei in an duh ulukin a changkang a. Keinin a chhunpawlh, a thing te, mi ei hnu te nena chhunpawlh, hotel a min han chhawp leh mai thin hi chu ramdang mi lo zin lutte tan hian ei chi a ni dawn em aw tih te ka ngaihtuah thin. Chuvangin, tourist hi hip kan tum a, theihtawpin kan bei a. Tin, kan Minister te pawh an tang, kawng hrang hrangin hma an la. Ama'rawhchu, keini a mipuite, heti lama hotel industry lam 'run' tute hian thianghlim zawk, tui zawk, changkang zawka kan siam a; a eitu tur ten lungdam zan leh chak taka an ei theih tura kan siam te hi ava tul em tih kha ka'n sawi tel duh a ni e. Pu Deputy Speaker, heng Minister pahnihte (2) chanpual ka rawn sawi te kha ka thlawp a ni tih ka sawi tel duh a, ka lawm e.

DEPUTY SPEAKER : Pi Vanlalawmpuii Chawngthu a phar hmasa a, kan sawm hmasa ang a, a dawtah Pu Hmingdailova Kiangte. Pi Vanlalawmpuii.

Pi VANLALAWMPUII CHAWNGTHU : Pu Deputy Speaker, ka lawm e. Demand No.17-na Food, Civil Supplies & Consumer Affairs department ah khan sawi ve ka duh chu Food Security Act hman hnua mipui ten ration kan lak lo pung ta leh mipuite lawm ka ngaihtuah hian opposition party kan nih laia mau a lo tam khan, Central sorkar atanga sum tam tham tak kan dawn BAFFACOS sum kha a luanralna mipuiin kan hre vek a. Chumi a nih rual chuan Congress thalaite khan a thlawnin Congress Bhavan, kan office-ah buhfaite kan sem a ni. Khang hunlai te kha min tihrechhuak a.

Mihring nih chung chuan mitinin thil tihsual kan nei lo thei lova. Hemi ration card chungchangah pawh department chuan tihdikloh chu an nei meuh mai. Amaherawhchu, hemi chungchangah pawh hian Minister zahawm takin, 'tithat leh nghal tur a ni e' tiin House chung ngeiah a rawn sawi a, lawmawm ka ti a. Tin, chhungkua angin chhut ta ila, chhungkua member 5-ah Food Security Act hman hmain 28 kg member 5 in kan la thei a, chu chu ₹420/- in kan lei thin a ni. Hemi Food Security Act kan hman hnu hi chuan member 5 ah 40 kgs la-in ₹/-300 in kan lei thei tawh a, hei hi a lawmawm tak zet a, Minister chak tak hmalakna hi a lawmawm ka ti a. Tin, mipuite pawh kan lawmin ka hria a. Chumi a nih rualin ration card diklo te a rang thei ang berin siam that ni se tih kha ka rawn sawi tel ve leh duh a.

Kan hotute'n an rawn sawi tawh a, mega-block chungchangah te, kan Minister a chak a. Mega-block avangin buaina kan tawh lova, buhfai nghei kan nei lova. Tin, mi dang dang pawhin an rawn sawi tawh a, buhfai leh gas lak theih tih thawm kan hria kan hria a ni. Sawi leh thin ila, opposition party kan nih lai khan Congress Bhavan hnuaiah zan khaw tlaivarin, chain nen kan gas bur thlungin kan nghak tlaivar thin a nih kha. Tunah chutiang awm tawh lovin, veng tinah gas lak theih tih thawm kan hre reng a. Chuvang chuan, he Congress kaihruai sorkar hi a chak hle a, a enkawltu Minister pawh in fak a phu hlein ka hria.

Demand no.42-na, Transport Department chungchang kha sawi leh ila. Taxi rate chungchang kha ka han sawi ve duh a. Hotute duhsaknain kei pawh STA member-ah ka awm thin a. STA memberte hian taxi rate hi an fix tur a ni a, chumi a nih lai chuan taxi driver leh a neitute'n an duh duhin a rate kha min fix sak thin a ni. Chuvangchuan, a changtute hian khawngaih takin rate in fix hi dik taka kalpui a nih theih nan hma la thei ula tih ka rawn ngen ve duh a. Tin, kan Minister chak takin ram tana tha tur nia a hriatah chuan rate chungchangah a ni emaw, Transport Department-ah thu hrang hrang kan hre thin a, ram tana tha tur a nih chuan huaisen taka a kalpui thin hi fakawm ka ti bawh a.

Tin, khawpuiah traffic jam kan sawi thin a, intlanchhawk tih te mi tam takin an sawisel a. Mahse state dangah pawh kan hria a, Delhi khawpui ngeiah pawh tih a ni a. Chumi a nih rual chuan sawiseltu tam tak an awm a ni. Sawiseltu hi chu a awm loh theihloh. Kan vote hmuhna tur leh a lehpeka sorkarna tur lam ngaihtuah lova ram tana tha tur a ni ti a thil a kalpui thin avang hian kan Minister hian fak a phu hlein ka hria a ni.

Tin, chu mi rual chuan traffic a jam a, Aizawl khawpui a tawt a, two-wheeler taxi hi introduce theih ni ta sela chuan, entirnan, hmeichhe scooty khalhte pawh tam tak an awm tawh a. Hmeichhe khalhah hmeichhiain hire theih emaw, taxi kan hmang thei ang hian, mipa khalhah mipa. Chutiang chuan traffic jam te hi a solve theih lawm ni, introduce theih a ni em tih te kha ka rawn sawi tel ve duh a.

Tin, sumo te route bik neia permit an han pechhuak thei te hi fakawmin ka hria a. Tunhma kha chuan sumo permit te kan han pe mawp mawp a, Mizoram pum duh lai lai, kawng tha lai laiah kan tlan kual a, route bik nei lovin. Khatiang ni tawh lovin tunah chuan route bik neia permit an pe thin te hi an fakawm hle bawk a ni.

Tourism chungchang sawi leh ila, demand no.43 ah khan. Kan Tourist Lodge kan han privatize thei te hi lawmawm ka ti a, sum indaihlohna a nasat hle laiin. Chumi rualin, Tourist Lodge thlen man hi engatinge a to bik riau? Kan thleng tha ngam lo a ni. Thingtlang hmun hrang hrang zinnaah pawh, keini, party anga kan zin te in emaw, Congress thalai anga kan zin te pawhin, a huhoa zin hluai chang kan nei thin a, chungah chuan a hautak thin a ni. Department dangte angin a rate hi tih hniam ve theih dan a awm em tih kha ka rawn sawi tel ve duh bawk a.

Demand no.28-na, Labour & Employment Department chungchangah khan, a changtu Minister hi fakawm ka ti a. Nichinah midangin an rawn sawi tawh a, thalaite tan inhlawhna tam tak an rawn siam a, Youth Commission kaltlangin chak takin hma an rawn la a, Mizo thalai eizawna nei lo te'n ram dangah eizawna te kan neih

phah a. Tin, thiam thil training na tur kawng hrang hrang min kawhhmuh a, anni kal tlang hian Mizo thalaite hian eizawna tam tak kan hmu tawh a ni. Chuvang chuan he department hi fakawmin ka hria a ni.

Tin, Demand no.36-na, Environment & Forests Department- ah khan Minister leh a thawhpuite'n NGO te an han thawhpui thei hi a lawmawmin, nachang an hria ka ti a. Entirnan, Green Mizoram Day chungchangah te emaw, thing leh mau humhalh chungchangah te Minister leh a thawhpuite'n NGOs, YMA, MHIP ang te thawhpuia an han neite hi an fakawm a. Hetiang hi department dang te pawhin ching ve se tih hi ka rawn sawi lang ve duh a. Tin, Forest department changtu Minister chungah lawmthu ka sawi duh a. A bik takin kan bial Hrangturzo bialah chuan riahna hmun kan neihlohna khuaah te Forest Rest House te min sak sak a, tin, Forest quarter te min sak sakin thil tam tak min tihsak a, a chungah lawmthu ka sawi baw a.

Chumi rual chuan nichinah oppositon MLA Pu K. Sangthuama khan teak hralh chungchang kha a rawn sawi a. Keini pawh hei hi kan problem a ni a, chhungkua ang pawhin, 'Tar chawmah' tiin kan naupan lai atangin ka pa-in teak a phun teuh a, tikhuan huanah a awm teuh mai a, tihngaihna a awm lova. Teak hralh dan te hi ngaihtuah theih ni se tih kha ka'n rawn thlawp ve baw a. Mi tam tak chutiang chu an awm a ni. Chuvangchuan, mahni thing neih pawh hmang theilo leh hralh thei lova kan awm reng hi fuh lovin ka hria a. Tin, Green Mizoram Day hman dan chungchangah te, district hrang hrangah hun pawimawh tak hmangin, zirtirna awareness an nei thin te hi lawmawm ka ti a. Hengah te hian department te hi an fakawm hle a ni.

Pu Deputy Speaker, heng Minister zahawm tak tak pahnihte demand hi pass ngei turin ka rawn thlawp a ni e. Ka lawm e.

DEPUTY SPEAKER : Pu Hmingdailova Khiangte i lo sawm ang.

Pu HMINGDAILOVA KHIANGTE : Pu Deputy Speaker, ka lawm e. A hmasa berin demand no.17-na, Food, Civil Supply & Consumer Affairs-ah hian sawi tur a tam hle mai a. Amaherawhchu, point hnih khat, ha-hawlh deuh te ka han sawi chhuak phawt ang a.

A hmasa ber in rail kawng lian an siam dawn tum khan, rei tawk supply te thleng theilo tur hian mega-block an tih kha, kha mi chung kha Mizoram ah, a tel lova kan awm theih loh domestic gas te leh thil dang dang harsa miah lova kan Supply Minister-in theihtawp a chhuah avanga Zoram a buai lo kha a ropui ka tiin a fak tlakin ka hria a. Tin, Food Corporation of India-in buhfai hi kumtin a ni mai a, a chang chuan kum khatah vawikhat aia tam buhfai man a tito chho zel a, chumi avoid nan chuan Burma ramah te a han zin a, Burma ram atang pawh khan an hmu thei tho na chungin a man kha a lo to bawk si a. Burma ram buhfai aia tlawm zawk, FCI bufai aia tlawm zawk bawk, a quality chhe chuang si lo min han ngaihtuahsak te kha a ropui ka ti a, sawi loh theih loh niin ka hria. Tin, food security changtuten a hlawk zia chu an hriain ka ring a, a tlawma lei theiin Kg 30 ₹90-a an lei ngawt mai chu a ropui hlein ka hria a. Tin, chumai ni lovin a tlawma lei thei rih lo kha, a tha lam zawngin a tlawm lo pawha lei thei hote ta tur food security-in an siam leh vek thei hi amah chang lo, kan House Leader te hian Mizoram tana hetiang an buatsaih hi a ropui hlein ka hria a, a vanneih thlak a, mi zawng zawng tan thil tha a ni tih kha a chiang sa reng mai.

Tin, demand 42-naah hian thui tak sawi tur a awm, taxi te, sumo te, nichina kan memberpui zahawm tak Pu John Siamkunga sawi kha dik hlein ka hria a, Taxi te hi an tam lu ta deuh a ni a, sumo te pawh an tam lu ta deuh a nih chuan, an tam lutuk e kan tih awmzia tak chu public tana problem an tlin takah chuan sorkarin hma a lak loh chuan tunge la chuang ang tih kha a dik tawk hlein ka hria a. Chuvangchuan kan sorkarin, kan Minister changtu kaltingin huaisen taka hetiang a hna an thawk hi a ropui ka ti.

Tin, ka sawi leh duh chu, tukinah khan chanchinbu ka chhiar a, Aizawl leh Lunglei inkarah Air Condition Bus a kal dawn ta an tih kha a ropui ka tiin lawmawm ka ti hle mai a. Chutah chuan han sawi belh ka duh chu, Aizawl atanga Silchar, Shillong leh Guwahati-ah te kan Bus hi chu a kal ngei tak na a, private bus aia chuan nuam, man to zawk bik si lo hian kan Minister chak tak hian a ruahman thei dawn lawm maw ni chu aw tih ngaihtuahna ka nei deuh a. Sumo-a chuan te chu a nawm loh zia te kan hre tlang tho a. Private bus-in kan passenger te an la vek reng mai hi kan sorkar bus hian a la ve thei lawm ni? Chuan nuam deuh zawka an siam chuan tih hi ka ngaihtuah reng bawk a ni.

Tin, pakhat leh ah chuan Tourism kha demand 34-na a ni a, sawi tur a tam hle nachungin point hnih chiah ka sawi ang a. Pakhat chu privatization kan tih lai mek hi huaisen takin kalpui zel se tha ka ti a. Tin, Tourist Lodge-ah Sunday leh holiday-a eitur awm mang lo hi kan Minister zahawm tak hian rem a ruat thei em aw ka ti. Keini vak vel ten remchangah kan han lut a, holiday leh Sunday te a ni a, eitur awm mang lo hi a manganthlak angreng khawpin ka hria. Chu chu min lo hriatsak sela tih kha ka ngen duh a ni.

Tin, demand 28-ah kai ila, Labour & Employment Department hi mipui nawlpui kan hre lar lutuk lovin ka hria a, kan hriat ber hi chu Employment Exchange hi a ni mai a, Pu Deputy Speaker. Amaherawhchu tunlai hi chuan Labour & Employment Department hi a changtupa kan Minister zahawm tak hian a awp thiam em a, an fachuam ni awm tak MYC te hi an tha a chhawr thiam hle niin ka hria. Mizoram Youth Commission (MYC) hnathawh ngaihthlak a nuam a, chhiar a nuam bawk a ni. A detail chu kan sawi seng lo ang a, mi tam tak lehkhah zir sang lem lo te pawhin employment tha tak tak an neih phah tih kan hria. Tin, hna an hmuh theihna turin kawng tinrengin an guide mek bawk a. Tunah pheih chuan All India Civil Service Officer nih theihna te an han hawng lehngal a, hengah hian kan thalai ten theihtawpa Delhi te pawisa tam tak tak, nuai 3, nuai 4, nuai 5 senga kal ngai lovin hemi hmunah hian Coaching Class a awm ve a

ni tih an hriat hi a tha in ka hria a. coaching class free of cost a lo awm thin kha a lawmawm hle nachungin keini Mizote hian man nei lo, free of cost ang chi hi kan ngaisang lo deuh ni awm tak a ni. Man to deuh te hi kan ngaisang a, chuang chuan a fee te hi to deuh sela a hlawk zawkin ka ring a ni, mipui tan leh kan ram tan hian tih te kha ka sawi duh a.

Tin, demand 36-na Environment & Forest Department hi sawi dawn ta ila. Hna an thawk nasa si a, an cover a zau bawk si a, kan sawi seng lo ang a, minute 10 kan neih chhung pawh hian a daih dawn lo a ni. Amaherawchu, ka sawi duh lai tak chu, kan ram kan hria a, tuihna awmsa te a kang a. Chuangchuan, thingtlanga kan tuikhur tlan kan khamkhawp ta lo deuh vek mai. Chung ho tana tui hna humhalh hna te PHE nen tang hoa an bei hi a ropui ka ti a. Tin, chu lo lehah chuan ram a kan lohna tura forest tihputlin leh tihzauh an tumna, kangmei hlauhawm zia awareness te namen loa an han organise hi a ropui a. Kumin phei chu hei, anmahni organise vang em ni aw, ramhnuaiiah kangmei hmuh tur a vang viau mai a, lawmawm hlein ka hria a. Kan hriat angin Mizoram hi kangmei lamah hian kan changkang viau ti dawn ila, kan nikhua lo viau ti zawk ila a dik zawk awm e. Mizoram hian kan House Leader sawi angin top nihna duhawm lo tak tak kan nei a, kan neih pakhat chu kangmeiah hian kan top bawk a. Kan ram hi India ram len zawng atanga 1% pawh a tling lo a, chuti chung chuan 13% aia tam India rama kangmei kan lo tum ve a nih chu.

A dawt lehah chuan N.E-ah state pariat kan awm a, N.E. state-a kangmei chhuak $\frac{1}{3}$ hi kan lo tum pek a ni. Chuangchuan kan fimkhur hle a ngai a, amaherawhchu, kan House Leader zahawm tak hian Feb 10- ah kangmei hlauhawmzia awareness thiam tak leh ngaihnam takin a sawi a. Tin, District Headquarter tinah tiang kha an lo nei bawk a, kori a tu hlein ka hria a, kuminah kangmei rapthlak tak sawi tur a awm lo hi a lawmawm hlein ka hria.

A tawp berah chuan demand no.37-na hi ka sawi deuh fo thin a, Mizoramah hian society din hi kan thiam lova. Mizote hi rilru tha (positive mind) kan inti a, kan insawi tha viau a ni. Amaherawhchu society din hi kan thiam tlat lo mai a, keimahni ni lo, vai ti mai ang aw, hengho te hi an rilru tha lo leh sual tein kan sawi fo mai a. Mahse, society din hi an thiam viau mai a, an hlawk viau a ni. Mizote hian zir tur kan ngah khawp mai a, ti ringawt hi chuan kan zir vak dawnin ka hre si lo a. Kan Minister zahawm tak a changtu hian Mizoten society kan din a, Co-operative Society tha tak khaw tinah kan nei a, Aizawl-ah hmun tam tak kan nei a, kan hlawk theihna tur hi an ngaihtuah chhuak thei thoin ka ring a. Heti lamah hian min motivate sela, min encourage-in min guide bawk sela tih te ka ngaihtuah a, ka rawn sawichhuak a ni.

Tichuan Pu Deputy Speaker, demand no. 17, 42, 43, 28, 36, 37 kan Minister zahawm tak te pahnih demand te hi he House zahawm tak hian phur taka pass chi niin ka hria a, ka rawn support a ni e. Ka lawm e.

DEPUTY SPEAKER : Awle, dar khat chu a la ri lo deuh hlek a, amaherawhchu han sawina hun member-te tan a awm tawh lo a. Kan chawl hma hret mai ang a, dar hnihah kan lut leh dawn nia.

1:00 Pm : RECESS

2:00 Pm

DEPUTY SPEAKER : Kan demand sawihona kan tan leh tawh ang a. Chawhma lam khan member 6 in an sawi hman a. Tunge han tan leh ang le? Pu Robiaka ka hmu hmasa a, a dawtah Pu Ngurdinga.

Pu LALROBIAKA : Pu Deputy Speaker, ka lawm e. Vawiinah kan Minister zahawm tak takte pahnih demand kan han sawi a. An demand atanga kan sum neih dan han chhut hian a tha tawk len lawn viauin ka hria a, khati lam kha chu thui sawi

lo ila. Chutih rual chuan demand no. 17, Food, Civil Supplies & Consumer Affairs Department ah hian sawi ka'n duh chu, kan Minister zahawm tak hi a zam a tha a. Mega block kan nei dawn a ni tih te kan han hriat khan a ram nghinin kan nghing a. Engtingge keini ram kilkhawr, ram mawngping hian hma kan lak ang, tiin nasa takin ngaihtuahna a awm a. Zan leh hun leh hunlo pawh sawi lovin Champhai-ah kalin Tiau truck-ah te (Tiau truck in hmuin ka ring a) chuang chhoin Tiddim-ah, Tahan-ah chutiang chuan permission pawh hmu fumfe lovin kan mipuite hmangaihna avangin a han kal vawn vawn a ni a. Hetiang Minister fit tak kan nei hi a lawmawmin ka hria a.

Chutih rual chuan, mihring hi fel tak pawh, hmeltha tak pawh hi tlin lohna leh mawi lohna te pawh hi kan nei ve zel a. A tha a awm rualin a chhia a awm a, side A a awm chuan side B a awm zel a. Chutiang mihring chu kan nih avangin kan lal ber Lal Isua pawh kha a mi thlanten an khengbet ve tho kha a ni a. Chutih rual chuan hei, Food Security Act kan han hman chhoh dawnah hian harsatna neuh neuh te a awm ve a. Chutah chuan a Minister te pawh kha pawl thenkhat chuan ban turin Chief Minister-ah te pawh khan an ziak niin ka hria a. Hetiang hi a pawl khawpin ka hria a. Constructive zawnga kan in tanpui theih si loh chuan ngawih mai te hi kan tih tur ni awm tak niin ka'n ngai a, kha lai kha ka'n sawi duh hrim hrim a. Tin, mipui nuai 11 awm zingah nuai 7 vel lek han thlan chhuah te pawh kha thil har tak turte pawh a ni hrim hrim a ni tih hi ka'n sawi duh a. Tin, khang lo ti veltu tur atan te pawh khan sorkar hnathawk ni kher lo te pawh casual-in an la a, an han ti nawk nawk kha a ni a. A nawmna lai chuah hria a, a harsatna lai inhriatpui loh hi thil bias deuh niin ka hria a. Chungte chu ka'n sawi duh a.

Tichuan, helaia ka'n sawilan leh duh chu, mega block a awm dawn a ni tih kan hriat atang khan nichina ka sawi ang khan local purchase te pawh hi ngaihtuah ila tiin foreign thlengin an han kal a ni a. Tichuan local purchase-ah hian thlatin quintal 80000 Mizoram sorkar hian kan lei a ni, 2015 atanga tun thleng hian. Tichuan quintal 80000 hi kg khatah ₹25.75 in kan lei a ni, chutih rual chuan FCI atang hian ₹32 vel bawrin kan lei baw k a. FCI-a kan lei ngaihtuah hian heta tanga han chhut pawh hian

pawisa tam tak kan hlep phawt a, kan harsatna avang khan. Helaia ka rilrua awm han sawilan ka'n duh chu, vawiinah hian thingtlang lama kan loneituten buh an ching lo thei lova. An chin loh theih loh avangin thil dang pawh han ching dawn mahse tih tur dang kan hre chuang lova, kan ei duh baw si avangin heti zawng hian kal ta ila. Tuna local purchase-ah hian ₹25.75-a kan lei theih chuan hetiang vel baw hian kan loneitute atang hian lei theih dan hi ngaihtuah ni ta se, tichuan kan loneitute pawh hian lo neih man, hah man an tel ve tawh dawn a ni. Chutiang zawng chuan ngaihtuahna kan hotute a bik takin kan Minister hian ruahmanna han nei sela a duhawm hle ang tih kha ka'n sawi duh a.

Vawiinah chuan hah takin tlang ram lo kan nei a. Chutih rual chuan a pawisaa kan chhut phei chuan kan thar chhuah hi a man a tam lo hle a ni. Amaherawhchu, hralh theih tura hetiang kan lo tih theih tak rau rau si ah chuan sorkar hian he khua, he hmun atang hian heti zat hi kan la thei ang han ti thei ta mai se, lo neih hi mi tam takin an hreh lovang a, an hlawk tawh ang tih hi kei ka rin dan a ni.

Tawi te tein ka'n sawi ang a. Transport department-ah hian han sawi ve ka'n duh chu, taxi permit hi, taxi tlan dan chungchang ah harsatna kan tawh avangin sawi chhoh a ni a. A sawi apiang khan, ka hmaa sawite khan an sawiin ka hria a. Khalai ah khan engtik hun laia pek nge ni? Eng zat nge an lo pek reng tih kha kan Minister hian House hi min hrih thei sela a va tha awm em tih kha ka'n request duh a.

Tin, Transport department hi hlawkna um hauh lovin kawng hrehawmah an tlan a, kawng chhe tak takah te an tlan a. Chutih rual chuan a thawktute hi an fakawm hlein ka hria a. An kalnaah hian khuar te pawh a lo tam, a quality te pawh a lo inang lova, an motor te a lo hlui tawh nen, an chhiat changte pawhin harsatna tam tak an tawh thin a. A khuate pawhin lo buaipui nachang hriat lohna hmunah te pawh an awm a ni. Chutih rual chuan tun thleng hian kan driver te, kan conductor te, tunhma te kha chuan MST driver han tih kha chuan, a, kan hrethiam maiin ka ring. Tunah hi chuan an zin dawn pawhin khawi kawiah pawh han tawngtai thei mai te hi an ni tawh a ni. Mipui

pawh an thlamuang, heng avangte hian a lawmawm ka ti a, ka fak duh hrim hrim a. Nasa lehzualin, tha lehzualin hma han la thei se a lawmawm ngawt ang tih ka'n sawi duh a.

Chutih rual chuan kan bialah kan rilru leh kan ngaihtuahna a kan thlir phak loh kudam tha tak tak W. Phaileng-ah te, Silsuri-ah te, Kanghmun-ah te min han sak sak a, a tha hle mai a. Khung Silsuri-ah pheii chuan kan inhme lo e an tih tur khawpa tha kan han nei hi a lawmawm hlein ka hria a. A bik takin Silsuri-ah khuan harsatna kan nei thin a, kawng tha lo nen. Lawng han hmang dawn sela, BSF in an lo phal lo tumhrang tawh baw si nen. Chutiang hmunah chuan fur-ah engtik lai pawha lak theih turin min han sak sak a, a lawmawm kan ti hle a, a bial ang pawhin lawmthu ka'n sawi duh a ni. Chu mai piah lamah chuan Khawrihnim-ah te, Darlung-ah te, Phuldungsei-ah te, Pukzing-ah te kan staff quarter repair-na tur min han dahsak leh zel te hi a lawmawm ka ti a, kan Minister chungah lawmthu ka'n sawi duh a ni.

Tichuan, demand 43 Tourism Department-ah hian, kan Tourist Lodge ang chi te tam tak kan privatize chho ta a, hei hi kalpui zel theih ni se a tha khawpin ka hria a. Chutih rual chuan kan Minister hi ka'n dem duh deuh a, nikum lamah khan Anthurium Festival, Reiek-a hman thin kha Lengpui-ah a'n dah daih mai a, khatiang kha chu a tha lo khawpin ka hria. Kan ziaktu lar tak, kan Magistrate pakhat Pu K.L. Liana pheii chuan, 'Lengpui han tih hi chuan ka lung hi a leng thlawt lo a ni,' a ti a. Chuvangin a hmun ngaiah te pawh khan kumthar lamah chuan dah leh turah te pawh han ngai ila. Chumi piahah chuan a bul tumtu pakhat Florist Association te pawh hian, 'khu tah chuan a cheiin a chei theih loh reng reng, a ro rup ringawt mai a, tih ngaihna kan hre lo a ni,' an ti a. Chungte chu min lo hriat sak sela a thain ka ring a.

Chumi piah lamah Tourism-ah hian construction of invention of tourist resorts Reiek tih te, Eco Tourism Reiek tih te min han thun sak hi a lawmawm hle a ni tih kha ka sawi duh baw a ni.

Kal zung zung mai ila, demand no. 28-na Labour and Employment Department-ah hian kan Minister chak takin minimum wages April thlaa hman mai tur te min han chalk out sak hi a lawmawm hlein ka hria a. Hemi chungchang hi ngaihtuah fe a ngai reng a, a chhan chu kan price/kan thil man to chak lutuk te hian kan labour te hi a tihrehawm hle a ni tih hriatpui thiamtu sorkar leh Minister kan nei hi a vanneih thlakin ka hria a. Chumai nilovin an no te Youth Commission-ah te, a te ber (a mawilo lam nilo se, chhiahhlawh ti ila) atangin IAS tih theihna tur thleng zirna te kan han buatsaih leh zel a. Hengte hi kan ram ro tak tak a ni tih hi ka sawi duh a ni.

Demand 33-na Soil & Water Conservation-ah hian kan hriat angin NABARD kaltlangin rubber plantation te ka bialah hma an rawn la dawn a ni tih kan han hria a, khua ang pawhin a bik takin thingtlang te, Kanghmun te an lawm hle a ni tih kha ka sawi duh a. Hnathawktu rinawm leh taima an awm chuan kan sorkar hi an hnungah a ding zel a ni tih hi mipuiin an hre tawh a. Ka bial te pawh hi an phur hle a ni tih kha kan sawi duh a ni.

Tawite kan sawi leh duh chu demand no. 36-na Environment and Forest-ah hian department lam te an thawk tha hlein ka hria a. Amaherawhchu, Tirkhoh Paula sawi ang deuhin ‘ amaherawhchu demna che ka nei’ a tih ang deuh khan a bik takin keini bial Dampa Tiger Reserve hi a veiawm tlat mai a. Tun dinhmun ang zela kan kal chuan reiloteah khulai kan ngaw tha tak khu a chereu vek ang tih hi a hlauhawm hle a ni. Chutiang chu a ni a, chuvangin tunah pawh kan Minister ka request duh chu, tuna kan awm dan angah hi chuan zawngrengtea serthlum veng an sawi ang deuh hlek hian kan kal em aw a tih theih a.

Report chi hrang hrang te pawh kha a awm neuh neuh a, chutiang te chu a ni a, kimchang zawkin kan la sawi turah ngai ila, in fakawm viau lai hian mipui nen inngheng tlat kan nih avangin a chhe lai leh a tha lai te pawh tam tak hre phak kan ni a. Chuvang chuan nasa zawka tan lo la turin kan duh che u a ni.

FCS & CA ah hian a bik taka sawi zawk kan duh chu Legal Metrology Wing ho hi thuan chak an va tha em tih hi ka sawi duh a. Tunah motor te kan han nei a, mahni neih ang ang sawrkhawmin, chungah chuan kan oil leh kan petrol pawlh dal tam ta lutuk te, heng avang hian kan engine a hun lovah a chhia a, chu chuan mipuite sum tam tak min khawhral tir a ni. Chuvangin hei hi tihchak a, khawl changkang zawk te pawh leisak hi an phu em em a ni tih lai kha ka sawi duh a ni e. Heng demand pahnih te hi rilru takin ka support a ni e. Ka lawm e.

DEPUTY SPEAKER : Le, Er. Lalrinawma

Er. LALRINAWMA : Pu Deputy Speaker, ka lawm e. Vawiinah demand te kan han sawiho leh thei a, a lawmawm hlein ka hria a. Vawiina kan demand sawi tur 17-na leh 42-na leh 43-naah hian kumin kan budget a tha kan ti a, nikum hi a pha lo tlat mai, 29 crore velin a pha lova, 18.42% velin nikuma kan Demand for grant kha a pha lo a ni tih kha ka sawi duh a. Supplementary Demand lama rawn chet te kan tum nge ni? Tin, kan Minister zahawm tak Pu Lalrinawma Ralte chanah hian 58 crore vel ngawtin a rawn pha lo bawka, hei hi 3.98 vel a ni a, kan budget that kum ber kan tih laiin kan han dah tlem ta zawk tlat mai lai hi engnge ni ang aw tih kha rilruah a awm deuh a ni.

A hmasa bera ka sawi duh chu demand no. 17-na sawi ta ila, Food, Civil Supplies and Consumer Affairs hi. Member zahawm tak tak te khan mega block te kha an han sawi tliar tliar a, nikum session khan kan sawi tawh nghe nghe a ni. Kan sawi tlai mang e aw ka'n ti deuh a khangte pawh kha a lawmawm a. Tin, keimahni bial chhungah phei chuan kudam hrang hrangte min han sak sak a, Lungpho-ah te, Chhingchhip-ah te. Tin, tuna work programme ah pawh khan Chhiahtlang godown repair te pawh kha a awm lehin ka hria a, khangte pawh kha lawmthu ka'n sawi nghal a. Chutih rual chuan food security beneficiary thlan chungchangah erawh hi chuan kan fimkhur chhoh leh zual hi a tha mang e, hma kan lak tawh reng laiah hian dawng awm tak dawnglo te leh dawng

awmlo tak dawng te pawh an awm niin a lang a, hengte pawh hi hma kan la zel ang a, theihpatawp kan chhuah han beisei phawt ila tih te pawh kha ka'n sawi duh a ni.

Tin, demand 43-na Tourism Department hi sawi ka duh a. Privatization kan han ti a, lawmthu kan sawi lai hian lawmkim rei theih pawh hi a ni lova. Nikum khan privatization chungchangah 13.8.2013 khan tender chhuah a ni a. Hetah hian Tourist Lodge 15 lai hi tih tura hma lak a ni nghe nghe a ni. Heng zingah hian chi hrang hrang te an han chhang a, chutih lai chuan Tourist Lodge 4 lai hi pek lohin a awm ta a, tichuan 7.10.2015 hian expression of interest chhuah leh a ni ta a ni. Tahchuan Tourist Lodge leh tourist facilities hi 8 an rawn tarlang a. Chung zingah chuan a hmaa tender kan chhuah tawh 4 hi an rawn tilang leh ta a ni. Pu Speaker, i phalnain, Travellers Inn Vairengte, Tourist Resort Hmuifang, Tourist Lodge Bairabi leh Highway Restaurant Thingdawl te hi an rawn tilang leh ta a ni. Hetah hian mak ka tih em em mai thil a awm ta a ni, chu thil mak ka tih chu sorkarin sum leh pai a harsa kan ti a, buhfai man kan tito a, chhiah hrang hrang kan la a, chu bakah tui bill te, electric bill te leh additional mobile resource kan ti dawn em ni, chutiang thil hrang hrang hmuh tuma kan beih lai hian, he thilah hian upper ceiling an rawn siam ta tlat mai a ni.

Tahchuan a upper ceiling an rawn siam a, a chhang huai huai tih mai awm tak a nih lai khan a chung lam tur, khami rawn chhangtuten an chhan theihna tur rate sang ber kha an bithliah tlat mai a ni. Hei hi sorkarin chuti taka sum a mamawh lai si a, hetiang a chunglam kan han bithliah tlat mai hi thil mak tak niin ka hria a. Eng danin nge hei hi an tih aw tih ka ngaihtuah a ni. Ka ngaihdan chuan sorkar pawh hian he thilah hian pawisa pawh a hloh turah ka ngai a ni. Entirnan Travellers Inn, Vairengte-ah hian a chhangtu hmasa te hian tender an chhuah lai hian thlakhatah ₹70100 in an chhan laiin hetah upper ceilingah ₹15000 in an bithliah ta a ni. A inthlauhna hi ₹55100 a ni a, kum 3 hnuaah a rate ennawn tur tih a ni a. Hetih laia an expression of interest MoU-a an ziahah hian kum thum chhunga a inthlauhna hi chhut ta ila ₹19,83,000 hi a hloh dawn tih a chiang nghal ta a ni.

Chutiang bawkin Tourist Resort Hmuifang-ah hian a upper ceiling-ah ₹ 15000 bawk a rawn ti leh a. Tender a nih laia rawn chhangtu hian ₹ 50500 in a chhang a, a inthlahna hi ₹ 35,500 a ni. Kum 3 chhunga reviseleh tur an tih avangin kum 3 chhunga an pawisa hloh zat tur hi ₹ 12,78,000 a tling a ni. Chutiang bawkin Highway Restaurant-ah hian sawi leh ta ila, tah hian a upper ceilingah ₹ 5,000/- a rawn ti a. A rawn chhang tupa hian tender a nih laiin ₹ 41,700 in a chhang a ni. A inthlahna hi ₹ 36,700 a ni a, kum thum chhung chuan ₹ 13,21,200 a ni dawn a. Hemi pathum ringawta kan hmuh pawh hi kum thum chhung hian ₹ 45,82,800 hloh tura chhutchhuah a ni tih hi vawiinah hian ka'n sawi duh a ni. Hei hi engnge a awmzia, a mak a ni. Minister zahawm tak pawhin hei hi min chhang se ka duh a ni. A chhan chu sorkarin sum kan zawn laia sum hmuh tam hlau ang hrim a ₹ 70,100/- in kan lo luah ang an tih mawlh mawlh laia ₹ 15,000/- lo chuan ka phal lo tih tlat ang chi hi chu eng dan nge ni ngai le tih hi Pu Deputy Speaker, vawiinah hian ka'n sawi duh a. Kha kha Tourism Department lama ka sawi theih ni ta sela.

Tin, khang bakah khan Transport lamah hian han kai leh ta ila. Lunglei lamah te AC Bus tlan tir te kan tum a, a lawmawm a. Bus hi ka'n ngaihtuah thin a, kan Transport Department hi engatinge tum ang taka a hlawk lutuk loh aw tiin ka ngaihtuahna a vak vel thin a. Ka rilrua awm ta ber chu tunah pawh Aizawl atanga Lunglei kan han service tir ang a. A hmun thlen hmaa khaw kar angte pawh kha ticket te kha han pe ve ta ila. Entirnan, electric connection nei lo electric pawt ru chu a hrem theih a ni. Transport motor bus-a chuang ve ticket neilote hremna dan siam ve thung ta ila. Tichuan, MVI ten kalkawngah uluk takin lo check ta sela. Tahchuan, mitinin bus ticket nei lova chuan kan lo hlau tawh ang a, ticket kan la zel dawn a ni. Chutiang ni a lo thlen meuhah chuan passenger kal man hu ang ang hi sorkar hian a hmu thei ang tih ka ring a.

Vawiinah chuan entirnan, Aizawl atanga Lunglei kan kal te pawhin a then chu Thenzawl-ah an chhuk a, a then chu Sekhum-ah te pawh a ni ang. Khatiang khan kan chhuk pheizeng zung a, Lunglei thleng lo tur kha chu a buaithlak a. Chuvang chuan,

helai atang ngei hian passenger ticket nei lova chuangte hremna dan hi siam ila, tichuan, mitinin ticket kan lo duh vek tawh ang a, sorkarin hla tak Lunglei kal tur a nih pawhin a kar laka ticket lak ve ngei tuma chuangte pawhin, chutah meuh chuan ticket man kha kan hmu kim thei ang tih kha vawiinah hian ka'n sawi duh a.

Tin, a dawt leh atan chuan demand no. 28-na kha a pawimawh khawpin ka hria a. Nimin lawkah minimum wages rate te pawh kan han sawi a. Hei hi a hlu em em mai a, chutih rual rual chuan sorkar hnuaiia thawkte khan a hman theih rualin private lampanga hnathawk dinhmun te pawh kan zuk bihhchian a ngai lo maw ka ti deuh a ni. Mi contract hnuaiiah rei tak inhlawhin ka awm a, candidate-a min puan ve khan ka bang ta a. Chutiangah chuan contract work hnuaiia labour hrang hrangte dinhmun pawh hi kan bihchian a va tul em tih hi vawiinah kan Minister zahawm tak ten min lo hriat sak se tih kha ka'n duh a.

Labour law te hi a dan ang tak chuan a khirh khawp mai a. Labour pawimawh zia hi ka sawi thin a. In kan han sa a, auto level te leh instrument dangte pawh kan han hmang a, amaherawhchu, mistiri pa in a khai nel nel te nen ban khura a luh phawt loh chuan ban hi a tun theih loh reng reng a ni. Eng anga khawl changkanga tih pawhin mistiri pain a zuk luhpui a, a han thlir vang vang hma loh chuan ban a ding thei lo. Chumi ka'n sawi tak zawk chu, mistiri pa kut chu a hmawr bawkna a ni ve tlat a ni. Khawl changkang nena kan tih pawhin kha hnathawktu pain, kut a thlak hma loh chuan ban a ding thei lo a ni. Chutiang khawpa hnathawktute hi pawimawh an ni a. Chutih rual rual chuan an hlauh pek danah te, contractor-in emaw thil dangah contract work-ah te pawh hlauh hmu ta lo tih te hi a tam ta em em a ni. Hengte pawh hi kan enchianpui a va tha em! Hnathawktute kan tihbeidawn chuan eng ang pawhin dawhkanah zia thlapin, drawing ropui tak takte pawh hi siam thin mah ila, arawn tungdingtu ber a awm loh chuan engmah hi a ni tak tak lo a ni. Chuvangin, heng kan hnathawktu, contract hrang hrangte, private sector ami te, damdawi in te pawh a ni ang, school ami te pawh a ni ang,

helaia leileta thawktute hi an dinhmun kan zuk thlir chian lehzual hi department lampang atangin a va tha em.

Entirnan, thla tin ni 14 danah te fortnightly labour report kan thehltut thin a, phai lamah chuan an ti uluk viau. Mizoramah hi chuan Labour & Employment-ah pawh kan va thehltut ve thin a, an lo dawng satliah ve deuh mai mai ni hian ka hre thin a. Engpawhnise, heng labour dinhmun hi min lo enchian lehzual sak se tih ka'n sawi duh a ni.

Tin, demand 37-na Co-operation Department hi a pawimawh hle mai. A chhan chu hemi kan hman thiam hma loh hi chuan ram hmasawna tak tak hi kal a har mai lovang maw a tih theih rum rum mai. Hmanniah Bangladesh kan kal haw hnu khan internet atangin thesis pakhat 'ginger economy in Kerala' hi ka lachhuak e ka ti a. Chuta ka rilru la ta deuh mai chu farmers ten consumer price-ah hian producer hian engzatnge a chan ve reng tih an han zir chianna la (cotton) chungchang ami hi an lo thailang a. La bikah chuan consumer price atangin producer ho hian 90% deuhthaw kha an chang thei a lo ni a. Chu chu engnge a chhan tih an han zir chian chuan co-operative society tha a awm vang a ni tih kha an thutlukna a ni tlat mai a ni. Chuvangin, kan hnathawhte tha taka kal thei tura khatianga thil ni tur kha chuan co-operative society hi kan hman tangkai thiam a ngaiin ka hria a.

Tun session-ah pawh khan zawhna ka pe a, a zat te, sorkarin kutke atan engzat nge a hman tih ka zawhnaah khan, tun dinhmunah chuan kutke a hman a nei rih lo ve tiin min chhang a. Engpawhnise, co-operative society kan neih that chuan kan kut hnathawktute dinhmun hi kan lo chawikang ngei dawn a ni tih India rama la chingtute chungchangah a chiangin ka hria a, khalai kha ka'n sawi duh a ni.

Tin, Environment & Forest chungchangah hian thingtlangah te kan han kal a, ka bialah te pawh khian reserved forest tha tak tak an nei a. An lo sawi thin lai chu,

‘heng forest enkawlna tur hian engemaw zat sum chu awm ve se chuan, YMA emaw te pawhin kan lo enkawl ang a, kan kal chak lehzuai thei ang,’ tih hi min lo hrilh thin a. Hei hi a pawimawhin ka hria a. Thingtlangah khaw kilkhawr deuh hlekah pheih chuan ramngaw tha deuh deuh an lo nei ta a ni. Kha kha fund tam lo te te te pawhin han ti thei ila chuan kan ramngaw hi humhalh lehzuain, a khaw mi-te pawh a tiphur lehzuai lovang maw tih lai kha ka’n sawi duh a, min tihsak theih chuan ka lawm hle ang tih Pu Deputy Speaker, ka sawi duh a ni. Ka lawm e.

DEPUTY SPEAKER : Pu Chalrosanga Ralte i lo ko ang.

Pu CHALROSANGA RALTE : Pu Deputy Speaker, ka lawm e. Tawite-in demand pali lek han sawi ka tum a. A hmasa berah chuan Food, Civil Supplies & Consumer Affairs, demand no. 17-naah hian sawi ka’n duh chu, food security kan han hman tawhah hian, hmanni lawka Finance Minister zahawm tak speech ah pawh khan kan lo hre tawh a, thla tinin 2 crore savings kan nei thei tawh a ni tih te kha a rawn chhawp chhuak a, a rawn sawi tawh a, kha kha a pawimawh hle-in ka hria a. Kawng dang danga hmalakna te kha chu kan member dangte khan an rawn sawi tam tawh a, chuvangin khalai te kha han point chhuah kha ka duh a. He food security hi kan lo hmang har lutuk zawk emaw ni le aw tih mai tur hian, tuna kan han hman tan dawnah hian 2 crore, kum ni lovin thla khatah savings kan nei thei tur te hi a lawmawm ka ti tak meuh meuh a ni.

Tin, lawmthu han sawi ka duh chu, Buarpui-ah kan Minister zahawm tak hian godown leh quarter tha tak min sak sak a, lawmawm ka ti a, an rawn sa zo tep tawh a. Member zahawm tak Pu Ngurdinga kha hmun thum laiah a bial chhungah khan a sak sak a. Ama’rawhchu, hawng tur khan a sawm miah lo mai a. Kei chuan Pu Deputy Speaker, nangmah kaltlangin he godown tha tak leh quarter min sak sak hi an sak zawh hunah chuan min rawn hawn sak ngei turin ka’n sawm duh a ni.

Tin, demand no. 42-na Transport chungchangah hian point hnih lek han sawi ka duh a. A hmasa-in lawmthu bawk han sawi ila. Nichinah khan an han sawi tak na-in Lunglei – Aizawl AC bus service turte hi kan lo hria a, a lawmawm khawp mai a. A hma pawh khan kan lo sawi tawh a, kan lo sawi tawh zarah te leh STA member-a kan hotuten an lo sawi tawh azarah pawh a ni ang a. Hetianga district pum anga bus chuan nuam tha tak min han pe te hi a lawmawm ka ti a.

Tin, thil pakhat han sawi leh ka duh chu Transport Department hian nichinah khan kan han sawi tawh bawk a, keini thingtlang bialtu tan hian Transport Department te hian ambulance te hi a neih ve theih lo maw tih te hi zawhna pakhat ka'n pe duh a. Hei hi engtin emaw budget-ah khan tih dan te hi awm se tih hi kan lo sawi thin a. Chuvangin Pu Deputy Speaker, kan Minister chak tak hian ambulance te hi a changtu Transport Department te hian min neih sak theih chuan keini tan chuan tlemin a zangkhai deuh turah kan inngai ve a, khalai kha sawi ka'n duh bawk a.

Tin, Pu Deputy Speaker, Environment & Forests Department demand no. 36-naa han sawi lawk ka'n duh chu, hmanni lawk khan kan House Leader zahawm tak khan a rawn sawi chhuak a. Kan ramsa te, kan nungcha te, sava te humhahna kawng chi hrang hrangah hian hma an la nasa a. Amaherawhchu, a rawn sawi pakhat ka rilrua cham reng chu, han zin chhuah a, kawnga silai paichhuak hmuh turte hi a la tam viau mai a. Hengte hi kan Minister zahawm tak hian Dan ang hian a neih theih lawm ni le tih te hi zawhna ka'n zawt duh a ni. Zinga sava hram ri han ngaihthlak te hi a nuam khawp mai a, hetiang hi kan la veh duh tlat a nih hi chuan Pu Deputy Speaker, nakin lawkah chuan an la chereu mai ang tih hi a hlauhawm. Chuvangin hetiang hi Dan tha tak te hi min han siam sak se, khatianga silaia nen feh chhuaha kalchhuahte pawh hi khap dan te pawh hi a awm lo maw tih hi ka rilruah hian a awm a ni.

Tin, nichinah khan kan member zahawm tak Pu Sangthuama leh Pi Vanlalawmpuii te khan an rawn sawi tawh a, Teak chungchang kha, kei pawh hian a pawimawh khawpin ka hria. Hei hi Department-in hma an la chho mek tih pawh ka lo hria a. Saw-Mill licence te hi an pechhuak niin ka lo hria a. Hengte pawh hi hma an lakna hi nakinah react-naah te hian min hrilh thei ang em tih ka rawn zawt duh a. Licence te hi central lam atangin nge harsatna kan tawh, heti lai Mizoram state chhungah tih hi kan Minister hian min hrilh thei se ka lawm hle ang.

Tin, a tawp ber atan chuan Pu Deputy Speaker, demand 43-na Tourism Department ah hian han luh lawk ka duh a. Member dangte khan an han sawi nak nak a, Tourist Lodge privatization leh khatiang kha chu rawn sawi ka tum lova. Ka rawn sawi tum zawk chu Pu Deputy Speaker, Mizoram, ram mawi tak kan nei a, Pathianin min pe a, he ram mawi tak mai hi phai ram atang te leh sap ram atangte hian a hmunhma ringawt te rawn hmu chakin an rawn kal thin a ni. Amaherawhchu, hemi kawngah hian thil pakhat rawn sawi ka duh chu, tourist hip tur hian hma hi kan la la chak tawh lovin ka hria a. Tunlaih chuan social media te a tam a, Facebook te, Advertisement hi kan titem deuh a ni lo maw tih te hi ka rilruah a awm a ni.

Chuvang chuan Pu Deputy Speaker, hetiang Pathian-in thil thlawn min pek keinin hman thiam tur hian kan Minister zahawm tak leh Department-a a thawhpuite hian eco-tourism kan tih piah lamah hian Resort angah te hian ngaihtuahna thar min neih sak ta se, tourist tam tak, he kan ram nuam takah hian kan rawn hip lut thei dawn a ni tih hi ka rilruah a awm tlat a. Chuvangin vawinah hian chutiang Resort hmun hrang hrangah Serlui bialah te a ni emaw, hmun hrang hrangah hmun nuam tak tak kan nei a, hetiangah te hian rilru thar neiin Resort tha tak tak, private a nih pawhin, private a nih loh pawhin sorkar ang hian siam theih ni ta se chuan, tun ai hian tourist ho hi kan hip lut ang a, kan ram pawhin anmahni rawn luhna a zarah hian sum leh pai tam tak kan lalut thei ang tih hi ka ring tlat a ni. Chuvang chuan Pu Deputy Speaker, kan

Minister te pahnih demand no. 17, 42, 43 leh 28, 33, 36 leh 37 hi ka support a ni tih ka rawn sawi ve duh a ni e, ka lawm e.

DEPUTY SPEAKER : Hun i hmang thiam e, Pu K.S. Thanga.

Pu K.S. THANGA : Pu Deputy Speaker, ka lawm e. Ka'n insum deuh ngar ngar a, ka sawi lo mai dawn emaw chu ka'n ti a. Amaherawhchu, fakna kan ngaithla hnem a, tlemin kha ti lo lam deuh khan kan Minister-te hnathawha thahnem ngaihna tur lam, a constructive zawnga rawtna te pawh kha he House-ah hian kan sawi tur niin ka han hre ve deuh a. Chutiang zawnga sawi chu ka han duh deuh a.

Demand no.43, Tourism Department hi kan Minister chak tak Aizawl tlangval ngaihtuahnain, thiam tak leh mihring lu zo takin a enkawl a ni a. Heti laia thu zingah hian kan Chief Minister zahawm tak tih lovah hi chuan khawvel ram pawh hi a dai zau ber a ni mai awm mang e ka ti a, chutiang chuan he Department pawimawh tak hi a la a, lawmawm ka ti hle a. Chutih rual erawh chuan hmasawna ah hian thahnem ngaihna tur a tam hle a. Ka hmaa member zahawm tak sawi ang chi hrang hrang ang te lamah hian ke kan pen a hun tak zetin ka hria a.

Tin, pakhat ka han sawi duh chu, khawvel ram fai ber khawpui atangin Pu Modia'n India Sanitation Campaign, thianghlimna beihpui a lo hawn lai vel ah khan kan rawn hawng a. India ramah kan rawn thlawk lut leh a, kan rawn vei lai tak kha a lo ni a, khatiang kha a lo hawng a. Chutiangah chuan ngaihtuahna a tithui duh khawp mai a. Kan ram khawpui Aizawl hi chhut ila, Lengpui Airport atang khuan han lut chho ila, tihthianghlim tur vek mai hian, ram dang Kolkata pawh khu tunah khuan an tang viau mai a. Thla 3 thla 4 dana han kal te hian hmasawna khu a hmuh theih reng ringawt mai a ni. Keini Kristian ram hi tourism te sawi sawi thin mah ila, tuna kan Chief Minister hial pawhin a support-na ngai em em tho niin ka hria a, thianghlimna lam hi, Aizawl khawpui hi tourist mitah in chan tir ta ila, kan chinai hmun tin maia intat leh hetiang

bawhlawha Aizawl khawpui kan titawp hi engtia tih tur nge ni ang aw tih te hi ka ngaihtuah ve thin a. Engemaw lai pheikha chuan, MLA ah hi chuan party dang hian kan thusawi hi an pawm thei si lova, politics hi bansan a helampang campaigner a tan dan te a awm tawh mai lawm ni tih te ka ngaihtuah ve tak tak a ni, thahnem ka ngai ve khawp mai. Ramdang mi mit atang hian he ram hi kan titawp lutuk deuh a ni. Chuvang chuan tourism hi sawi sawi thin mah ila kan ngaihtuahna, kan rilru hi Mizo mipuite hian kan thlak loh chuan, kan kuhva ei dan em em te, kan sahdah leh kan tuibur hi khawvel hian an pawm thei lo a ni. Hei hi nasa zawka tan a ngai a.

Tourism Minister pawhin thil dang khami a destination leh engemaw pawimawh tak tak, a resort lam kha chu ti bawk mah ila, hemi kan ram, tlangram boruak thianghlim leh nuam lutuk mai hi ramdang tan hian a hlu tawk. Tin, tih tur tam tak infrastructure, entirnan, ropeway te leh khatiang ang chi te kan mamawh kan ngaihtuah tur a ni. Amaherawhchu, chumi hma chuan keimahni, a chhunga mihring, kristiante ngei hian tih hmasak tur kan neiin ka hre ve a. He lamah hian thahnem a ngaihawm em a ka hriat avangin kan sawi ve duh a ni.

Tin, a pahnihnaah chuan demand no.42-na Transport-ah hian thil tawi te pahnih khat lek kan sawi ve duh a. Kan Minister zahawm tak khan Aizawl – Lunglei air-condition bus service tur te a rawn sawi khan ka rilru a tithar a. January thla khan thla chanve lai kan thenawm Burma ram Myanmar kan tih takah khian engemaw tiin kan han zin ve a. An khawpui pawimawh te, an hmun nuam te, tourist destination pawimawh te kan han kal ve nual a. Heta kan lo ralkhat hmuh aiin a lo nuamin kal a manhla hle a. Fiamthuin ka ti a, foreign a kal hla vak thei lo tan chuan Bangkok kal ai chuan Myanmar kal hmasak phawt hi sum nei vak lo a tih theih a ni a, ka advocate ve khawp mai te ka rawn ti haw ve a ni. Chuta ka ngaihtuah chu kan Transport Minister-in ngaihtuahna a lo hman atan hemi Maxi Cab hi, (Sumo hi kan neih a ni mai a tunah chuan) nuam deuh hian passenger te pawh hi zin ve duh te pawh hi an awm ve tawh a. Mahni motor kher ken ngai lo va nuam zawk a air-condition Maxi Cab a zin hi a har dawn lovin ka hria a.

Khitilaiah khian Japan siam te, Korea siam te Maxi Cab seat 11 awm te, seat 13 awm te a awm a, keini pawhin kan hire a khatiang te kha. Ni khatah 1000 kms te, 500 kms te, khatiang kha khilai kan thenawmah khian an lo nei a, a tha em em mai a. Chhungkua te, thian ang te, pawl ang te, mi 11 te, 13 te chuanna chi air-condition a ni a. An kawngte a tha bawk a, darkar 1-ah 120 speed-a kan tlan te hian a hlauhawm reng reng loh mai a. Khatiangte kha ngaihtuahna hman ve theih a ni lawm ni aw te ka ti a. Mizo hi kan ngaihtuahna te hi a sang a, kan advance bawk a. Chuvang chuan, khilai Myanmar-a an tih theih chuan tih ve theih dan hi kan Transport Minister hian a hria ang tih te ka ngaihtuah a. Khalam zawng kha ka'n sawi ve duh a ni.

Tin, Food, Civil Supply hi a tha lai hlir hi kan ngaithla a, chuvang chuan engemaw lai deuh pawh hi han sawi ve te pawh pawl lovin ka hria a. Kan Minister hian hmasawna tam tak min thlen a. Hei tunah hian harsatna furah gas te, buhfai te engmah tuar lutuk lovin tuna kan Minister thar zahawm tak hian kan ram mipuite min thlamuan hlein ka hria a, sawi ang khan a ngaihtuahna pawhin a tlin a. Chutihlai erawh chuan ngaihtuahna pakhat ka neih chu, hmanni khan kan official ho, officer lian Secretary hote pawh khan an lo zir ve nual tawh niin ka hria a. Kan buhfai lei hi kan population nen hian a inmil lo lutuk deuh em aw tih ka ngaihtuah a. Chu chu ngaihtuahna thar, hetiang anga kan ram economy kan siamna turah hian a pawimawh phain ka hria a. Kan state finance sum hi kan ei nasa lutuk a buhfai hian, kan eiral leh a lo return hetia sale proceed lokal te hi, heng hi a inmil lo em em mai a. Kan population hi mikhual te nen mi nuai 12 velah lo dah ta ila.

Tuna hetilaia a lan danin hetah 2015-16 performance budget-ah hian en ta ila, thla khatah hian 1,85,070 qtls. vel kan eiral angin a lang a. Chu chu ni 30-a han dah khan 1.54 qtls. hi chhungkaw khatin/mipakhatin thlakhat a kan eiral hi niin a lang tlat mai a. Chu chu nikhatah hian 5 kgs hi mipakhatin kan ei ang hian a lang daih mai a. heng ang hi engatinge ni ti em em mai a buhfai hi kan lei nasat? Heng ai hian control deuh dan hi tun aia thahnemngaihna zawk hi kan nei thei ang em aw tih te kan ngaihtuah deuh a.

Khalai kha kan Minister hi hetiang kawngah hian a ngaihtuahna a hman that thin avang hian khati zawng te khan ngaihtuahna min lo hman sak ta sela. Kan ram hnuk khawih a ni deuhin ka hria a, kan sawi duh zawk a ni.

Tin, demand no. 28 na Labour & Employment-ah hian tawi te kan sawi duh chu, hei kan Youth Commission te, kan Minister chak tak te hmalak naah hian eng eng emaw kan ti a. Tunah hian thalai tam tak khawvel hmun dang dangah te pawh kan tirchhuak a, IAS Coaching Centre te pawh kan ti mek a, helam hi chu ka sawi thui lo mai ang a. Amaherawhchu, ka sawi duh chu, foreign vel leh tiang vela kan intirh naah hian tlema kan inngaihtuah fimkhur deuh zawk hi a tha awm mang e aw. Kan thalaite hi helaiah hian hnathawh hi kan thiam vak lo va. Mi rama kan va thawh te hi chu thil ropui tak a ni bik lem lo tho mai a. Mi inah maid-ah te, chutiang chuan kan thawk a. Hmanni lawkah pawh khan Singapore-ah pawh khan Mizo nula kha an in atangin a tla thla, inchhawng atangin a tla thla an ti a, a thi leh mai a. Heng hi nakinah hian kan la buaipui theih viau mai te a nih avangin heng ang kawngah hian eng emaw security fel zawk deuha ngaihtuahna kan hman te pawh hi a thain ka hria a.

Soil & Water Conservation te, Environment & Forest te, tawi te te ka sawi duh chu, Pu Chairman, a tawp ka'n khaikhawm ang e. Hei an performance budget-ah hian 'no provision was made for this scheme, but are taken up under RKVY' tih hi a ni deuh vek mai a. A hranpain pawisa kan ti lo va, RKVY hi awm lo pheis chuan tam takah hian harsatna kan tawh dawn ni te pawhin a lang a. Chulaiah chuan ka ngaihtuah pakhat chu Union budget hmannah kan hmu a, hengah hian pawisa tam tak mai state-in project kan siam thiam a kan tih tur hi a la tam em em mai a. Chuvang chuan, kan Minister zahawm tak tak te khan heti zawng hian ngaihtuahna hmanga Finance Department in consultancy fund tam tak kan empanelled a ni a. Heng kan empanelled fund te hi project siam a zuk pechhuak tur atan hian hman theih an nih ka ring a, danin a phalna hnuaia tih a nih tawh avangin. Helamah hian Union budget atang khuan Mizoram tan hian vaibelchhe tam tak lak chhuah lama tan lak hi kan Minister zahawm tak tak te

hian ngaihtuahna in hman a thain ka hria a. Khatiang kha vawiina ka sawi ve duh ni sela, Pu Chairman, hun min pek avangin ka lawm e.

* Speech not corrected.

CHAIRMAN (CHALROSANGA RALTE) : Tunge sawi leh ang? Pu R.L.Pianmawia.

Pu R.L.PIANMAWIA : Pu Chairman, ka lawm e. Pu Ruatkima te lam sawi awm tak tak te pawh han sawi mai te pawh ka duh deuh a, sawi an tum tawh lo niin ka hria a,ka'n khaikhawm sak mai ang ka ti deuh a. Lawmthu sawina chi reng reng kha chu ka thlawp nghal vek a, a bak la awm ni a ka hriatah hian han kai ka'n tum a.

Food security kan hman chungchangah hian buhfai kan nei a, ration card chhuak ten eitur an nei a, amaherawhchu, chhuaklo ten eitur an nei lova. Hemi chungchangah hian kan Minister pawh hi ka support viau a, A department. pawh hian a thu chuan min support viauin ka hria a. Hei hi, a mak ka tih hi Pu Chairman, i remtihhain han chhiar chhuah ka duh a. Ni 17.3.2016 a an chhuahah 'Ration buhfai issue chungchang' tih ah hian "End to end computerization leh food security beneficiary thlan tawh te ration card la lachhuaklo mi engemaw zat an awm ni a hriat a ni a, heng mite hi an entitlement anga ration quota lo issue a, felfai taka register a finfiahin an ration card te a chhuah veleh a lo siamrem tura hriattir i ni" tiin order department atangin a chhuak a. Kan Minister pawh vawiin chawhma lam khan order pawh hi ka dil a.

Amaherawhchu, ni 17.3.2016-a order chhuak tawh hi ka bialah chuan a tak a la thleng lova, bial dangah chuan ka hre miah lova, ka hriat chinah ka sawi ang a. Chuvang chuan, hetiangah order a awm a nih si chuan engati nge zawm loh a order hi a awm? Kan Minister ngei pawhin House-ah khan a sawi tawhin ka hria a. Chuvang chuan, thingtlang miretheite dinhmun hre tawklo department-ah hian kan nei em ni tih hi ka rilruah a awm a, ka tuarna khawp mai a. Order hi siam lo chu ni se ka hrethiam tho mai, kan la inpeih ngang lo a, kan tlin ngang lo a ni, a theih hun hunah kan lo pe ve mai ang

tiin min chhang se chuan ka hrethiam tho a. Amaherawchu, hetiang order, kan Minister ngei pawhin a sawi tawh hnu pawha vawiin thlenga a tak ram chang lova kan mi te buhfai eitur nei lova, ration card tlem pechhuak a, la chhuak lo ho ei tur nei lova an vakvai hi a tha ka ti lova. Chuvang chuan, inenfiah ngai an neih chuan inenfiah deuh a thain ka hria a. Mihring tan alawm maw le, sorkar hna pawh kan mihringpuite tan a ni lo em ni tih hi vawiinah ka rilruah a lian hle a ni.

Sawi ang khan, thil dangah chuan lawmthu sawina zawng zawng kha ka tawm vek a. Sakawrdai-ah godown lianpui min sak sak ve a, hman theih thuai ni sela tih ka sawi duh a. Tin, Transport Department ah hian ka sawi duh chu Zohmun leh Vaitin-ah hian Inrinni apiangin, kar khatah vawi khat tlan tir a ni a. Hei hi kar khatah vawi hnih tal tih dan kan Minister chak tak hian min lo thlir sak leh thei sela tih ka'n sawi duh a.

Tin, Driving School Transport Department in an hawnah hian kan bial mi pathum velin an training tawhin ka hria a, a lawmawm ka ti khawp mai a. Tun aia tam zawk an training theihna tur chance te pawh hi la awm sela kan duh khawp mai a. Zir man te a lo tlawm a, private-ah chuan a lo to si a. Kan bial mil tawkin annin hma min laksak thei zel ang tih ka ring a, chumi tur chuan ka'n ngen duh bawka ni.

Tin, Transport Department budget-ah khan ka'n fak duh em em na chu POL an dah lang ngam vah mai kha a lawmawm ka ti a. Department dang hi chuan POL zawnah khan pawisa chengkhatmah an dah lova, POL kha an hmang ve dawn ta lo nge ni, solar lampang an lo hmang dawn ta nge ni tih ngaihtuah theih khawp hial a ni a. Chuvang chuan, Transport Department te budget-a sum tihlannaah hian POL-ah sum neih ang ang in dah lang ngam hi a lawmawm ka ti hle a ni.

Tin, taxi permit hi kan sorkar-ah hian permit kan la pe lo reng reng a. Engemawti zawng taka ngaihtuah pheih chuan Aizawl khawpui chhung bikah hian mi fahrin hrawn ringawt mai ang deuh hi a niin ka hria a, enkawl a hautak si a, an duh duhin

an tal a, hrin loh na na na kha chu thu pawh an awihlo nge nge emaw tih khawp hian a awm a. Chuvangin, mahni hrin enkawl ve tur te pawh hi ngaihtuah nachang kan hre ve tawh dawn lawm ni chu aw tih te pawh hi ka ngaihtuahnaah a awm a, chu chu ka ngen duh bawka.

Tin, Soil & Water Conservation Department ah hian ka hriat sual loh chuan khawvela thil la thleng ngai lo ka bialah khian a thleng a. Nidangah pawh budget session- ah ka sawi tawh thin kha coffee kg 5 vel kum khat budget a min dah sak ve thin kha, khami hnathawh ve thin kha tunah hi chuan Ruangva project-ah ₹ 32 lakhs man vel an han dah ve ta mai hi chu a mak mang e aw ka ti a. Hetiang ti thei Minister nih pawh hi inchhuang se a awm ka ti a. Keini bial tan RKVY hnuaiyah awmlo ata min han neih tir a, min han dah sak hi a ropui ka ti a. Pakhat ka'n ngen duh erawh chu, thawktute awmna quarter khi hmakhawsanga sak tawh hliir a ni a, luah tlak a awm tawh lova. Khi khi tunlai khawvel changkangah chuan computer te pawh han hun vena tlaka min ngaihtuhsak turin ka ngen duh bawka.

Tin, 'hmunphiah mahal' chungchangah bial dangte chu an buai leh buai loh ka hre vak lova, tun kumah khan bul tanna a ni bawka, a hriatthiamawm viau a. Kan bialah khan a buai vak mai a, order te pawh kha tum khat mai kha a tawka lova, NLUP-ah an thlang nasa si a, kan bial pheih chu duhsak bik hial awm kan ni a, a bik taka free transit pass pek vek theih awm tak kan ni. NLUP-ah khan thlan vek tur kan ti a, kan bial pumpui khan, amaherawhchu, a vawikhatnaah khan a theih vek lova. Chutianga kan sorkar policy tihlawhtling tur leh keimahni pawhin a kan hlawkpui tur, a tak rama chan theihna tur atana kan ruahmanna kalpuina ram bial kha a ni a. Chuvang chuan, 'mahal' an han tihah khan tun ang em ema buai lo tur khan kum leh lamah chuan department ten hma min laksak turin Minister pawh ka'n chah duh bawka ni.

Tin, teak hralh chungchangah khan working plan siam leh siam loh kha a bul ber niin ka hria a, Darlawn division huamchhungah hian la tih ve loh niin ka hria a, division then then chauh kha la tih niin chungte chuan awlsam tein an kalpui tawh niin ka hria a, ka hriatsual loh chuan. Chuvang chuan, working plan hi min neih sak ve turin, Darlawn Forest Division kha minrawn hriat sak ve turin ka chah duh bawk a ni.

Tin, Co-operation chungchangah hian tlem kan thailan duh chu, sum leh pai leh loan ang chi, subsidy-ah te hma kan sawn nasa em em tawh a. Amaherawhchu, Co-operative Society-in a tum lamah hian kan tlahniam ta hle niin ka hria a, society member te hi sum lampangah ringawt hian kan kal ta em ni tih ka ngaihtuah a. Ka phak ang tawkin society-ah hian dawr nghakten ka lo thawk rei ve tawh a, hun rei tak manager-ten ka lo awm tawh thin a, hun rei tak. Society-in a tum chu mirethei leh mihausa inkar zau lutuk venna tur khan hmanraw pawimawh tak a nih avangin, society a sum leh pai kan pek ral tam ang hu hian he a tum point-ah hian kan lut ta lo lutukin ka hria a. Hemi lam inzirtirna hi uar zawka kalpui dan awm thei sela tih kha ngen ka duh a. Tichuan kan Minister-te demand hi tha ka tiin ka rawn support a ni e. Pu Chairman, ka lawm e.

CHAIRMAN : Hun i hmang thiam hle mai. Tunge sawi leh ang le. Dr. K. Beichhua.

Dr. K. BEICHHUA : Ka lawm e. Minister zahawm tak tak pahnihte demand hi a tha lai chu lawmthu ka sawi angah min lo ngaihsak se. Ka rawn sawi duhna lai point te te ho chu kan ramin tun dinhmuna kan mamawh deuh leh ka phak ang tawka rawtna leh eng emaw neuh neuh, suggestion ka rawn thawhah min lo ngaih sak se.

Demand no. 17-na, Food & Civil Supplies chungchang kha han sawi ta ila. Kan hriat theuh angin tunlai kan ram titi tam ber chu Food Security Act kan ti lo thei lova, chutih lai chuan ration card a lo dik hlel deuh bawk nen. Helai hi kan ramin nasa

taka tunlai kan titi a niin ka hria a. Hmanniah kan House Leader zahawm tak khan heng tisualtute chu an chungah action lak a ni ang tih House zahawm takah hian a sawi tawh a. Kan Minister zahawm tak pawh khan April thla chhungin hei hi tihfel leh a ni ang tih pawh House zahawm takah hian a sawi bawk a. Chutih lai chuan he khawvelah chuan tu pawhin thil kan tisial thei vek a, a fimkhur apiangin an tisial tlem deuh a, a fimkhur lo deuhin an tisial tam a ni mai a, chuvangin, hei hi chu fel turah ngai ila.

Chutih lai chuan ka rilrua pawh riau chu a statistics-ah tak khan a ni ta a. Statistics fel chiah si lovah khan thla khat chhung hian statistics tihfel bawk, ration card siamthat bawkah khan kan buai viau lovang maw tih kha rilruah a awm rual rualin, thingtlang lama vawiina harsatna tawh mekte rilruah hian an lang a. Nimin lamte, vawiin lamah te telephone tam tak kan dawng a, chungah chuan sawrkarin order a lo chhuah tawh, department lam in an hriatchian lohte pawh a ni maithei bawk ang a. Kan Minister zahawm takin tuna a mamawhte tan chuan register-ah an lo in register ang a, chu chu ration card siam hnu ah kan in adjust mai dawn nia tih House-ah khan a sawi tawh a. Chutianga a ti chung pawhin thingtlang lam thenkhat tam tak chuan an la la thei lo a ni, buhfai kar hnih vel kan dawng thei lo tih thawmte pawh kan hria a, pawh ka ti a. Helai hi kan Minister zahawm tak hian min lo ensak se tih kha ka ngenna a ni.

Demand no. 42-na Transport Department kha sawi leh ta ila. Hotute duhsakna vangin nikum lamah khan transport chungchang Karnataka-ah kan zuk zir a, chuta an total revenue atanga Road Transport-in an hmuh chu 12% a ni. Keini state hi State te pawh ni mah ila a ratio, kan population leh kan state tet ang ang hian, revenue-ah hian Transport hian nasa takin hma an la thei a ni tih hi ka hmuh dan a ni a. Vawiina kan dinhmun zu atanga kan target engemaw zata kan khum ang hian Transport pawh hian revenue hi tam tak a generate thei a ni tih hi ka hmuh dan a ni a. Chuvang chuan, kan Minister zahawm tak hian kan Road Transport atanga tun aia tha zawka revenue generate thei tur hian potential a nei a ni tih hi ka hria a. Helamah hian thahnem min ngaihsak se tha hlein ka hria.

Chutih rual chuan kan revenue generate dan hi tlem chuan a danglam deuh hlekin ka hria a. Vehicle life time tax kan tih angah te pawh hian, entirnan, auto rickshaw-te hi kan ramah chuan kum 15 hi a dam khawchhuah ka ring lo reng reng a ni. Chung atanga life time tax kan lak ang chi te; tin, motor tam tak pawh hi kum 15 dam chhuak lo tur tam tak a awm a, kan road condition azir te pawh hi a ni bawk a. Phai lamah te chuan ni se an kalkawngte a tha a, kum 15 te pawh a service thei turah ngai ta ila.

Tin, thil pakhat, heng 6%-a kan han tihpun te pawh hi kan Minister tawngkam ngei chanchinbu atanga kan han hmuh atangte pawh khan All India Transport Ministers inhmuhkhawm zulzuia hemi hi siam ang khan kan hria a. State hrang hranga Transport Department-in tax an tihpun chungchang hi ka phak ang tawk tawkin ka zir ve ta a. Kha an meeting-a an thutlukna kha an la bawhzui lo nge ni ang a, 6%-a la tipung lo te pawh hi an awm deuh fur a ni. Chuvang chuan, helai hi eng ang condition-in nge India ramin kalpui tura a tih anga kalpui nge kan nih, keimahni Mizoram State sorkar thuneihna anga hei hi lo tipung nge kan nih? Vawilekhata heti thut ni lo hian tlem deuh hlek kum khatah ti ta ila, chu chu mipui pawh hian an hrethiam viau lo maw tih hi ka rilruah a awm a.

Demand no. 43-na, Tourism hi kan sawi (CHAIRMAN : Ngawi lawk rawh, khawngaihni, Speaker-in Chair la rawh se. SPEAKER : Sawi rawh.) fova, Tourist Lodge-ah ringawt hian kan buaiin a lang a. Kan ramah hian, tourism policy kan neih hi a tul tawh takzetin ka hria a. Chumi khami hmunah tourist chumi khami zat chu an lo kal a, revenue chutiang zat kan generate e tih hi kan la hlat viau mai a ni. A Lodge-ah hian kan la buai fo mai hi chu tlanpelh a hun viau tawhin ka hria a, chuvang chuan Tourist Lodge piaah lam ram i dai tawh ang u tih kha ka sawmna che u a ni a, Minister zahawm tak pawh kha ka chah ni se.

Tin, demand no.37-na Co-operation, hei hi sum lam pawh han en ila, kan budget-ah hian a tam thawkhat viau a. Helaiia ka sawi duh deuh chu Co-operation, tuna

Siaha ARCS khi District Council nen MoU sign a la ni lova, District Council kutah a la awm lova, state kuta la awm a ni a. Chutih lai chuan Inspector 2 khi min lakchhuah sak tawh a, LDC min lakchhuah sak leh tawh bawk a, tunah khian thlaphang takin kan awm a ni, kan chhawr tangkai nasa si a. Chuvangin, Minister zahawm tak hian hei hi khawngaih takin min lo enthat sak leh se. Khilalah khian a ngai te te khan min kaltir leh thei se tih hi vawiinah ka ngen duh bawk a. A thawktute leh mipuite khi tunah hian kan chiai viau a, staff engemaw chen lak a nih takah chuan. Khi khi min lo enthat sak ngei turin kan Minister zahawm tak ka chahin ka ngen bawk a ni.

Demand no.36-na Environment & Forests-ah hian sum a tam viau a, figure ka sawi lo ang a, Pu Rinawma anga han ti zung zung thei ka ni lova. Environment & Forests-ah hian hetiang zawng hian hma la ta ila a tha ang e ka tih rilrukna hi a rei tawh a. Green Mizoram kan ti a thing kan phun teuh teuh a, a maintenance lam hi kan ti leh mang si lova. Chutih lai chuan tuna kan ram monsoon kalphungah chuan, sik leh sa dinhmun angah chuan, tuna thing tiak sa kan neih leh kan ram ngaw humhalhna lamah hian sum te pawh hi hmang tam ta ila, hma la chak ta ila. A hranpa a Green Mizoram ti a programme neih a, sum nasa taka sen teuh teuh a, MLA 2 thing tiak phuntir duh loh ang chi te, opposition lamte pheih kha chu ti tawh lo ila thain ka hria a ni.

Environment & Forests-ah khan thil pakhat sawi hmaih ka nei a, heng damdawi in kan neih ang chi te, ran talhna hmun kan neih ang chi te hi pollution control-na hnuaia awm an niin ka hria a. Anmahni hnuaiah tho a ni a, hengte hi kan enkawl uluk loh chuan mihring tan a hlauhawm lutuk. Kan damdawi in te hi kan enkawl uluk loh chuan bawlhhlawh chhuak hi natna hrang hrang a ni ringawt mai a ni. Chuvang chuan hemi control-ah hian chak deuh zawk ila. Kan ran talhna hmun te pawh hi tun aia thianglim deuh zawk hian hma la thei ila tih kha Pu Speaker, kan concern Minister zahawm tak hnenah ka sawi duh bawk a. Pu Speaker, ka hriatsual loh chuan 2105 atang 2016 chhunga project siamah khan district zawng zawng a tel vek a, Saiha kan tel tlat lo mai a ni. Chuvang

chuan engvanga min telh lo nge, khalai kha min lo en sak se ka duh a. Hla tak khua-a awm kan ni si a, i mi ngaihnhathiamna, min duhsakna ka'n ngen a ni, Pu Speaker.

Tin, Labour & Employment kha kan sawi a, kan member tam tak te pawhin an lo sawi tawh a. Nimin lamah te pawh zawhna kan siam a, L & E through lova hna lak tih te nimin lamah te pawh kan hria a. Hei hi a dan tur reng a ni em? Employment through ngei ngeia hna la turin keini chuan kan lo ngai mai a. Chutih laia khatiang a lo ri te pawh kha paw ka ti a.

Chu lovah chuan kan thalaite Youth Commission atang hian kan intir thla teuh teuh a. Kan district lam te pawh Chairman hian mi duhsak a, mi tam tak an chhuak a. Heng kan tirchhuahte hian an zir chhuak em? Zir chhuak ta se khawiah te nge hnathawhna hmun an neih? Heng ho tan hian sum engzat chiah nge kan hman, kan sum hman leh kan tirhchhuah hi a inmil em tih te pawh kan inbih chian a, kan inzir a reservation kan neih fo te pawh thain ka hria a. Chuvangin, Pu Speaker, tuna kan thalai phailama kan tirh hote hi kan tirh chhan ang ngeiin an tih tur an ti em tih bawhzui deuh reng hi a pawimawh hlein ka hria a ni. Hlawhtlinloh piah lamah chhe deuha chhuak an awm ve thei tlat a, chuvangin helai hi min lo ngaih pawimawh sak se tih kha ka sawi duh baw a ni. Pu Speaker, ka lawm e.

SPEAKER : Awle. Pu Zoram Sangliana.

Pu PC. ZORAM SANGLIANA : Pu Speaker, vawiina kan minister zahawm tak te pahnih Demand-ah hian tlem te te sawi ve ka duh a. A bikin demand No. 17, 42, 43 neitu Minister hi Consultative Committee ko taima deuh mai a ni a, chuvang chuan, a department consultative member- te chu committee min koh hian min hrilhfiah deuh vek mai zel a. Amah mai bakah officer-te nen Parliamentary Secretary te nen, hei hi a zawngchhang thlak hlein ka hria a. A hnukung berah khan kei ka zin bo lai a nih avangin ka tel lova. Hemi hi kan

hlawkpui a, thil issue tha tak tak i ti mai ang, ram leh hnam tana fairel bel nghawng dawt dawt a rawn siam pawh hian consultative a member pawl pawl awm lo MLA ten kan lo hriatpui leh min lo hrilh thin avang hian chung chuan bengchheng tur anga mi ngaihah pawh hian bengchhen lohna a ni telin ka hria a. Tuna i veilama thute tan pawh a relna hmun leh a hrilhfiahna hmunah khan a office-ah min hrilhfiah vek mai a, hemi hi rawn chhunzawm zel sela a tha mang e aw tih a demand pathumah hian ka'n sawi duh a.

Tin, hei thil thar duhawm tak tak mai an tih demand no. 42-naah te, AC- sorkar bus ngei mai khawpui No 1 leh No. 2-a tlan tir an tih rual hian tunlai khawvela mi inelna ber chu, mipuite pawhin him zawk leh duh zawk an han thlanna fo thin chu privatise hi a ni a. Hetianga sorkarin bul a rawn tan hi chuan hei hian kan mihausate hi ko chhuak se ka duh khawp mai a. Private AC car te, AC bus te, AC Sumo kan ti mai ang chu, hetiangte hi STA ngaihtuah loh theih loh hian kan mihausate leh he lampanga zin mite awlsam/zang khai duh tu te tan rawn cho chhuaktu ah hman se ka ti a, AC bus an tlan tir te hi lawmawm ka ti a.

Kum engemawzat kal tawhah khan khawpui chhungah te leh India Union-a khawpui ber kan capital New Delhi-ah te pawh intlan chhawk tih ang te pawh an han hmangin an han ti a ni a. Kan ramah ngei pawh kan han practice tawh thin te kha a ni a. Tin, chumi bakah khawvel thang zelah hian transport hi mihring nunna vengtu leh chumi kaltlanga nunna tam tak suatna a ni tih pawh hi kan hriain kan zir thin a. Mahse vawiinah chuan thil thar danglam tak mai a lo lang ta a, chu transport avanga thihna tam tak ai chuan abortion avang te, cancer avang te, thil hrang hrang avang te a thihna, khawvela ram changkang ber USA-ah pawh a lo tam ta zawk a ni tih han hriat hian, chung kan chhut chuan kan lirthei hmangtute leh enkawltu te kaltlanga thihna te pawh hi vawiinah chuan a lo tlahniam zel niin ka hria a. Hemi department-in a hmalakna te, tin, hemi connect-

a association hrang hrang, NGO hrang hrangte nena thawhhona tha te pawhin chung chu a thlen niin ka hria a, lawmawm ka ti a, chung chu ka'n sawi duh a. Thangthar lehkha thiam zel te tan pawha enkawl theih , anmahni enkawlna hnuai si, Dan chhung si, va tel theihna hi a ropui ka ti a ni.

Demand no.17 Food, Civil Supply & Consumer Affairs ah hian ka sawi duh chu ngaihtuahna huaisen tak, India ram hmun dang ang bawka food security-in a huam chin chauh ration card min pe tura lo ngaihna atang kha chuan, a van huphurhawm mang e aw, lo tih theih a ni a. Mahse, chumiin a huam loh, a tawi zawngin ration card nei zawng zawngte ruahmanna fel tak nen food security a han kalpui a, tin, hmasawnnain a ken tel, (kawng danna), road block chung, kan lifeline ber kawngpui dan chah a ni chung, tumah fairel bel ruak lova a han tih bak ah, village tlangau te ka atanga kan hriat hnem ber chu, he Department kaltlanga kan ram mipui, chhungkuain malsawmna kan dawn, gas lak tur a awm, buhfai, atta lak tur a awm tih ngaihthlak, zing kar a ni emaw, chaw-ei lai a ni emaw ngaihthlak tur awm reng maia a han siam thei hi, mipuite tan thlamuanna min han thlen hi lawmawm ka ti takmeuh a.

Tourism Department enkawl dan piah lamah ka han sawi ve duh chu, ram dang mi kan rama lo zin te, keimahni pawh hmun danga kan va zin a kan test chak ngei ngei chu 'Chawa an rin' hi a ni. Mizo chawhmeh, bai leh tlak te, vawiina kan Tourism Minister zahawm tak hi, a lal thiante pawh behlawi baite pawh lo hawp pui tawh thin (thalai hruaitu a nih lai pawhin) a ni a. Chuvang chuan, Mizo chawhmeh tui tak tak, phuihnam tlak, khanghu etc an uarna apiangah kan Tourist Lodge te hlawkna niin ka hria a. Remhre taka privatized a rawn ti chho a, in tlansiakna tha a rawn siam a. A kalkawngah chuan tlema chek han zut mam tur a awm thei a, mahse ka fak vena tlat laia chu, a pumpui laiah hian amah leh a department te an Chiang a, chung te te chu a department enkawlah hian sawi ve ka han duh a, lawmawm ka ti a.

Sawi tur tam tak awm karah tunah chuan kum engemaw zat kal ta a tihchhin lo tum uaih uaih tawh anga lang, two wheeler taxi ang chi te pawh hi wawiin chawhma lamah khan kan pi zahawm tak khan a rawn sawi tawh a, hengte hi han ti ta ang ni ila. India ram leh khawvel hmun danga tourist centre ti mai ila vawiina an intihsiak tawh chu lirthei khalh thiam tan chuan map kha an motor-ah an keng tel vek a, an set a, an kalna tur a hrilh zel a, taxi-a chuan pawhin.

Kum 2014 khan YMCA khawmpui London-ah kan zuk nei a, chuta kan lenna Mizopa in atangin kan thlenna YMCA hostel-ah taxi-in kan haw dawn a. Driver nena kan inkarah chuan thirlenin min dang a, tichuan, an set fel vek a, kan haw duhna street leh number te kan han hrilh a, an kal soal dawn pawh khan khami khan a lo kaihruai zel a ni. Vawiina kan minister-in a ngaihtuahna a sen hi heng ang transporter-te pawh hian an ngaihtuah ve a, kan khawpui chhungah leh hmun dang dangah pawh hengte hi kan minister tihbuai nan hian hmang zawk se, 'hetiang hian i ti ve ang u, tiin STA ngaihtuah tur agenda-ah te pawh hengte hi lut ta zawk sela tih te hi ka rilruah a lo awm a. Two wheeler taxi-te pawh Bangkok-ah te leh India ramah pawh tourist centre hmunpui Goa-ah te chuan an hman uar em em niin, anni ang hian kan khawpuiah te pawh hian ti ve ta ila tih te leh, tih tumna awm han ri faih faih te hi tihhlawhtlin ngei ni se tiin ka rawn thlawp a ni e.

Tin, Minister zahawm tak Pu Lalrinmawia demand no. 33-na Soil & Water Conservation Department hi wawiinah hian hei hi kan hre tawk lo deuh niin ka hria a. Tin, anmahni department-te pawh hian department dang lian pui pui karah hian an inzep deuh niin an inngai nge ka hre lo, mipuite pawh hian he mi te tangkaina leh hlutna pawh hi kan hmang thiam tawk lo. Tin, a department-te pawh a minister-in a rawn pharh ruala kan ngen duh chu tun ai hian mipuite hnenah hian awareness kan ti dawn nge, advertisement te hi uar sela,

an hnathawh hi mipuite min hriattir nasa sela. Chumi a nih chuan an tangkaina te hi kan hre dawn a ni tih hi ka sawi belh duh a. Vawiinah hian hmun hrang hranga an hmalakna han hmuh te, he department kaltlanga kan ramin hmasawna a rawn chherchhuakte hi lawmawm ka ti a. Hei hi Pu Rinmawia demand bikah hian a demand 33-na hi kan sawi hmasa duh a.

Labour & Employment Department, matric kan pass hlim han ti ve khanglang ila, khang hunlaia he department kan hriat dan leh vawiina kan hriat dan chu lei leh van ang a ni ta ti ila a awm e. He department kaltlanga kan thalai mithiam rualte an nu leh pate mai nilo, he ram tana revenue earn tura an han fehchhuah tir thei ta te hi ropui ka ti a ni. Chuvang chuan, he department hi thangthar lo la awm leh zel turte tan leh kan ram tan, India sorkar in he kan sorkar a hria ang hian hei pawh hi kan hre ta niin ka hria a. Education Department tiin tunhma zawng chuan kan sawi thin a, mahse hmasawna chu mihringah a ni tih Central sorkar hian a hrechiangin Human Resources Development Department an tih ang deuh hian Labour & Employment Department, in register-na department, inziah luhna department ni mai lo khan, a mi chherchhuah kha he department hian mamawh tutena company emaw, mimalin emaw a zawnchhuah loh theih lova mithiam chherchhuah hna, he kan ram leilung Vairengte chhaklamah chauh ni lo, India Union chhungah mai pawh ni lo, foreign thlenga chutiang mite chherchhuah nana hman a ni ta hi a lawmawm ka ti a.

Tin, demand no. 37-na Co-operation Department hi Pu Speaker, khaw chhak unaute, an hman tangkai em em. Kan hotute leh kan ram mipuite zara malsawmna ka dawn ve a. Khawchhak lama ka han kalnaa ka hmuh chian ve em em chu Co-operative Society an hmang tangkai em em mai hi a ni. India rama kan State lian ber berte pawh hi Co-operation Department hman tangkai State hi hmasawna bul, inngahna bul niin ka hria a ni. Tun aia nasa zawkin Co-operation Department hi hman tangkai ni se ka duh tak meuh meuh a.

A tawpna ber leh a khaikhawmna deuha ka duh chu demand no. 36-na, Environment & Forests Department. He Department-a officer-te hi rintlak an nih zia chu kan ram sorkar kalphungah hian a lang reng mai a ni. Vawiiina kan PCCF chu chi thumah Secretary a ni tel a, Secretary to Chief Minister a ni tel a, chu chuan he department a mihring te hi department enkawl tur pawh hian hmantlak leh he kan ram tan pawh hian rintlak an ni tih hi a langchiang em em mai a, vawiiina kan kalphungah hian. Chungte a nih avang chuan efficient taka hmalak chhoh leh kan ram sorkar kal tur atan te pawh hetiang IFS central service kan neihte zinga senior ni bawk si te hi (a mimal lutuk em pheii chu ka hre lova,) thahnemngaihna, kan ram tan he department chhungah hian an awm avangin Additional Chief Secretary-ah te hian dah chhoh a, mi ramah pawh an neih thleh thluah dan a ni a. Hengte hi ni chho ta se, he department tan hian malsawmna a keng tel dawn a ni.

Tin, he department hi resource mobilisation atan hian an tangkai ang huin kan hmang tawk lo niin ka hria a. Kan ram forests atanga kan tharchhuah, kan thing leh mau leh hmunphiahte hi tunhma chuan revenue sang tak tak kan hmuhna te kha an ni thin a, non-tax revenue kan tih mai thin, kan hmuhna bul te kha an ni a. Chuvang chuan helai tak hi kan minister hian rawn thlirpui uluk leh zual sela ka duh a. Mau ni se, kan ram hausakna bul ber leh kan ram tana sum leh pai kan hailuh theihna tur a ni a, mumal taka sum leh pai kan siam nan Bamboo Industry emaw, a raw-a hralhin emaw, khatianga hma lak a nih chuan sum tam tak he department kaltlang hian sorkarin a lalut thei dawn a.

Tin, thing chungchangah ni se Pu Speaker, ramngaw kan tihchereu tawh avangin vawiiinah chuan tualto thing tihtham kan nei tawh lo. Sorkar leh mimal teak huan te hi kan timber resource a ni tawh mai a vawiiinah chuan, thing thangduang chi kan phun belh a tul hle mai a. Teak hi ram pawn heng Gujarat-ah te thawnchhuah hi titawp ila, saw-mill emaw, plywood industry emaw

te hi kan Minister hian a buaipui deuh niin ka hria a, Kolasib ah te pawh sawmill dil an awm kha. Khangte pawh kha min lo hriat nawn sak leh se. Chungahte pawh chuan Mizopa khawlah ngei han barh ve tawh ila tih te hi ka sawi duh a.

Kan ram thar hmunphiah hi vawiina kan thlir ve dan maiah chuan Pu Speaker, 10% vel chauh hi a rah kan seng niin a lang a. Tun dinhmunah chuan Bagha vai hovin an duh zah zahin min kalpui niin a lang tlat, helaiah hian Assam Forests Department ten royalty an lo lak ai khuan keimahni State hian royalty lak nan hmang ta ila a tangkai zawkin, NLUP kaltlangin kudam ni se a dahthatna tur sak a ni tawh bawk si a. Nimpiniah lawk ah, Rel lian chi ni se Mizoram chhungah a rawn lut tawh bawk si a. Helaiah hian ngaihtuahna thar kan neih a ngaiin ka hria a. An hmalakna atang tein Forests Department-a hnathawktuten red sandal-wood chungchangah te pawh hian department-in an man te, central excise ten an man te hi sorkar sumah hian chantir dan a awm em tih hi ka ngaihtuah a. Auction (lilam) mai sela, (SPEAKER : Aw, midang te tan hun siam sak ve la) Pu Speaker, pahnih khat chauh, Andhra Pradesh-ah te hmun dangah te, State pawnah auction tura thawn aiah kan ram sum leh pai tan hengte hi kan Minister hian chantir dan rawn hre chhuak se a van duhawm em aw. Helaiah an lo man hah takin an lo buaipui si a.

Pu Speaker, vawiinah kan demand neitute pahnih in an demand hrang hrang an rawn pharh te hi pass pui chi an ni e tih ka rawn sawi a ni e. Ka lawm e.

S P E A K E R : Pu Ruatkima.

Pu LALRUATKIMA : Pu Speaker, ka lawm e. Vawiinah kan minister zahawm tak te Pu John Rotluangliana leh Pu Lalrinmawia Ralte te demand, a vaiin 7 sawihona hun tha tak min pek avangin ka lawm a. Demand-ah hian ka'n lut zar zar ang a.

Demand no.17-na Food, Civil Supplies & Consumer Affairs-ah hian kan ngaihthlak tawh leh kan sawi tawh ang khan tunkar chho chu kan hlim khawp mai, rampum mai birthday inang kan han lawm thut mai a. Nuih te pawh a za a, a chang leh a nuizhat thlak rualin a thinur thlak bawh a. Pu Speaker, chumai a ni lova, a zahthlak tel bawh niin ka hria. Khati tak maia dik lo lutuk leh family pawh kim mang lo, occupation te pawh ziak fuh mang lo kha, khatiang an awm kha a pawh khawp mai a. Chuvang chuan, food security kan hman mek laia kan hlim tehreng nen khati zawng khan kan hlimna kha a kal ta daih mai a.

₹ 70 lakh chuang kan seng kan tih lai khan kan han enchiang a Pu Speaker, officer thenkhat te Silchar-ah paper leiin an liam thla a. Zankhuain tlaivarin khilai office chungah khian an chhu tluk tluk mai si a. Chuvang chuan, helaiah hian thil dik lo tak mai a inzep ni te pawh hian a lang a. Chuvang chuan, fiamthu bu tihte pawh miin an sawi fo mai a. Hengte pawh hi a nihna chen a awm a, kan ration card thar rawn chhuak hi fimkhur lehzuah zawkin kan Minister-in a thar a rawn siam tur hi chu tumah kimlo awm tawh loin, a tha thei ang berin tih rawn tum se a that ka ring a, chung chu ka'n sawi hmasa ni sela.

Hei supply hian chini ration hi tunhnai lawkah sum harsatna avangin an titawp a. Sum leh paiah te kan dinhmun a tha chho zel a, heng chini ration te pawh hi tih leh theih dan a awm lawm ni? Central sorkarin engemaw zat min rawn subsidized thei bawh a tih kha ka sawi tel duh bawh a.

Tin, end to end computerization targetted public distribution system atan khan kan han ti a. Theihtawp chhuahin hma kan la a, pawisa pawh kan inseng viau a ni. Ama'rawhchu, kan ration card rawn chhuah dan te khang zawng zawng kha chu kan sawi tawh a. Chuvang chuan, khalaiah khan kan computerized tawh a nih si kha chuan thil reng reng kha a mumal thei tawh turah kan ngai a. Chutiang te chuan ngaihtuahna kan hman chhoh zel a tul a.

Tin, Consumer Affairs department hi an indang mai dawn e tih te pawh kan han hria a. Mahse, vawiin thlengin harsatna hrang hrang avangin an indang hlei thei lova, hengte pawh hi engtinngge consumer rights te, khatiang khan kan hriat loh lutuk avang leh inzirtirna tha kan neih tam tawk loh avangin consumer te hian kan dikna leh chanvo te pawh sual chhuah loh tam tak te pawh kan nei a. Chuvang chuan, heng ang te pawh hi uar lehzualin kan department lam te pawhin mipuite min han zirtir se a tha hlein ka hria a.

Tin, Legal Metrology department, ho hi an pawimawh khawp mai a. Mizoramah tehna/bukna khatiang thil chi hrang hrang oil te a thianghlim leh thianghlim loh te endiktu leh vawngtu an ni a. Hemi kawngah hian a thawktute an indaih lo khawp mai a. Hmun thenkhatah phei chuan buhfai ration te pawh hi tehkhawng bur engemawa la teh te pawh hi a la awm a ni, patla hmang lem lo te pawh. Hengte hi dan bawhchhiatna vek a nih avangin khang endik tur khan hmun/hun an neih loh avangin hetiang kawngah pawh hian thawktute tihchak an tul khawpin ka hria a.

Nichinah kan member zahawm tak Aizawl South-III bialtuin a sawi tawh ang khan buhfai kan lakluh leh mipui hisap hi a in mil lo khawp mai a. Economic survey report-ah te pawh hian kan han hmu a, kan thla tin buhfai lei hi agriculture department-in buhfai an rawn thar chhuah WRC emaw jhum atanga an tharchhuah pawh ni se, heng ngailo khawp hian kan lalut tam a ni, chuvang chuan, englai ber hi nge a dik lo lai tih enfiah hi kan mamawh tawh khawpin ka hria a. Chungte chu ka sawi duh a.

Tin, demand no. 42-na, Transport-ah hian hei kan hriat angin lirtheah life time tax atan 6% lak tur a nih thu kha kan hria a, February ni 8 atang khan kan hmang tan a. Helai hian motor VAT tel lovin 6% lak tur a ni ta mai hi a fel lovin ka hria a. Delhi-ah te kan Minister hi meeting-ah te pawh a tel niin ka hria a. Kan State pachhiat dan kan ngaihtuah hian helai hi installment-in emaw kum 5 dan ah chuti zat interest-in emaw, kum 10 dan ah, kum 15 pe duh tan pawh khatiang khan siam chho ta thliah thliah

ila chu vawiina kan harsatna, ram mipuiin kan harsatna ang hi kan tawk lo thei awm mang e aw, vawilehkhata vawiina kan tih rup hian nakum zel atan tax kan lak tur kha a hniam ve telh telh thei a. Chuvang chuan, motor hlui lei tur tan pawh harsatna khatiang khan tam tak a awm a ni thei a, chungte chu ka ngaihtuahnaah chuan a awm a.

Tin, taxi hi hei Aizawl khawpuiah tun kum 5 chhung khan permit 1051 pek a ni a. Pu Speaker, nichinah khan kan member zahawm takte khan an sawi tawh a. Aizawl khawpuiah hian taxi service lai 2009-2010 ah khan 209 chauh a lo awm mai a. 2013-2014 ah hian 3804 tiin kan Assembly Committee zirchiannaah hian a lo lang bawka. Tin, taxi te hi kan kamchhe tleuhna an ni ta mah mah emaw ni chu aw tih theihin a nawmamakah kan hmang ni te pawh hian a lang a. Heng ang zawng zawnga mawhphurtu chu keimahni Transport department hi kan nih avangin training te pawh uluk lehzual leh khami permit licence pek chungchangah pawh kan fimkhur a thain ka hria a. Green line bus kha a tlan mai dawn emaw ka ti a, Aizawl khawpuiah hengte pawh hi tih leh theih ni ta sela a that ka ring khawp mai a.

Taxi intlanchhawk an sawi a, ama'rawhchu, ministry hmasaah khan minister zahawm tak hmalakna khan intlanchhawk kha engemaw chen kan han kalpui a. Amaherawhchu, pressure a lo awm a, pressure kha kan zo lo deuh nge ni kan titawp leh a, tunah intlanchhawk tir leh kan tum a. Khatianga a zam a zam mai kha chu a dik lo deuh awm mang e aw ka ti a.

Hei kan hriat angin JNNURM pawisa atangin bus engemaw zat kan han nei tawh bawka. Chuvang chuan, khang ang zawng zawng te pawh kha taxi intlanchhawk hranpa ngai lovin green line bus te pawh kha ti ta ila, engemaw ruahmanna fel zawk kan neih theih chuan kan Aizawl khawpui traffic jam hi chu a tihziaawm ka ring a. Chulaia ka'n sawi duh chu Pu Speaker, ISVP te kan han nei ve a ni mai a, a hming chuan hengah te hian mipui tan, a dawr tute tan toilet facilities te pawh hi a awm mumal mang lova, inthiarna, zun ram thiarna ang chi hi hengah hi chuan kan va provide ve dawn lawm ni?

State dangah heng ang chi hi chu tha tak tak, thianghlim tak tak a awm a tih te ka ngaihtuahnaah a awm a, chung chu kan sawitel ni sela.

Demand no.43-na Tourism-ah hian kal ta ila. Hei kan revenue collection hi 2015-2016 ah hian ₹ 1.83 crore chauh a ni mai a, kuminah erawh chuan hma te pawh kan sawn ang a. Tourism industry hi potential kan nei tha a ni. Ama'rawhchu, kan revenue department ang tak taka hma han la emaw, revenue han earn tur ang chi khan vawiinah hian kan siam lo ni te pawh hian a lang a. Chuvang chuan kan ngaihthlak tawh ang khan Tourist Lodge te, Travelers inn te kan han privatized dan atang khan kan sum hmuh kha a tlahniam dawn tih chu a lang sa reng mai a. Chungte pawh chu ngaihtuahnaah kan hman chhoh zel a tul a. Heng ang zawng zawng Tourist Lodge te kan privatized takah hian hotel management lama experience nei tak tak thawk tawh sa te pawh an lo awm ang. Chung ang te pawh chu hmun hrang hrangah Mizoram House kan nei a, hotel management pawh zir lo ten kan han enkawl a. Heng ang chi ah te hian deputation-in emaw kal dan te pawh a awm mai thei a ni. Heng thleng pawh hian kan ngaihtuah a tulin ka hria a.

Kan hria a, trekking route te pawh hi kan han siam chho zel ang a. Hengte hi tourist kan hip luh nasat poh leh kan ramin sum hnar tha kan nei ang tih hi kan ring tlat a. Chuvangin tourist te hip tur chuan mipui lam pawhin zir tur tam tak kan nei ang. Kan 7th Sister State ami heng Sikkim te pawhin Industry tha tak Tourism atangin an neih phah a, sum hnar tha tak an neih phah a, chutiang te chu an ni a. Chuvangin tan kan lak zual hi a ngai takzetin ka hria a ni.

Tin, Labour & Employment atang khan, building and other construction welfare fund hi Pu Speaker, constituency-ah te pawh hian MLA te nena tang tlangin membership drive pawh hi kan ti thei lawm ni? Hmun thenkhatah chuan vawi engemawzat kan campaign a, hmun thenkhatah campaign kan nei mang lo a ni. Chuvangin, a tawpah harsatna tawktuten an tawka, an rawn

tlan luhna chu MLA te kan lo ni leh thin a ni. Inzirtir kan mamawh a, membership drive-ah te pawh hian tan kan lak tlan a tul hle a ni. Chutiang tur zawng chuan kan Minister hian ngaihtuahna rawn hmang sela a thain ka hria.

Tin, IT te kan nei a, khungah te pawh khuan certificate chungchangah hian harsatna an nei a, course an zawh tawh hnuah pawh hna an dil hlei thei lo a ni, certificate an neih loh avangin. certificate rei tak nghah ngai ang chi te hi chin fel thuai a tha hle a ni.

Tin, Mizoram Youth Commission hmalaknain Coaching Academy te kan han ti a, ka bial chhungah ngei mai khan Pu Speaker, ka bial sawi kha kan han tim deuh dawn a, ka bial a ni miau si a. Ka bial chhungah a awm a ka lawm khawp mai. Ka bial chhungah ngei mai a awm a tha tak mai, Mizoram mipuiten Central Sorkarah tam zawk kan tlin theihna tura hmalakna pawimawh tak a niin ka beisei tlat a a ni.

Tin, skill development hmalakna hrang hrang Planning Department pawhin an nei a, heng zawng zawng hi hmun khatah kan fun khawm thei ang em? Labour & Employment emaw, Board te, Society te, kan ti a, skill development-ah Pu Speaker, mahni zawn theuhah hma an la theuh mai a, hei hi chu hmalakna ki khat hi kan nei thei lawm ni? Kan skill kan develop rual hian man power development ang chi industry lian tak hi. Chuvang chuan Pu Speaker, ngaihtuahna kan hman hi a tul khawp in ka hria a ni.

Tin, demand no.36-na Forest-ah hian reverine reserve chhungah Revenue Department-in ram pass kan lo issue teuh lo thei lova, tun hma atangin a ni a, Hydel Project siam dawn chuan compensation an lo claim lo thei lova, hetiang hian harsatna kan nei zel a ni. Deparment pahnih ten thawh hona tha tak an neih loh chuan kan harsatna hian tawpintai a nei dawn lo a ni. Ka message

dawnah hian Serhmun khua Dampa Tiger reserve chhungah a awm dawn an ti a, Serhmun chu kan hriat angin kan Mizo pasaltha Taitesena khua a ni, a lungnahna hmun a ni. Ama'rawhchu Serhmun khuate khuan Dampa Tiger reserve area deuh thovah thlawhhma an neih avangin khami chhunga ramsa ten an thlai an rawn tihchhiat thin avang khan department-te nen harsatna an tawh thin a ni. Kan khua hi kan chhuahsan mai dawn a ni tih rilru te an pu ta hial mai a, a lungchhiat thlak in ka hria a ni. A thlang lawkah kan Mizo unaute Tuikukin an rawn hnawtchhuak tawh a, chuvangin Serhmun hi Forest Tiger reserve avanga an chhuah mai hi chu ka phal lo a ni tih kha ka sawi duh a, kan Minister-in min lo enfiah sak sela ka duh a ni.

Tin, hmunphiah royalty lak chungchangah khan NLUP ah chuan kan la lo, ama'rawhchu NLUP chingtu ni lo beneficiary 4000 vel kha NLUP ah khan engemawzat an awm lain, khatah khan royalty kan han la a, NLUP chingtuten kan lak royalty kha kan la leh lawi si a, khang ho zawng zawng kha tu pa fiamthu angin emaw opposition lamin an duhsak lo deuh che u a ni an han ti a. Khulai Bagha vai ti mai ang, Choudhury te khuan min control ta vek mai a, hei chu enchian a, kan kut hnathawktuten an thawh man hlawk zawka an tel theihna turin ngaihtuahna kan hman hi a tul khawp mai a ni.

Tin, Forest service an indaih lo khawp mai a, lakdan hi kan ngaihtuah a tul khawpin ka hria a ni. Tin, bamboo day kha kan hmang thin a ni, ama'rawhchu Chapchar kut tuka bamboo day hman thin kha a bo ta daih mai a, Bamboo Day kha kan bamboo day leh thei lova, chuvangin hei hi enge a awmzia policy, mumal tak kan nei leh thei dawn em? Mizoramah mau tam tak kan nei a, heng hian kan carbondioxide zawng zawngte a lo ei tel avang hian ngaihtuahna kan hman a tul khawp mai a.

Pu Speaker, a tawp ber atan chuan demand No.33-naah hian, anni ho hian hmunphiah an ching a, Forest-in royalty an la leh bawk si a. Rubber hi Tripura State pawhin sum hnar berah an hmang tawh a ni. Chuvang chuan rubber hi hecter 1000 ah kan ching kan ti a, hei mai ni lovin a chin theihna area zawng zawngah hian kan chin chuan kan ram economy tithatu tur a nih avangin tan kan lak nasat zual a tul khawp mai a.

A tawp berah chuan Co-operation-ah hian kan ngaihthlak tak angin society hi thawh ho hi kan thiam tawk lo ni te pawhin kan hria a. Ama'rawhchu, kan Co-operative Society zawng zawng hian hma an sawnin ka hria a, chutihlai chuan kan Bank te hian mipui, Mizoram ta a ni tih hriain sorkar department hrang hrang pawh hian dawr tur pawh hian kan inzirtir a tan kan lak a tul khawpin ka hria a ni tih kha ka'n sawi tel duh a ni e, ka lawm e.

* Speech not corrected.

S P E A K E R : Duty ho kha dan khirh tak kan nei a ni tih kha hria ula, thusawitu leh chair inkarah vei tawh reng reng suh u. Pu T.Sangkunga.

Pu T.SANGKUNGA : Pu Speaker, ka lawm e. Vawiinah kan Minister chhuanvawr pahnihte demand kan sawi a, a nuam ka ti a. A hmasain Pu John Rotluangliana hi han fak fe ka tum a, ka hma ami te khan an fak nasa tawh lutuk a, nikumah ka lo fak vak tawh si a, Pu Zawma, opposition group l/-eader mitmei ka veng deuh va, chuvangin ka thiante sawi zawng zawng kha ka ring e. Amaherawhchu, chutih rual chuan thiante an lawm viau rual khan ka lawmna kha han chuai leh deuh a awm a ni. Ka bialah kudam pathum an sa tih kha a awm nual mai a, kei chu ka bialah pakhat kan sa che che mai a. Kawngah leh thil dang dangah khawthlang lam te, hmar lam te an ti tam tih lain kudam lehzelah pawh min hrek deuhin ka hria a, chuvangin helaiah hian ka fak em em rualin kan

Minister hian kudam sakah te pawh hian min lo hre ve sela. Tourist Lodge-a mi a duhsak tehlul nen lawmthu sawi pahin kha kha ngenna angin ka sawi leh duh a.

Tin, a dawt leh ah chuan demand no.42-na Transport-ah te hma kan sawn em em a, tax te a pung a. Tin, demand no.43-na Tourism ah te pawh Tourist Lodge-a an hmuh ang aia tam MR hlawha kal thin ang te an han privatise zung zung mai te hian hmasawna a rawn thlen leh ka ring a. Beiseina sang tak ka nei a, lawmthu ka rawn sawi duh bawka ni.

A dawt leh ah chuan kan Minister Pu Lalrinmawia, kei pheichu ka pu a nia, ani hi a felin a ho hian theihtawp kan chhuah, Youth Commission hmalakna min phurpui thin a, hma pawh kan sawn phah a ni.

Demand no.37-na Co-operation lamah pawh hian society hian hma an sawn thar khawpin ka hria a. Apex Bank hmasawn zia te, MULCO hmasawn zia te a hran hranah kan hmu a. A bik takin NLUP hnuai ran lampang hian hma an sawnin ka hria a. Milk Union, Co-operation hnuai in register ho te hian hma an sawn em em mai a, lawmawm ka ti a, an fakawm khawpin ka hria a. Apex Bank hmasawn dan pheichu turu tak a ni a. Tin kan veng lamah pawh society la phak chiah lovin society-a luh nan sial leh bawng vulh ho khian association an din a. Chung pawh chuan hma an han sawn khawp a, an inlungual em em mai a, kan hma lawkah pawh khian Sial Kut hman an tumin ka hria. Mahni khaw se pa rawn phurh theuh te kha an tum mekin ka hria a. Chutiang chuan society lamah hma kan sawn hle a ni tih ka sawi duh a.

Demand no.33-na, Soil & Water Conservation hi kan hlawkpui vak loh avang hian kan officer fel tak tak ten hma an la lo deuh emaw ni aw ka ti deuh. Kan bialah te pawh nikum ruah sur khan lui kama leilet a la chhe nasa em em a, Soil & Water Conservation Department hian hma la se a lawmawm khawpin ka ring.

Demand no.36-na Environment & Forest lam hi han sawi leh ila. Tunhma Zoram ngaw tha em em tuna heti taka a chereu hi a manganthlak khawpin ka hria a. Thick forest phei chu 1% kan nei tawh lo tih a ni a. Tin, thingzai tur a awm mumal tawh lo reng reng a, Burma lam thing thingzai sa te an rawn phur tawh a. Hetah hian Forest Department lam hian an inenchian a ngai awm mang e aw ka ti deuh a. Mifel rual All India Service officer te kan ngah a, a mimal phei chuan department dang zawng zawng aiin an tha awm mang e tih turin an fel a. Chutih lai chuan, Green India Mission tih te, VFDC tih atang tea pawisa engemaw zah awm han en hian rin aiin kan chhawr lo tlat mai a. Kan thian pakhat video nen a zinkual vak mai a, thla a la chiam mai a. Ngaw tha deuh a lak apiang kha YMA Park, YMA enkawl forest a ni an ti zel mai a ti a, YMA te nen pawh tunhma ang khan an thawhho dan hi tha leh deuh se a zia mai awm mang e ka ti a.

Kei pawh hman kumah Tuichangral lama ka zin tumin Biate leh Lungdar thla ah khian bawngtuthlawh ha tur ka zawng a. Thing ka lak tum apiang maiah khan YMA rawng hi an lo tat zel mai a, ka la ngam reng reng lo mai a. Khatiang inziak ringawt pawh kha kan zah a, YMA ta a nih hi chuan hum kan tum a, Forest ta a nih hian kih kan tum deuh tlat mai te pawh hi kan mindset te pawh hi thlak a ngai deuhin ka hria a. Anni pahnih hi han thawkho tha se kan ngaw te hian a thatpui ka ring khawp mai a. Chuvangin kan ram ngaw thala kawlh vul mai, fura hring satliah ringawt mai ang hi chu kan ram tan a tha tawh lovin ka hria a.

Tin, kan ramah hian kum 1959-ah Tlabunga teak phun kha Zorama teak phun hmasak ber a niin ka hria a, a tha em em mai a. Chumi hnu ah an phun chho zel a, khung Bairabi bul Suarhliap-ah te 1961-1968 ah an phun chho a, hmun tinah teak an han phun tak tak kha chuan Forest Department belhfakawm zia hi a langin ka hria a. Tuna kan teak tam ber, khawi atang emaw a furniture siam uar zual khua te pawh hi Forest hnathawh that vang a ni a. Chuvangin, a Department hi kal let leh ta se teak leh zuang ang chi hi phun uar se. Mipuiin teak kan insawithaih hi a diklo nasain ka hria a.

Mithiam tam tak hemi thu ah hian ka sawipui tawh a, teak hian lei a tichhe lo an ti tlat a ni. Changpat te hi a hnah tawih ei tum hian an tam em em mai a, changpat tamnaah lei a chhe thei lo reng reng a. Tin, teak an tihremnaah kan Forest Minister te khua ngei leh anmahni taah pawh hian changpatin lei a lo tihthat zia an hmu a. An tihremna hmuna lei thatzia te an sawi a. Kan insawithaih dan hi a dik hauh lova, Rangvamual thla ah pawh khuan kal ula, lei a ti min duh kan tih hi a dik lo tih in hmu ang. Kawngchhia awih tak tak ami pawh khu a min lo reng reng. Thingzai tur kan neih tha ber chu teak hi a ni a, chuvangin teak phun lama kal let leh hi a tha. Hrechiang uk lovin sava a fuh duhlo te kan ti a, eitur awm hek lo, chuvangin fuk vak ngaihna kha a awmlo reng reng a. Hengte pawh hi Mizo te hi hrechiang uk lova thusawi kan ni tih a lang. Teak hi kum sawmhnih lekah ei tling a ni. Ka thianpain kum sawmhnih vela teak a phun ka en a, a bul hi chuan gas bur hi a tiat deuhthaw tlat mai a ni. Thing dang Ngiau te han phun ila kum sawmliah pawh a lian vak thei tlat lo mai a. Chuvangin kan ram ngaw behchhan hian factory te, industry te han din hlek phei ila chuan teak hi kan thatpui tur a ni a.

Ka hma ami ten an sawi tawh ang khan ‘Supreme Court in a khap’ ti ringawt lovin Zoram atanga kan thar teak phuntute leh kan mistiri te kan entrepreneur ten an hman theih tur anga her rem phei chuan teak hi kan thatpui tur niin ka ring a. China rama kan kalin kawngkam sir tawn tawnah thing inang hliir maiin an ram a hring dup mai a, a chhan ka zawt nual a. Olympic an thlen dawn khan an ram hi a ro lutuk a, International Olympic Association-in ‘thleng tlak in ni dawn emaw ni le? In kawng a bal baw si a, ngaw a awm baw si lova,’ an ti a. Thing thangduh chi an zawng a, an phun ta vak mai a ni an ti a. Punjabi pa, ka kalpui chuan “Heng hi i hmu ngai na nge? Punjab-ah te, Gujarat-ah te chuan a tam. Kum riat a tlin vel hian kan han tan a, plyboard/ply wood siam nan kan kit a, rang takin a rawn chawr leh a, reiloteah kan kit leh mai a.” a ti a. Khatiang chi kha Zoram-ah te hian a hre ber ber in ni a, rua (mau) te pawh a hrelo zawk te hian sawi mawi vak te kan awm thin a. Forest te hian an hre ber mai a, an hotuten mau chanchin an han sawi te chu a ngaihnaawm a ni.

India ramah hian raw/rua chi hrang za sawmthum a awm a. Chuvangin, Burma mau kan tih mai geganteus ang chi Bethlehem Vengah pawh Forest-in an phun kha, a puitling chu lu tiat dawn dawn, kg 100 te ni thei , panga vel zawn tawk, a mal chauha awm ang chi te hi han phun ila a tha em em a. Naga mau kan tih ang chi, a tawi chi tha pui pui a awm a, phun darh chi a ni. East Tuipui bial-ah ngat pheh chuan rua hi a vang khawp a, Dungtlang in YMA hall an sak dawnin raw pakhat hi ₹ 90 ten an lei a ni. Khawbung ah R.O. in rua hi a kui tiak reng a, phun a phal mang tlat lo mai a. Nikum khan ‘ka motor-in ka rawn sem ang e, kawrte kamah tal hi chuan phun darh teh se, kum 4-ah ei a tling mai ang,’ ka ti a, a phal lova, a dah mai mai si a, kan Chief Minister hlui pheh chuan “kum khata mahni nute tiat thei,” tih kha a sawi dan a ni a. A in candidate pawh khan kan bial khawtinah khan raw factory din kha an tiam deuh vek a, khatiang a nih lai khan a rua kha a awm mang si lo a, kawrte kama phun te hian a tha duh ve em em si a, hengah pawh hian kan Forest hotuten hma min lo laksakin Latiforus rua (Naga rua)an tih ang chi te leh a nih loh pawhin kan raw pangngai ang chi te pawh hi a tha duh em em a, heng ang chi te hi rawn uar ve se tih ka sawi duh a.

Demand no.28 hnuaiah skill development hi ka sawi duh a. (Speaker : I hun i hmang zo a nia) tawi te tak tak a ni. National Skill Development-in a report 2015-ah khan South Korea-ah te chuan 96% skill an nei a, Germany-ah 75%, USA 52%, India ramah hian 4.6% vel lek kan skill labour zingah skill nei an nih avangin kan ram hian hma a sawn chak lo a, an manganpui a, India hian skill labour a mamawh a ni a ti a. Tuna Union Finance Minister speech-ah pheh kha chuan “Institute 1500 leh chumi atana hman tur cheng vaibelchhe singkhat leh sangsarih kumin budget-ah dah a ni ang” a ti a. Chuvangin, skill development hi a rawn uar nasa a, ministry te a rawn din ta a. Zoramah pawh central-in kan Chief Minister leh Minister te min encourage-na zarah crore 2.5 vel kan hmu a, Zoram-ah hian mi 400 skill training kan pe dawn a. Tin, nakum atan crore 8 vel project central-ah kan submit leh mek a, kan Chief Minister hian min recommend leh tawh a, kan hmuh pawh kan beisei a ni.

Skill neih loh pawina han sawi ila, cement in kan sa a, skill nei mistiri in ₹ 700 a hlawh laiin skill nei loa cement chawk chiam, khu rum rum, bal em em khan ₹ 300 a hawn tlat a ni. Chuvangin, skill kan neih loh chuan income a tam thei lo reng reng a. India rama 1500 institute an tihthar turah khan kan thalaite kan thawn thei teuhin ka ring a. Tuna kan hmuh ni loah pawh hian Mizoram hian N.E state 8 tana sanction hmu hovah khan kan thalaite kan thawn thei a ni. Jail tan rau rauah pawh Tanhril-a tang ai chuan Tihar Jail a tang chu an changkang ngei ngei. Under-ground ho pawh a tang hla kha chu Minister-ah an rawn haw nawk a ni. Chuvangin, hmun hla zawka kan thalaite thawn hi a tha tih hriat tur a ni. A tul angin advertisement pawh kan rawn chhuah zel ang.

A tawpna atan chuan Pu Speaker, an sawi ang khan IAS coaching centre India rama a tha bera ngaih kan nei a. ALS class lak te hi EATEN in VSAT hmangin a rawn thawn a ni. An lecture pek hi ka en thin a, a ngaihnaawm em em a ni. Tin, lehkhabu chi hrang 21 reading material hi a free-in an supply vek bawk.

ALS hi coaching centre tha, Pu Lalmalsawma, kan Chief Secretary pawh in a fapa a dahna a ni a. Tun laia India ram coaching centre-ah chuan kum tin IAS tichhuak tam ber a ni. Tuna S.C.S kan hawn a zirtirtu hi mithiam written-a tling, IAS interview mai tur te, IIM Delhi, Kanpur chhuakte an ni. Tuna kan naupangte pawh hi kan beisei sang hle. OAS coaching SSC-ah hian B.E ringawt pawh an awm nual tawh. Mithiam an tam, thalaite hi kan encourage a ngai. Staff Selection hnuai exam-na hi kum rei tak Zoram-ah a awm tawh, kan thalaite hi exam an tlem thin hle, hetiang hi a awm tih pawh an hre mang lo. Chuvangin exam dawn apiangin Youth Commission hian kan rawn advertise ang a, hengte hi a exam theih, chumi post, chumi scale rawn tih thin kan tum ang. Coaching kan hawn tawh chuan thalaite khawvel thar din tum sorkar kan ni bawk a, min lo phurpuiin min lo tuipui ula kan lawm hle ang.

Hun a awm tawh si lova, kan Minister pahnihte demand zawng zawng hi pass ngei turin ka rawn support a ni e.

Pu VANLALZAWMA : Pu Speaker, ka lawm e. Member zahawm tak takin thu an sawi a, ngaihnaawm tak tak leh bengvarthlak tak tak te a ni a. Kam hnih khat lek han sawi ve loh theih loh awmin ka hria a. Chumi hmain thil dang deuh, Kolasib bialtu zahawm tak khan Consultative Committee kha a rawn lam ri zawk a, Minister thenkhat hian an ko ngai lo emaw ni aw ka ti deuh a he Committee hi. Ka tel vena Committee hi an la ko fuh ve lo niin ka hria a, chu chu tu mawh nge ni a, Speaker lam atanga sawi tur nge ni? Committee pawimawh deuh kan din a, hei kum 2 lai a ni ve leh tawh a kan awmna hi. Ka tel vena Committee hi kohna ka hmu fuh lo nge ni a, ko lo tawp hi an la awm emaw ni aw ka ti a, chu chu Pu Speaker, i ngaihtuah turte pawh a nih tho ka ring a. Consultative Committee kha a pawimawh a, Minister hova an department chungchang sawihona a nih khan thuhma ang deuhin ka sawi hmasa lawk duh a.

Minister zahawm tak Pu Lalrinmawia Ralte chanvo-ah khan kan sawi tam lutuk loh deuh Labour & Employment Department kha han sawi hmasak ka duh a. Department te reuh te hi a ni reng mai a, ram changkang zawkah hi chuan he department hi an dah pawimawh viauin ka hria a. Keini ramah hian a lian hleithei lo hi a fuh lo, tu mawh nge ka hre lo a, hei aia changtlung zawka tihchhoh dan hi a awm lawm ni aw tih kha ka sawi hmasa duh a.

Labour welfare-ah chuan nichina kan ngaihthlak tawh ang khan construction worker ho tan vanduaiana an tawh te leh zirna lamah an fate an hlawhtlin te leh thil dang danga hamthatna lam hi kan lo nei chho tan a, a lawmawm khawp mai a. Hmanniah kan inhnuaia maia awm saw a nih avangin ka lut ve a, ka'n zawt vel a, labour tana hamthatna an lo neih saw a tha khawp mai a, nichina kan ngaihthlak tawh ang khan. A that tehlul nen hian heta in register tura inzirtir deuh hi chu a va la ngai em tih kha hmalakna atan rawtna ang deuhin ka sawi ni sela.

Tin, Employment lamah khan hna nei lo inziahlhna ang deuh ringawt hian kan hria a, hemi piaah deuh hi a kal theih em aw ka ti a. Kan Youth Commission

Chairman-in a sawi a, anni hna kha tunah hian a tha em em a, amaherawhchu, tuna an kalphungah erawh hi chuan tha ber chu thalai ho tikhawm a, ram pawna hnathawk tura thawn a ni a. A tha lutuk a, mahse kha lo deuh kha ngaihtuahnaah a hman tel theih em? He ram chhung ngeia thawk tura kan thalaite fuihna lam ang chi te pawh hi Youth Commission atangin nge, department atangin nge tih tur ka hrethiam lova, kan hotuten an hrethiam ang a tih a tha mang e ka'n ti a.

Hemi ka'n sawina chhan pakhat chu Kerala-ho khuan 'industry leh factory lian hi kan ramah a din ve theih loh, an ti. A chhan chu kan ram atang hian hnathawkin an chhuak nasa lutuk a, tih hi an politician ten an sawi ka hria a. Chungte pawh chu kan ngaihtuah tho a ngai a. Thil lian deuh han ti dawn ila kan labour force leh a hnathawktu ho pawn lama an thawh vek khan a tih theih loh mai dan kha a awm ve a. Tunah pawh hian mimal taka ka vei ve em em mai chu, Labour & Employment Department mai pawh ni lovin Transport Department te nena tih ho chi a ni em motor mechanic te hi? Motor kan lei thei angreng si a, kan uar angreng si a, kan kawngpui hi a tha vak lo nen. Mizoramah hian mechanic hna hi a tam em em a ni. Chutah erawh chuan hnamdang hi kan ruai nasa em em a. Kan thiam loh tur thil hi a awmin ka hre si lova. Mizo tlangvalte tan thiam loh tur a awm lovin ka hria. Workshop nei pakhat kan thianpain a sawi chu, 'Mizo chu a buaithlak em mai, chhungten an rawn sawipui a, lo thawk ve ang hmiang, kan ti a. Amaherawhchu, reilote an thawh chhung hian hriat loh hlanin a khalh hi an lo thiam a, tichuan taxi khalh tur hi an han hmu thuai mai a, an thiam tak tak hma siin taxi khalhin an chhuak zel a, buaithlak tak a ni,' a tih hi ka hria a. Ka hriatsual loh chuan Aizawl vela kan workshop-a thawktu tam ber hi Meitei unaute leh hnam dang an ni tlangpui a ni. Hetah pawh hian tan lak dan a awm em? Labour & Employment lam atang te, Youth Commission lam atang te khan tiin rawtna ang deuhin ka'n sawi chhuak duh a. Kan hmalak mekna a tha a, helamah hian hma la ta ila.

Ka sawi ang khan inkhel en nikhua te hian ka ngaihtuah thin a. Lammuala inkhel tur an awm chuan kan thalai rual saw an thu thup thei a. Bike changkang tak tak

leh motor nalh tak tak nen sawlaiah sawn traffic ti jam khawpin kan hung a. Mahse, kan lirthei chhe siam tur chuan hnam dang kan rawih zel a ngai. Engtingge kan inzirtir ang tih te pawh ngaihtuahnaah awm ta sela, Labour & Employment lamah te pawh kan Minister khan hawiin hma han la ta ila, a department lam te khatiang zirtirna lamah khan kal ta ila a that ka'n ring a.

Tin, Environment & Forest thilah khan an sawi tam tawh a. Thil pakhat ka'n sawi ve lawk duh chu, he House-ah pawh hian ka sawi zing tawh a, teak hralh hi kan buaipui khawp mai a. Supreme Court ruling a awm an ti a. Supreme Court ruling te chu han bawhchhiat rual a ni lo. Amaherawhchu, hel dan a awmin ka hria. He kan ram chhungah tal hi chuan zalen deuha che vel thei hian siam ila. Tichuan, Pu Speaker, kan Minister hian a naute kha lo hrih ta se, 'lo strict vak teh suh u,' tiin. Aizawl khawpuiah te hian tlawm deuhin lei thei tal ila kan teak chinte hi a hlu leh zual tur a ni a, pawn lama kan thawnchhuak thei lo a nih pawhin. Tin, semi process an tih ang khan tlawm deuha tiin hei kan hre vek a, furniture nalh deuh deuh te hi ram pawn atangin kan lalut a, Delhi, Kolkata, Gauhati lam atangte in. Hralh kan tum hian a buaithlakin ka hria a. Khuti lam an strict si a, chuti lo zawnga hralh theih dan chu ngaihtuah a, kan forest officer te pawh khan tlemin beng lo chhu ngawngin ti ta ila, chu chu kan ram economy siam tur pawh hian thil tih theih tak a ni ang em aw ka ti a. Supreme Court ruling awm kha va dai pelh vak a ngai lo. Khatiang khan hma lak theih niin ka'n ring a. Kha lamah khan tan la leh ta ila tih kha rawtna angin ka'n sawi leh duh a.

Sawi vek sen a ni lova, kan sawi tam tawh angreng a, ka'n sawi leh hram duh chu ration card chungchangah khan, a changtu Minister pawh khan a sawi tawh a, kan ngaithla a, public money hi engzatnge luang ral ang tih hi ka ngaihtuahnaah a awm a. Tin, he kan ration card tihfuh loh avanga kan senso tur kha han ngaihtuahin a tam fu awm mang e ka ti a. Tin, kan hrechhuak tlai lutuk deuh te pawhin ka hria a, chumiah chuan tunge va dem tur ber ka hre lova. Ration card holder ten kan kut a thlen hnu ah hian a lo lar ta hluai kha ni berin ka hria a. Khami hmaa kan hrechhuak lo kha chu

mawhphurtu chu an awm tur a ni. Khami hma khan hriatchhuah tur a nih ka'n ring deuh a. A chhan chu mipui min thlen hma khan a buaipuitu department te pawh an awm a, khangho kha ka'n zawt thin a, chungte chuan, 'kan Minister thahnemngai lutuk hian min nawr na lutuk deuh bawk a, kan hmanhmawh lutuk,' te pawh an ti a. Thahnemngaihna te pawh lo ni ta teh reng se, khati rum rum lutuk kha chu a dik thei lovin ka'n hria a.

Tin, engemaw changa kan han sawi hian computer te kan mawh lek lek a. Computer te pawh a that tehlul nen, mawh tur em maw ni aw tiin ka ngaihtuah a. Kawngpuiah motor a tlan a, a tlanna tur takah a tlan zel a, mahse tu emaw a va su thlu palh a, a motor mawh ang deuh kha a nih ka'n ring deuh a. A motor mawh a ni thei lo reng reng a ni, a driver mawh a ni tur a ni tih ang deuh hlek khan khawl a ni a, kawngpuiah a tlan alawm motor mawhchhiat tur a ni lo, a lo tlan let palh a, a sut pa mawh kha pek tum ang deuh kha a nih dan hi a awmin ka hria a. Computer chu mihringin a khawih a, a khawih thiam chuan a chhuak turte pawh kha a hre vekin ka ring. Tin, proof reading te pawh kha han nei zeuh se, pahnih pathum. Tuna manganthlak em ema ka hriat chu keini chhungkaw ration card ah pawh khan kan pian kum chu a dik vek, a ni leh thla kha a dik lo vek thung, a chanve tidik vek thei siin kha lam tidik lo lawi si computer te pawh kha engnge maw ni a awmzia ka ti a. Chu chu thahnemngaihna avangin ka'n sawilang a. Siamthat kan tum kan ti a. Amaherawhchu, mipui pawisa tam deuh a luang ral a ni tih kha kan hre tlang vek a. Chu chu han sawi rik leh lawk ka'n duh a.

Tin, Tourism chungchangah hian Tourism kan ngai pawimawh a, a tha em em a. Amaherawhchu, kan ngaihtuah tel atana ka'n duh mai mai chu Gangtok, Sikkim-a lut ang zat tourist hi lo lut se, Mizo mipuiten kan zo ang em tih pawh ngaihtuah tel a ngai. Chuvang chuan thahnem kan ngaih viau lai khan kan inpuahchah te pawh a ngai ve, khuti zat khuan min rawn pal se, kan zo em? Kan sakuana thleng hian kan ngaihtuah tel a ngaiin ka hria, khati zat lo lut tur han ngaihtuh khan. Amaherawhchu, chutih mek lai chuan lo kal ang ang te hi kan thil lo hlui te hi ka ngaihtuah thin a. Tum

khat chu Chaltlang Tourist Lodge-ah khian ka ti mai mai a, 'MIFCO thei tui in zuar em'? ka ti a. Zuar nang, engnge in neih le? Silchar lam siam vek kha an lo nei a. 'A nih lam ta se in pe mai thei ang em?' ka ti a, 'pe thei lo,' an ti a. Chungah te pawh chuan keimahni sorkarah hian thawh hona a awm tha lo mang e, MIFCO-in a sawrte ngei chu khitha khian lo hung tlar ve thap se, hnam dang pawhin an han hmuh a, Mizoram siam, in chakawm tak a ni dawn a. Champhai-ah te pawh a ni tho. Khati zawng khan keimahni sorkar hnuai department dangte nen an thawh ho dan ka ngaihtuah a.

Tin, purdah leh eng iloah te pawh Mizo puan hman tih thleng khan Tourism atang khan inzirtir ta ila tih kha Pu Speaker ka'n sawi a. Sawi tur tam tak a awm thei ang a, pawimawh tam tak kan hotuten an sawi tawh a, ka han sawi ang khan wawiih hun tha tak kan nei thei a, ka lawm a. Kan Minister zahawm tak te pawh khan khang rawtna kan han siam te pawh kha min ngaih pawimawh sak ngei ang tih ringin he demand hi ka'n thlawp a ni tih ka sawi duh a ni. Ka lawm e.

S P E A K E R : A lawmawm e. Tunah chuan Minister zahawm tak Pu John Rotluangliana kan sawm tawh ang a, sawihona kha han khai khawm se. Tin, sawifiah ngaite sawifiahin passrawn dil nghal tawh mai se, i lo sawm ang.

Pu JOHN ROTLUANGLIANA, MINISTER : Pu Speaker ka lawm e, A bik takin Supply kha sawi hmasa ila, member zahawm tak tak 16 laiin an sawi a, sawi te a inan deuh nual avang khan member zahawm tak tak te an hming hmerhin kan react vek theilo mai thei a, chu chu min lo hre thiam hmasa turin ka han duh a. Tin, kan member zahawm tak tak ten lawmthu sawina te an neih avangin an chungah pawh lawmthu ka sawi let ve nghal a.

A hmasa berin member zahawm tak Pu K.Sangthuama'n Food Security Act chungchangah selection committee a rawn sawi kha, hei hi uluk takin kan hotuten an ngaihtuah a. He food security hi a dawng tur leh a enjoy tur dik takin an enjoy tur a ni.

Party party awm lovin Mizo mipuite angkhatin kan hrut rual tur a ni kan tih avangin hemi selection committee-ah pawh hian khawtinah V/C te leh party hrang hrang aiawhte leh NGO aiawhte kan tel vek a ni. Chutiang chuan a lai thei ang ber tura ruahman a ni a.

A hmasa bera ka sawi duh chu Pu Speaker, food security hi kan sawi tawh thin ang khan hman mai theih, mahsela hman mai theih lohna chhan kan neih a awm a, chu chu hei hi a ni a. Food Security-in Zoram mipui min cover kha chu mi 706296 chauh kan ni a, mi nuai nga dawn lai kha cover ve loh kan ni. Ka sawi tawh thin a, Pu Speaker, India ram state dangah chuan Food security in a cover chin chiah kha ration an pe a ni. Mahse kan ramah chuan mimir zawng zawngin ration kan lak avangin hemi food security ringawt-ah hi chuan a tawp thei lova, chuvangin a hranpain kan hotupa, kan Chief Minister zahawm tak hoin rorel a ni a. Chutah chuan food security la ve lo tur pawh hi engtingge kan tih ang tih kha ngaihtuahnaah a awm a ni. Chumi rual rual chuan Food Security pawh hi thla khatah 5 kg chauh mi pakhatin dawn tur a ni si a, 8 kg pawh an kham mumal lo a ni si a, engtingge 5 kg chauh ni lovin 3 kg dang kan pek belh theih ang tih hi ngaihtuahnaah a awm bawka.

Tichuan, kan sorkar chak takin kan Chief Minister zahawm tak kaihhruaina hnuaiyah engpawhnise, sum leh pai harsa mah sela, Mizo mipuite ei leh bar kan ngaihtuahna kawngah hian theihtawp kan chhuah ang a, kan tawlh tur a ni lo an ti a. Tichuan kan sorkar thurolum angin kan food security-a beneficiary mi pakhatin 5 kg dawng tur pawh kha 3 kg hi tuna a rate pangaiin ₹15 in pek belh ni rawh se tih hi kan hotute thutlukna a lo ni ta a. Tichuan, food security beneficiaries ho khan ka sawi tawh thin ang khan rate pahnih an nei a, 5 kg @ ₹ 3/- hisapin, 3 kg @ ₹ 15/- hisapin 8kg kha thlakhatah ₹ 60/- in an la thei ta a ni.

Tichuan food security-in a cover ve loh ho zawng zawng kha thla tin 8 kg dawng turin kan sorkar hian thutlukna a siam leh bawka ni. Chu chu kg 1 ₹ 15 hisapin, chuan mi 706296 kha family-ah sem leh a ngai ta a, chutiang chuan kan sem a, chutiang

ang kan sem zawh vek hnuah chuan beneficiaries kha a thlangtu tur nichina ka sawi ang khan party hrang hrang aiawh te leh V/C ten an thlang ta a ni.

Tichuan Pu Speaker, tuna kan opposition leader-in a sawi lai ka rawn chhan hmasak duh lawk chu, kan Minister hian min nawr nasa lutuk a ni tih lai tak kha. Mizoram hi food security hmang hnuhnung ber te zing ami kan ni a. Delhi sorkar zawk khuan min rawn nawr nasa em em a, khuti lama kan Union Minister zahawm tak Pu Ram Vilash Paswana pawhin kan Chief Minister hnenah lehkha te a rawn thawn a. March thla chhung hian in hmang ngei ngei tur a ni min ti a, chuvang chuan March thla chhunga hmang ngei ngei turin hma kan la a, kan officer te nen pawh kan meeting reng a. Tichuan a ration card siam hmasak loh chuan khuti lam atangin buhfai allocation min pe thei si lova, chuvang chuan a ration card hi kan siam ta a. Vawiinah ration card engemaw han complaint leh diklo awm a awm tih kan hria a. Ka sawi tawh ang khan a pawh kan ti a ni.

Tin, nichinah khan member zahawm tak Pu R.L.Pianmawia te leh kan member zahawm tak Pu Beichhua ten kan bialah buhfai vawiin thlengin ration card la siam thar loh ten an la la ve lo an tih kha a pawh ka ti a. Ni 17 khan order kan chhuah tawh a, Pu Speaker, kan hnathawh ber chu Zoram mipui ten buhfai an ei tur ruahman sak hi a ni. Chuvangin kan pe dawn a ni tih hi vawiinah hian assurance ka pe duh bawh a ni, engti kawng pawhin kan pe ang tih kha Pu Speaker.

Hemi ration card chungchang hi chu hmannah khan ka sawi fiah tawh a, chuvang chuan thui tak sawifiah a ngai lova, ka han sawi theihah chuan a pawh kan ti, ration card hetiang dik lova a lo chhuak hi. Ni 1.1. ah kan piang vek, fiamthu bu a ni tih lampang kha chu Pu Speaker, ka sawi ve vek lo mai ang. Hei hi fiamthu bu a ni lova, kan tihdik loah pawh pawh kan ti a. Engpawhnise, tidik leh turin tunah order kan chhuah a, hma kan la nghal a, April thla chhung hian tihdik leh nghal vek kan tum nghe nghe a ni.

Tin, kan ration card pawh hi a diklo hi kan hre chhuak tlai lova, hei hi a chhuah veleh kan hre nghal zawk a ni. Kan ration card chhuah rual rual hian khuti laiah food security atan allocation kan dil nghal a, chuta tang chuan kan ration card diklo hi a lo lang a. Tin, tam tak diklo hi chu an kum te, an inehungkhatna (relationship) diklo te a ni a, kha kha chuan Pu Speaker, an buhfai dawn tur lam a nghawng chuang lo.

Tin, buhfai kha tun hma chuan thla khatah naupangin 4 Kg an dawng thin a, puitlingin 8 kg, hemi Food Security hnuaiiah hi chuan naupang leh puitling an danglam tawh lova, 8 kg vek an dawng a. Chuvang chuang hming diklo leh kum diklo avang khan emaw an relationship dik loh avang khan an buhfai dawn kha a danglam chuang lo a ni tih kha ka sawi duh a. Amaherawhchu engemaw vanga ration card lo chhuak ve lo tih chungchangah erawh kha chuan ka sawi tawh kha kan pe dawn a ni.

Tichuan, kan population leh kan buhfai lei hi a inmil tawh lo a ni tih laite kha a awm a. Hei hi tun hma te kha chuan FCI atanga kan buhfai dawn, thla tina kan normal allocation hi quintal 52,210 a ni a. Tichuan, kan indaih lohna hi quintal 80,000 a ni. Tichuan, quintal 80,000 hi FCI atangin a hranpain economic cost-in kan lei thin a. Chu chu kg-ah ₹31.34 in kan lei thin a ni. Tichuan, hetia kan han ngaihtuah hian food security hma khan quintal 80,000 kg-ah ₹31.34 a lei ziah mai hi a to lutuk e tiin, nichina kan thianten an sawi ang khan hmun hrang hrangah kan vak a, kan zawng a. Tichuan, local purchase a tih dan te a awm lawm ni kan ti a. Tender quotation te chhuahin hma kan han la ta a. Tichuan, local atangin kg-ah ₹25.75 in min supply theih thu kan dawng ta a. Chu chu State Advisory Purchase Board in min ruat sak ta a, tichuan, supplier-in min supply atang hian buhfai hi kan leina a lo tlawm ta a. A hma ai khan thla tin sorkar sum leh pai hi ₹ 4,47,20,000 hi kan save ziah ta zawkah kan inngai a. Tichuan kum khatah phei chuan ₹ 53,66,40,000 lai kan lo save thei ta a ni.

Tin, tun term kan sorkar hlim atang khan buhfai hi quintal-ah ₹ 930-a kan hralh thin kha, kg ah ₹ 9.30, mipuiaiah chuan kg-ah ₹ 9.50, pawisa 20 kha retailer margin a

ni. Kha kha kg-ah ₹ 14.50 ex-godown price kan ti a, pawisa 50 kha retailer margin a ni a, kg-ah ₹ 15.00 in kan hralh ta a. Tichuan, khatia a rate kan han tihsan khan quintal khatah ₹ 520.00 zel saving kan nei angah kan inngai a. Tichuan, thla khatah chuan ₹ 56,37,32,00 hi saving neiah kan inngai bawk a ni. Chutiang chuan food security kan luh hma pawh khan saving kan ti a.

Engpawhnise, khatia MLA te leh Ex MLA te, MP te, Ex MP te, MDC te leh Ex MDC te quota zawng zawng tihtawp a lo nih a, mipuiaah special permit kan lo tihtawp tak bawk si ah chuan surplus a lo awm ta e kan ti a. Chuvang chuan, buhfai hi thla nga chung kha chu quintal 80,000 hi lei chiah chiah tawh lovin, quintal 40,000 te kan lei a. A changin tlem a stock a awm loh deuhin quintal 60,000 te kan lei a. Hemi food security-a kan inleh vel dawnah hian a ngaiin quintal 80,000 in kan kal leh chauh a ni. Chutiang chuan kan hotuten ruahmanna an siam a.

Tin, tuna food security a kan luh hnu phei hi chuan end to end computerization kan ti a. Ration card digitization kan han tih chhohah hian ration card hi tun hma aiin a lo tlem tawh dawn a. Tichuan, buhfai kan requirement pawh hi metric ton 3,000 laiin a lo hniam tawh ang a. Tichuan, food security-ah nen, tuna kan ration card lo hniam ta, ration card hi 30,000 chuang zetin, a mihring zawngin sawi ta ila, tun hma chuan ration card-ah hian mi 17,50,000 an awm a, ration card hi 2,70,000 a awm a. Tuna kan digitized hnu ah hi chuan 12,30,000 mihring kan awm a, tichuan, ration card chu 2,45,000 a lo ni ang a. Buhfai kan requirement pawh metric ton 3,000 in a tlahniam ang a, thla tin ₹ 57,38,40,000 hi saving kan nei leh thei ang tiin kan hisap chho a ni.

Tin, tun hma ration card ah hian engtizia nge mihring an va lo tam em em ve in ti mai thei a. Kan pem thin a, sorkar hnathawkte pawh Champhai-ah an sawn a. Heti lama an ration card kha an delete chuang lova, khi lamah ration card thar an siam leh a. Lawngtlai lamah an phei leh a, khi lam ami delete chuang lovin tichuan sawti lamah an nei leh a, chutiang chuan kan kal kual nasa em em a. Chutiangin, civil mi pawh

an pem a, khi lama an ration card delete lovin, he lamah an tithar leh a, khatiang khan a lo pung ta ve bawk a ni. Hei hi a hranpaa thil diklo lutuk pawh a ni chuang lo a ni. Kha kha a bik takin Pu Speaker, Food & Civil Supplies chungchangah khan ka han sawi duh a ni a.

Tin, Legal Metrology hi member pakhat chauhin min sawipui a. Engpawhnise, thahnem a rawn ngai a, a lawmawm ka ti a. Legal Metrology hi nichina an sawi ang khan hnathawktu kan indaihlo em em a ni. Tunah hian hnathawh tur a tam ta telh telh mai si a. Petrol/ diesiel lo en ringawt a ni lo, ration card-a ration an sem dan ringawt pawh a ni lo, gas te a lo thleng a, a buk te a lo diklo a, bazar-a thil buk dik lo thlengin. Chutiang chuan kan indaih lo em em a. Amaherawhchu, chutih rual chuan tunah hian kan officer leh kan staff te, kan Inspector rual te pawh an tang em em a. Khawlaiah kawngpui dungah te, khawdaiah te an duty a, chutiang chuan hma an la ve a. Tunah hian district office pawh Saiha leh Lawngtlai-ah kan sa dawn a. Tichuan, Serchhip-ah kan inpeih tawh a. Mamit-ah district office kan sa dawn bawk a ni. Chutiang chuan Aizawl-ah pawh hian mahni pualin district office kan nei tawh a. Chutiang chuan Legal Metrology te hi tunah hian hma kan la nasa em em a ni tih kha ka sawi duh bawk a ni.

Tichuan Pu Speaker, Transport chungchangah pawh hian member 14 lain min sawipui a. Kan thusawite a inang tlangpui deuh hlawm a. A hmasa-in taxi intlan chhawk tih chungchang hi chu Transport lam chan a ni lova. Hei hi Traffic Management Committee a awm a, Home Minister hi Chairman a ni a, kei phei chu member pawh ka ni ve lo. Chuvangin kha kha chu (Pu K.SANGTHUAMA : Pu Speaker, tunhma kha chuan Chairman an awm thin a. A sang lamah in hawi ta zel mai a. A enkawltu tur ber kha Chairman a nih loh pawhin, Committee-ah te chuan telh ve awm tak a nia) Engpawhnise, kha kha chu kan tel loh thu kha ka sawi mai a ni e Pu Speaker.

Tichuan, Transport chungchangah hi chuan a hmasa berin member tam zawk ten an han sawi chu life time tax hi a ni a. State dangah chuan life time tax an ti lova, ene time tax an ti a, kan danah pawh khan 'One Time/Life Time Tax' tih a ni. Life time han tih hian a rei duh hmel bik riau mai a. Doctor te pawh hian damdawi min han chawh a, i dam chhung ei tawh tur a ni han tih hi chuan, eng chen nge kan dam dawn tih chu hre chiah lo mah ila, a rei hmel riau mai a. Chuvangin, hei hi a pawimawh a, 'one Time Tax' tih tur kha a ni a, a thlukah khan kan buai ta deuh emaw ni chu aw ka ti a. Engpawhnisela, hei hi kan session hmasa July 2015 thla khan hemi chungchanga tax lak dan tur hi kan sawi chhuak tawh nghe nghe a.

Nichina an rawn sawi ang khan hei hi Transport Development Council meeting vawi 35-nain a thutlukna a ni kan tih kha. Khatih lai kha kum 2013 October thla vel a ni a, meeting neih kha. Tah khan ka la Minister ve lova, ka tel ve lova. Party pakhat Press Release chhuah phei kha chuan ka tel ve ang khan ka hming te nen khan an rawn chhuah a. Khitilaiah ka ban dinglam phar va ang te khan an rawn chhuah a, kha kha chu an party a te em a han chhan tlakah ka ngai lo zawk a. Dawt rau rau ah pawh a over deuh hlekin ka hria. Ka la Minister lo hrim hrim khatih lai khan. Chuvangin hei hi Transport Department Council meeting-in an rawn pass ang khan State tinah kan dan kha siamthat a ngai a. Tichuan kan dan 'Mizoram Motor Vehicle Taxation Act, 1996' kha nikum July thla khan session hetilaiah Amendment siam turin kan rawn pulut ta a. Tichuan amendment siam a ni a. Chuta kan amendment siam chu Pu Speaker, notification pawh chhuah vek a, Gazette ah chhuah vek a nih hnu ah tun February ni 8 atang khan kan implement mai a ni. Hei hi lungrual taka House a min passed pui kha a ni a.

Tin, hemi Life Time Tax kan tih hi tunah hian state 17 in an la tawh a, a then phei chuan hemi kan lo tih hma daih 35 meeting in a lo resolve hma te pawh khan an lo la daih tawh zawk a ni. Engpawhnise, hei hi kan tidanglam leh dawn a, installment-in ni rawh se kan ti dawn a nih pawhin Pu Speaker, he House-ah bawh hian

kan lo let leh a ngai a ni. A nih loh chuan, session lai a nih loh chuan ordinance-in kan ti thei a. Chu chu kan hotuten thutlukna an la siam ang a, chutiang chuan kal a ngai a ni tih kha Pu Speaker, ka han sawi lang duh a ni.

Tin, replacement chungchang hi Pu Speaker, ka sawi duh a. replacement hi tun ah hi chuan tih tawh loh ni se kan ti a. A Danah a awm reng si a, engatinge an ti a. A Danah chuan a awm a ni. Mahse, a Dan khan STA in a remtih chuan, tih a ni a. STA in a remtih tak si lovah chuan replacement hi a rem ta lo a ni. A chhan chu replacement hi kan tih zel chuan engtik khawtikah mah he taxi permit hi a tawp thei dawn lova, a nung zel ang a, a thi thei lovang a, thangtharte tan taxi permit neihna chance hi a awm ve thei dawn lo reng reng. Chuvang zawk chuan Pu Speaker, hei hi tihtawp ni rawh se tih kha kan rel dan a ni a.

Tin, engemaw special bik, an eizawna ngawih ngawih, an accident-a, a chhe vek a, hengte hi chu phal sak ni sela, tih te kha a tirah kan han nei a. Tichuan kan han en a, khatianga accident road-off hmiah mai kal thei tawh lo, document engkim nei kha chu i tihsak ang hmiang kan han ti a. Pali panga kan han ti a, a hnu thlathum hnu ah chuan khatianga accident anga road-off a document fel thlaprawn nei kha mi 75 chuang an awm leh tawh a. Chuvang chuan kan closed ringawt mai a ni.

Tichuan kan member thenkhat te khan engtik hun laiin nge heti em em a taxi hi pek a lo nih tih kha anrawn sawi bawka. Tun kum 19 hnu Aizawl local taxi permit pekchhuah dan chu Pu Speaker, hetiang hi a ni e. Kum 1998-ah 177, kum 1999-ah 574, kum 2000-ah 1172, kum 2001-ah 304, kum 2002-ah 158, kum 2003-ah 726, kum 2004-ah 3621, kum 2005-ah 437, kum 2006-2007-ah nil, kum 2008 inthlan hmain 30. Tichuan 2009, 2010, 2011, 2012, 2013, 2014, 2015, 2016 vawiin thleng hian kan la pe leh lo. Nichinah khan kan member zahawm tak khan kum nga chhungin 1500 pek a ni a tih kha keini chuan a record kan nei ve lo. Pe thei dang an awm a nih chuan kan hre lo.

Pu LALRUATKIMA : Pu Chairman, taxi permit pek chhuah zat kha ka sawi a, hei Assembly Subject-I Committee-in taxi permit an pekchhuah zawng zawng kum nga chhungin 1051 ti khan he House zahawm takah khan ni 24.3.2005 khan lay a ni. tah hi chuan, Aizawl a sawi lova.

* Speech not corrected.

Pu JOHN ROTLUANGLIANA : Pu Speaker, Aizawl-ah chuan kan pe lova, hmundangah hi chuan kan la pe. Member dang khan min rawn zawt a kha kha chu, ka sawi hrim hrim ni sela, 1500 kan pek kha chu Aizawl khawpui pawn lamah a niang. Tuna ka han sawilan kha chu Aizawl khawpui chhung bikah a ni. Chutiang ang chuan Pu Speaker, taxi permit hi a hminga hetilaia kan thut ve hnu ah pawh kan worker te pawhin an duh ve. Amaherawhchu, kan ram khawpui kal zel dan tur ngaihtuah hian ‘A, pek rih loh ni rawh se’, tiin kan hotuten thutlukna an nei a, churang chuan kan pe lo a ni. A total kha 7199 pek tawh a ni a. Tunah hian Aizawl-ah hian taxi tlan mek hi 3525 a ni. Keini chuan, term hmasa pawhin kan pe lo va, tun term-ah pawh kan la pe lo. Pu Speaker, kha kha kan taxi permit awm dan chu a ni a.

Pu LALRUATKIMA : Pu Speaker, khawngaihin demand neitu khan min lo hrethiam lawk sela. Nichin khan Subject Committee – I report a ni a, ka sawi kha. 2009 leh 2010-ah hian Aizawl khawpui chhungah taxi 209 a service a, 2013-14-ah hian 3804 a service a ni tih kha ka sawi a. Chuti a nih chuan khang hunlai khan taxi hi Aizawl khawpui ah alo va tlem awm em em ve? Khawi atanga lokal nge, thingtlang atangin replacement an ti nge, engnge ni, kha kha sorkar mawh a ni dawn lawm ni ?

* Speech not corrected.

Pu JOHN ROTLUANGLIANA, MINISTER : Pu Speaker, MNF sorkar lai 2004 khan an pe tam em a ni, 3621 an pe a tin a ni. Chu chuan a rawn tipung a ni ang Pu Speaker. Engpawhnisela, taxi tam zia hi chu vawiina member-te hi inhrilh a ngai chuang lo ve, kan buaipui tlang a, chu chu a ni mai e.

Pu Speaker, kan member zahawm tak tak ten hetilaiah rawtna ang deuh te an rawn siam a, two wheeler taxi te pawh hi siam ni sela te an rawn ti a. Tin, Maxi Cab te pawh changkang deuh zawkin siam ni sela tih rawtna te pawh a rawn awm a. Khingte pawh khian kan ngaihtuahna a la tivar chho zel turah ngai ila. Chutiang chuan a tul angin Aizawl leh a chheh vel, Aizawl khawpui rawn lut chiah lo va Auto Rickshaw tih dan te pawh hi kan ngaihtuah a ngai ta a ni.

Hei, tunah chuan kan khawpui a tawt lutuk a, kan doctor duty te hospital hrang hrangah an kal a. Anmahni car pawhin an kal thei tawh lo. Aizawl Hospital a duty hi sawt ah dar 2-ah kal leh a ngai Greenwood-ah ti sela, tilaiah dar 1 thleng duty nei bawk si sela, a thlen hman tawh loh reng reng, two wheeler a ngai. Chuvang chuan, hengte hi kan sorkarin a la ngaihtuah chho zel turah ka ngai a.

Tin, Pu Chalrosanga, member zahawm takin ambulance te pawh hi Transport Department hian a nei thei lo em ni le, a ti a. Nei thei, Finance lamin pawisa min pek chuan tih kha a ni. Tunah hian bus te hi kan indaihlo em em a, bus hi a tlan thei hi chu 46 bawr vel chauh kan nei a. Tichuan, khawtin hian bus service tunah hian min dil a ni tawh a, Sumo chuan man te a lo san deuh tawh avangin. Chuvang chuan, Finance lamah pawh bus 6 leina kan dil a, min pe dawn emaw kan ti a, min pe turah ngai ila. A rawn lang chiah lo nang a, a la rawn lang turah ngai mai ang.

Tin, member thenkhat ten an sawi taxi fare chungchang hi STA in a siam a, a bu pawh kan nei vek a. Vawiina kan member te hi kan session chung ngeiin khami taxi fare bu kha pek vek che u kan tum ang a. A fare lo anga tlan report hi kan dawng si lo va. Chu chu action lak a buaithlakna em em a ni. Kan dawn ber chu khawiah emaw han kalkhawm nikhua, chhiatni thatni a min ngamlak deuh ten, 'taxi khuta tang khuan ka rawn hmang a, an ti to tak tak a ni, in control lo lutuk,' min ti ringawt a. Tunge a taxi chuanna pawh kha an hre leh tawh chuang lo va. Chuvang chuan, hengte pawh hi

complaint hi rawn thehltu thin sela, chutiang atang chuan action pawh a lak theih zel zawk a ni tih kha ka han sawi duh a ni.

Tin, Transport Department hi kan sawi ang khan hetiangah bus kan tlan tir rual rual hian tax kan lo collect ve nasa em em a. Tunah hian kan tax pek dan pawh hi online-in tax payment te pawh hi kan hotuten an siam ve tawh a. Tin, tuna special permit dil theih kan tih zawng zawng pawh hi online-in tax kan pek theih rual rual khan anni pawh khan online khan a dil ve theih zel tawh dawn a ni tih kha ka sawilang duh bawk a. Tichuan, nikum 2015 leh tun February, 2016 inkar ringawtah pawh hian revenue kan collect hi ₹ 16,88,04,000 (vaibelchhe 16 nuai 88 leh sangli) lai hi collect a ni ve a ni. Aizawl-ah hian DTO Office pakhat chiah hi kan intawm a, kan indaih lo lutuk a. Mihring an tam si a, motor registration thar hi nitin 20 chuang awm ang a ni a. Chuvang chuan, tunah hian DTO Office hawn belhna tur sorkarah kan dil a. Tichuan, DTO 'S' kan han ti phawt a, chumi cheina atan pawh chuan State sorkarin ₹ 17,30,000 (nuai 17 leh singthum) lai min pe a. Chutiang chuan DTO Office te pawh hi kan han then ang a, hei ai hian registration te pawh a awlsam zawk ang tih kha kan sawi kai duh bawk a ni.

Tin, rel chungchangah khan, nimirpiah lawkah khan kan ramah rel lian chi, buhfai phur kha a lo thleng a. Buhfai kha 26,000 qtls. a rawn phur nghal a. Truck in rawn phur dawn sela chuan truck pakhat hian 200 qtls. zel phur sela, truck 130 lai a ngai a ni. Chu chu vawiih hian rel lian chi broad gauge khan a rawn phur ta mai a, lawmawm kan ti em em a. Tin, facebook-ah khan mithenkhat ten rel lian chi a lo thleng a, buhfai kan va hnianghnar chuang lo ve, te an ti a, nimirpiah lawkah alo thleng ve bawk a ni Pu Speaker, kan hmanhmawh thin a. Fiamthuin ka ti a, Mizo hi chu kan rilru hi a hmanhmawh a. Hupthuk pawh khel ila, hawng thuai thuai rawh ti chi kha kan ni a. Chuvang chuan, kan hmanhmawh deuh hlek a ni, an unload fel ve deuh chauh a ni ang.

Tin, kan broad gauge te hi tukin lamah pawh zawhna leh chhanna huna kan hman ang khan kum 2019 March thla ah Sairang rawn thlen tir kan Railway hotu lam te

chuan an tum a. Kan sorkar thar leh hunah sorkar tir teah kan lo zuk lawm leh dawn a nih chu. Chutiang chuan, rel lamah pawh nasa takin hma kan sawn a. Engpawhnise, kan chhan vek dawn emaw, kan react dawn emaw chuan hun kan la tam lutuk ang e. Kha kha a tlangpui kan han sawi theih a ni a. Tin, Lunglei lam ah A/C Bus te pawh kan han tlan tir ve tan a. Hmundanga tlan tir te pawh hi kan chak a, sawi leh sawi hnu pawisa chu min pe sela chuan kan tlan tir zur zur thei a ni tih kha ka sawi duh a ni.

Tichuan, Pu Speaker, demand no.4-na Tourism-ah khan member 14 lai khan min rawn sawipui a, a lawmawm kan ti a. A hmasa lama rawn sawitu kan member zahawm tak Pu John Siamkunga khan hotel-a chawhmeh chhunlet tih hi a rawn sawi a. He thil hi ka ngaimawhna a rei tawh a, a zahthlak pawh ka ti a, kan chawhmeh han chhunluh leh ringawt mai hi. Tin, kan han ei a, kalkhawmte kha a bowl te te min pe lo khan mahni chhungkuuaa chaw ei ang mai khan trip khat kha chu tikhan min han dah ringawt mai chu a ni a. Amaherawhchu, hemi hotel industry hi Tourism Department-in kan enkawl a ni tlat lo mai a. Hengte hi kan mithiam zawk te hmangin zokhua-a hotel siam te, kawngsira hotel siam te pawh han inzirtir dawn ila, kan kut a ni lo va Industry ho kut a ni a, a pawl khawp mai a. Engpawhnise, kan Industry lam te khan lo enzui ta sela. Hei hi chu tihdanglam atan a tha khawp. Hnamdang hmuhah pawh a ni lo, keimahni Mizo leh Mizo hriselna atan hrim hrim pawh a tha in ka hria.

Tin, Tourist Lodge thlen man a sang an tih kha, keipawh a sang ka ti a. A rual deuh thlen man han pek hi chuan a to duh hle mai, kan lo ennawn leh dawn nia. Tin, Sunday-ah leh holiday velah te eitur a awm lo thin a, member zahawm tak Pu Hmingdailova khan a ri a, a dik khawp mai. Ni e, eitur hi Sunday-ah pawh hian awm sela, holiday-ah pawh awm sela tih hi kan duh khawp mai a. Tin, zanah te pheih hi chuan hemi Tourist Lodge, a bikin Aizawl leh a chhehvela kan neih te pheih hi chu kan staff te pawh kan hrilh tawh a, vai an thleng a nih chuan zanah chuan dar 9 velah chaw ei tur tih lai te kha inzirtir a ngai a. Kan system hi a inan loh lutuk avang hian an sual vang pawh ni lovin, mi dar 9pm a lo mu tawh thin te kha a thenin chaw an la ei chauh mai bawh si a.

Chuvang chuan, in adjust nasat a ngai a. Tourist pawh hi lo kal nasa dawn se keimahni kan in prepare nasat ve a ngai hle a ni. Chung chu kan awmdan a ni a.

Tin, Pu Robiaka kha a vui deuh a, “Anthurium Festival Reiek ami kha Lengpuiah min sawn sak” a ti a. Nia, khatihlai khan kawng kha a chhe deuh em mai a, sawlam kawng a tha si a, in enchhin ve teh ang kan ti a, a tih dan han thlak te pawh hi a nuam ve alawm maw le, khum hun dan han thlak te pawh hi a danglam ve a nia ka ti a, kan han ti mai a ni a. Engpawhnisela, an kawngte a that tawh chuan Pu Speaker, kuminah te chuan Reiek lamah te pawh kan hawi thla leh turah inngai ila a tha awm e.

Tin, kan sawi ang khan Pu K.S.Thanga khan faina chungchang te pawh kha a rawn sawi a, a dik khawp mai. Amaherawhchu, heng zawng zawng, faina lam pawh kha Tourism Department khan kan zuk tih vek a ni lova. Engpawhnisela, chinai te tat lo tur khan tu Department in nge zirtir ang aw? Engpawhnise, keini paw’n theih tawpin hma kan lo la ang e.

Kan member zahawm tak Pu K.Beichhua’n, “Tourist Lodge mai ni lo hian a piahlamah i kal ang u” a tih kha kan chak em em a ni. Tourist Lodge hi kan nei tam em em a chuvang chuan a ni, nichinah te pawh khan privatized te kha kan han sawi a. A thenah chuan, kan bial lamah chuan Pu Speaker, Tuipuibari ruamah chuan thlenna tur a awm lo reng reng, Tourist Lodge a awm ve lo thung. A tamna lamah a tam a, a tlemna lamah a tlem deuh hlek thung a, a lo insem ruallo deuh hlek thung a ni. Chuvang chuan, tunah hian privatization hi kan ti a, a thu ah hi chuan Zoram mipui leh mimir hriatthiam zawngin ‘privatization’ hi kan ti a, a nihna takah chuan privatization pawh a ni lo, hei hi management contract ang deuhin a neitu nihna kha chu sorkar-in la nei tho in, a management hi han privatized sela kan ti mai a ni. Tichuan, Tourist Lodge hi hmun hrang hrangah tunah pawh hian privatize tur kan la ngah mai, management contract han tih tur. Amaherawhchu, mi tam takin an duh lova, saw lama kan District Coucil lam te pawh saw, in district ami chu min chhawk teh u,’ tiin Lai, Mara te pawh kan va kal a,

Chakma unauten pakhat chu min chhawk thei dawn a ni awm e. A dang chu an duh lai kha a tha chauh an duh a, a thalo lai kha an duh bik bawk si lova. An District Headquarter ami te kha chu lak an duh a, mahse khalai chiah kha chu kan phal bik bawk si lova, a thalo lai, a chhehvel ami kha chu an la duh bawk si lova, chu chu kan buaina a ni.

Tin, kan han privatize dawn a, nichinah khan kan member zahawm tak Er. Lalrinawma khan “Upper ceiling in siam” a ti a, kha kha upper ceiling lam chiah pawh a ni lo. Kan Tourist Lodge-te kha a then te pheih chu chhe tawh lutuk, a tukverh chokut thlenga mawih vek tawh, a bang tla hiau huau, ceiling pheih chu rawn far deuh lek lek tawh bawk te kha a ni a then chu. Tichuan, kan han en a, heng hi hetih zat hian in luah duh lo em ni kan han ti mai zawk a ni. A upper ceiling lam kha ni lovin, pawisa hloh lam pawh a ni lo. Pawisa kha a lo lut lo reng reng a, ₹2000/- ten in luah duh em? kan va ti a, “Duh e” an ti a. Pahnih pheih chuan “Kan duh leh lo” an rawn ti a, an rawn decline leh a. A har angreng khawp mai.

Tin, thenkhatah chuan ‘hetih zat hi an lalut ve si a, engatinge hetih zat lek a in tih?’ tih te pawh kha awm thei a ni. Thla khatah ₹5,000/-te revenue ah an rawn chhung a. (Er. Lalrinawma : Pu Speaker, helaia impression of Interest, Instruction & Condition tih a no.5-na hi ka’n chhiar ang e, i phalna in ‘Price quoted below the based price and above the ceiling price as shall will be summarily be rejected’ a ti a ni. Chuvang chuan, a aia sang a chhang kha chu pek loh tur a ni tihna a nih chu). Hetiang zat hian luah duh in awm em kan?’ ti a, a aia sang a chhan awih loh kha a ni mai. A luah duhna man kha kan va siam a ni. Engpawhnisela Pu Speaker, thenkhat chuan ₹ 5,000/- te revenue-ah an rawn chhung a, mahse MR hlawhah ₹ 6,600/- te kan pe a, electric bill-ah ₹ 500/-, tui bill-ah thla tin ₹ 200/- chawina te a lo ni. Tin, khatilaiah khan a ceiling an siam an tih pawh khan, khatih zawnga an sawi duh a nih pawhin Pu Speaker, a dik ve thei tho e. Amaherawhchu, kan han tih nachhan pakhat chu, a hmasaa kan han tihah khan chhang sang over lutuk, tin, anmahni mimal kan han zirchian a in leh lo pawh neilo te kha an ni

a. Chung ho chuan an rawn ngam sang lutuk a, an misuse dawnin kan hria a, heng hi chu pek chi an ni lo kan ti a, kan ram chhung ani pawh nilo, tute emaw tih tira an hmingte rawn hawh tum te kha an ni a, kan inveng ve deuh hlek a ni. Tin, an chhanna a inan vek khan equal chance an nei zawk.

Tin, Pu Speaker, kan opposition leader zahawm tak khan Tourist Lodge parda ah te pawh hian Mizo hnam puan han tih te kha a ni a. Engpawhnise, a that rual rual hian kan MHIP lam te pawh hian thenkhatah chuan, tuten emaw dawhkan puana an han hman pawh kha an remtih chiah loh thu te kha an lo chhuah ve bawk si a, thu a tam, hla a tam, fin a har a ni. Chutiang chuan hma kan lo la ve a. Theih ang tawk tawkin kan ram leh hnam tan tiin hma kan lo la ve a.

Tunah pawh hian Tourism Department hnuaiah hian kan Chief Minister zahawm tak hmalaknain Integrated Development of New Eco-tourism under Swadesh Darshan North-East Circuit-ah khan ₹ 94.90 crore sanction kan hmu a, chutah chuan 1st installment ₹ 18.98 crore tunah hian min lo pe tawh a, tunah hian hna tan mai theihin a awm a. Thenzawl-ah Golf Course te kan siam dawn a. Tin, Wellness Spa tih te, Mizo Eco Lodge tih te, tin, Reiek-ah leh Zote-ah te, Thenzawl-ah khatiang khan hna tam tak thawh tur a awm a.

Tin, Tourist Lodge lo deuhah hmun dangah eng eng emaw tih tur siam ila kan han tih rualin, tourist-ho attract thei turin kan ti a. Amaherawhchu, chumi rual chuan, Pu Speaker, Central Sawrkar lam khuan an kal dan an thlak a, tun hi a hminga Minister ka nih ve hnu ah sanction kan hmuh awmchhun a ni. A hma ami kan sanction hmuh ve Products Infrastructure Development for Destinations and Circuits tih hnuaiah khan ₹4,199 lakhs min han pek ve ah khan, khang kha 1st installment a rawn chhuak a, central atangin min han de-linked leh vek a, tunah hian sum tam tak kan ba ringawt, pekna tur a awm miah chuang bawk si lova. Tichuan, kan Chief Minister zahawm takin kan Prime Minister zahawm tak hnenah lehkha te a zia a. Engpawhnise, beiseina nen kan lo thlir

a, tun budget chho ah hi chuan min pe thei turah kan ngai a. Chung chu kan hma lo lak dan te a ni a.

Tin, State Institute of Hotel Management kan ti a, Bung Bungalow-ah khuan, a building sak zawh vek tawh, a chhe mai ang tih hlauhawm tak a ni a. Engpawhnise, zirtirtute leh staff-te post tur hi sorkar-ah kan dil mek a, sorkarin min phalsak chuan heng hi hmalak mai theih, bul tan mai theih a ni tih kha ka han sawi duh bawk a ni.

Tin, Pu Speaker, vawiinah hian a tawp ber atana ka han sawi duh, ka sawi fo, mahse, hmun tam taka an pawm theih loh chu, Thal Favang Kut kan tih leh Anthurium Festival atan hian Central sorkarin pawisa min rawn pe thin a, Mizoram sorkar pawisa kan hmang ngai lo a ni tih kha he House kaltlang hian Zoram mipuite hriatah ka sawi duh a. Festival kan hman apiangin, WhatsApp ah nen, fakselna ah nen, State sorkarin pawisa kan nei lo ti chung siin hetiang Kut mai maiah an hmang an lo ti leh thin a. Khuti lamin hmang tura min tihna angin kan hmang ve mai zawk a ni.

Pu Speaker, ka Demand min sawisaktute zawng zawng chungah lawmthu ka sawi a. Tichuan, vawiinah hian ka demand no. 17-na Food, Civil Supplies & Consumer Affairs ₹ 2,47,47,64,000/-, demand no. 47-na Transport Department ₹ 53,31,74,000/-, demand no. 43-na Tourism Department ₹ 16,75,02,000/-, a vaiin ₹ 3,17,54,40,000/- te hi he House zahawm tak hian min pass sak turin ka sawm e.

SPEAKER : Kan Minister zahawm takin a Demand no. 17, 42 leh 43 te hi 2016-2017 chhunga a pawisa hman turin, a vaia belhkhawm ₹ 3,17,54,40,000/-, chu he House-in pass pui turin a rawn dil a, pass remti zawngin 'remti' ti ru le. (MEMBERS : Remti) Remti lo kan awm em? Tichuan, kan Minister zahawm tak demand no. 17, 42 leh 43 pawisa hman tura a vaia belhkhawm ₹ 3,17,54,40,000/- chu he House hian lungtual takin a pass a ni.

Pu JOHN ROTLUANGLIANA, MINISTER : Pu Speaker, ka lawm e.

SPEAKER : Tunah chuan Demand dangah kan kal ang a, Pu Lalrinmawia Ralte, Minister zahawm takin, member zahawmtakte thusawiah khan chhan tur a neih apiang rawn chhang se, sawifiah sela, pass rawn dil nghal mai rawh se. Amah i sawm ang.

Pu LALRINMAWIA RALTE, MINISTER : Pu Speaker, ka lawm e. Nimina kan ban hun kha a hla tawh lova, churang chuan, hun a rei lo thei ang bera lak ka tum anga. Department a hminga kan hotuten min enkawltir ve hi pali(4) lai a nih avang leh a sawitu an tam deuh avangin, a pawimawh zualte ka chhan kim loh chuan a mawi lovin ka hre bawk si a. Hmanhmawh deuh takin, Pu Speaker, sawi zar zar kan tum ang e.

A demand kan rem dan indawt ang khan a hmasa berin Labour & Employment Department chungchang hi kan sawi anga. Kan achievement te emaw, eng eng emaw han sawi vakna hun a awm lova, sawitur a tam khawp mai. He Department-ah hian hma thar lakna, Committee thar siam thutkhawm vawikhatna tih ang chi leh kan la hriat ngai loh thil tam tak a awm a. Member-ten an rawn sawi chhuak a, a hretute vek kan ni tho a, sawi nawn ngaiin ka hre lova. Hemi demand chungchangah hian member 12 laiin an sawi a, rawtna te an siam a; tin, fak ngaia an hriat fakna te, lawmthu sawina te an han nei bawk a, lawmawm kan ti a keini pawh. Member zahawm tak tak ten Labour & Employment Department hnathawh dan leh thil tih te ngun taka thlirin ngaihtuahna an lo seng thin hi lawmawm kan ti a. Helaiyah hian tlema a pawng zual i ti ang, mi hriat duh deuh tur awm chi te ka lawr mai loh chuan kan sawi vek seng dawn lova ka sawi tak ang khan, member zahawm tak tak ten min lo hriatthiam ka ngen a ni.

Member zahawm tak Pu K.Sangthuama'n a rawn sawi Employment Exchange kaltlang lova hna lak awm leh thin a awm niin sawi a ni a; tin, zawhna lamah kha chuan department-in in hriatpui lo tih kha an rawn sawi a ti a. Hemi chungchang hi Dr.K. Beichhua pawhin a rawn sawi a. Nia, Employment Exchange hi a pianzia zawkah

chuan Compulsory Notification of Vacancies Act, 1959 hnuaiiah khan vacancy reng reng sorkar department-in a hnawhkhah dawnin hriattirna a chhuah tur a ni tih a ni mai a. Chu chu khata employment hnuaruk a va hriattir mai piahlamah kha chuan a lak thu ah hian mak angreng deuh chu Supreme Court-ah pawh hei hi an challenge a, kan hneh tawh loh hnu a ni a. A lak thu ah hi chuan vacancy awm thu an notify tawh hnu ah hi chuan department ho zalenna hi a ni leh daih mai a ni. Tute nge an lak kha a va hriat tawh lova an notify phawt chuan, chutah chuan Compulsory Notification of Vacancies Act, 1959-in a phut hi chu an fulfill tawh a ni, an tihlawhtling tlat si a ni. Chuvangin, tunhma deuh a Mizoram kalphung anga Employment Exchange-a in register te chauh lak ni rawh se tih te hi a department hi chuan kan duh dan a ni.

A chhan chu ram leilung fa emaw, tawng mawi lo te pawh a ni palh thei a, chuti zawng lo pawhin duhsak tur tak te lak an nih theihna tur atan hian mi leh sa kan chianna tur leh record kan neih mumalna tur pawhin hei hi thil tul a ni a. Amaherawhchu, tunlai hian hei hi kan kalphung a ni chiaah lova, sorkarin khatiang te kha a tih ni te a lo inherchhuak a nih chuan a lawmawm khawp ang.

Member zahawm tak South Tuipui bialtu Pu John Siamkunga khan Singapore-ah tunhnaiah nula chesual te an awm a tih thu te sawi a ni a. Hetiang thu hi kan hre thin a Pu Speaker, kum hmasa lamah pawh he House-ah hian ka sawi tawhin ka hria a. Hetiang chi hi (hetiang chi han tih teh tawp chu) diklo taka kan nula tlangval te an rama amite aia hlawh hniama an lo chhawr ringawt pawh hi human trafficking form chi khat a ni. Chubakah mahni taksa zuar tur ang zawng tea an lo hmang te a nih ngat phei chuan hei hi khawvelin a huat em em a ni. Chutiang kan hlauh avang chuan Mizorama recruitment rawn ti a Fly by Night Operator an tih ang chi, ni hnih ni thum chung office rawn hawng a, interview te conduct a thalai rual khawiah emaw tir chhuak a, ko chhuak a, hna tha ka hria e ti thin te hi tam tak chu rintlak awm mahse a tam zawk mah hi (i ti ang) rintlak loh niin an lang tlat a. Chuvang chuan, sorkarin hei hi kan tih a tul a ni tiin

kan hotute remtihain department-ah hian Youth Commission te nen tan kan han la a ni a.

Youth Commission hmalakna tih leh LE & IT hmalakna tih hi a tak takah chuan sawi hran theih lutuk pawh a ni lo a ni, chuti khawpa thawhhona tha chuan kan han ti a. 2014 chho a hma kan han la kha kan chak chho viau a, SDIS (Skill Development Initiative Scheme) hnuaiah hian thalai rual a sangbi ngial hi kan intirchhuak hman a. Heng kan tirhchhuah zinga 1148 pheih chuan tunah pawh hian hna an thawk mek a ni India ram chhungah. Tichuan a dangte pawh hian Mizoram chhungah te ka thawk duh zawk an tih avangin kan hotel lian thenkhatah te leh hmun hrang hrangah hian an rawn thawk bawk a. Tin training chhuak peihlo, tlanbo ni a kan hriatte pawhin vairam khawpui lianah tho khuan hna tha deuh deuh khu an thawk a, kan record-ah an lang tawh chiah si lova khatiang kha chu, rin aiin a buaithlak a. Hemi an training-na senso reimbursement, Ministry atanga kan claim sak hi nikum July thla thleng khan cheng vaibelchhe thum leh nuai sawmhnih vel hi a ni hman a.

Amaherawhchu, tuna kan sorkar tharah khuan skill development hrim hrim hi member ten kan hriat zau nan ka sawi duh chu, a hma chuan Director General of Employment and Training (DGET) kan tih hi Labour & Employment Department /Ministry hnuaiah khuan a awm thin a. Chu chuan skill development kan tih tam tak pawh hi a kalpui a ni. Amaherawhchu kan hriat angin, 2014 atangin thar a lo piang a, Ministry of Skill Development and Entrepreneurship Ministry a lo awm takah khan khang zawng zawng kha Skill Development Ministry-ah hian an pem ta a ni. A hma khan Skill Development Ministry tho hian target min rawn tuk sak a, tun kum liam ta ah pawh khan sangthum min rawn tuk sak a, khum ngat ang kan ti a, sangthum chuang kan intuk a. Mahse 800 vel kan thalaite kan intir liam hman tihah lehkha an rawn tikal leh a, in target kha 53-ah tihtlak hniam a ni an ti ta mai a Pu Speaker. 800 chuang kan lo tir hman si a, re-imbursement kan claim sak thin tur kha a tawp dawnin a lang a, kan buai viau a ni. North-East State thenkhat chuan an state sum

atangin hei hi chu kan chingfel dawn an ti ngam a. Kan hotute hnenah kan harsatna hi Chiangkuang takin kan la thlen ang a. Keimahni lamah kan han bei ve tang tang a mahse a sawt lutuk lovin ka hria a.

Foreign a intirh han tih takah hi chuan Pu Speaker, Sorkar ang hi chuan kan hmalakna chinah hi chuan chutia va tih teh tawp hi Youth Commission-in emaw Directorate atangin a ni emaw kan nei lem lo a ni. A hminga hriatpui ve chang chang tih sawi tur awm chu Turkey-a kal te kha anni nikum ami kha. Chu pawh chu tha kan tih lem loh thu kan hrilh vek. SDIS hnuaiia training-a kan tirh lai te an sawm chhuah an ni nghe nghe a. Delhi, Metropolitan City area atanga an sawm chhuah te an ni. Muslim ram Turkey te angah Eastern Europe, Western Europe lampanga hna tha zawnga lut thla ve thin ho tho ramah a tha tak hi an zuk hmu lovang te ka ti a ni kei pawhin. Chutah chuan an zuk thawk, amaherawhchu harsatna an tawk a an taidarh nual a ni tih te pawh kan hria a. Amaherawhchu official-in Youth Commission emaw keinin emaw kan tirh an nih lem loh avangin a tawpkhawka sorkar an rawn au a nih erawh chuan kan sorkarin beng a chhu ngawng tlat ang kan tih lam a ni lo a, khatiang kha kan hriat theih chinah chuan kan nei lem lo a ni.

Tin, hemi chungchanghian Er. Lalrinawma'n a private enterprises te hnuaiia labour te chungchang thu enchian sak a phut kha kan lo enchiang ang a. Tin, a kalphung hrim hrimah minimum wages kan han fix hi dik tak chuan kha aia hniam khan chhawr tur tu tu tan emaw a thiang ta tihna chu a ni miah lo a ni. Kan zawm dial dial tur chu a ni ve a, amaherawhchu, Schedule of Employment kan tih (nimin lama kan sawi tak niin ka hria a) 5 awm zinga 3 ah chiah hian tunah hian kan rawn tilang a. Pahnih hi chu a employer-te nen inremna consensus a awm theih loh avangin rate hi fix a la ni lova. Eng hnuaiiah pawh, hospital hnuaiiah pawh khan lo ni ta ang se, entirnan, private hospital hnuaiia lo thawk kha employee zat kha 1000 an tling a nih phawt chuan Schedule

of Employment chi khatah a lut nghal thei a, chutah chuan employer-te nena inberermin an rate kha siamthat theih a ni a, tuna sorkara kan chhawpchhuah tur te ang bawk hian . Chuvangin kha lamah kha chuan mipuite pawn kan lo inzir ve a, keini lam pawhin zirtirna kan neih zel chu kan tih tur a ni, ngenna ang khan.

Member 12 laiin sawi mahsela Pu Speaker, kha kha a pawimawh zual tihna pawh ni chuang lovin a pawimawh vek a. A ngaithlatute atangin Pu Speaker, he House zahawm tak kaltlanga information kan pek nan te pawh a tha tiin khang te kha kan han thlang chhuak rih mai a ni a, kan inhriatthiam ka beisei.

Demand no.33-na Soil & Water Conservation Department-ah hian member 8 laiin an rawn sawi a. A sawitu reng rengin a pawimawhna thu an rawn sawi vek a. Soil & Water Conservation Department hi a department lam ten kan zir loh vang te pawh a ni ang a, thawktu ten kan thiam tawk thin loh vang te pawh a ni ang a. Engpawhnise, State dang tam taka ngaih pawimawh an hlawh dan ang (ngaih pawimawh loh kan hlawh ka tih lam vang a nilo a, ka vuithu lam a nilo a) em hi chuan Mizoram chuan kan la tlin ve chiah lova. Amaherawhchu, soil conservation leh water conservation tel lo hi chuan sustainable agriculture tih khawvelah an admit miah lo. Chuvang chuan helam hi chu uar lehzuala kan hotute pawhin min hriatthiam sak a, hma min lak chhoh sak zel hi kan beisei ve a keini pawhin.

RKVY hnuaiia kan sum hmuh hi kan innghahna a ni mai a. Member zahawm tak Pu K.S. Thanga, Parliamentary Secretary zahawm takin a sawi ang khan, project te siam a eng eng emaw han ti tur hian Pu Speaker, consultancy firm kan neih ang ang te pawh hi kei ngei pawhin ka ngen a. Engemawzat chu an lo kal a, 'kan siam dawn aw, in remti em' te pawh an rawn ti a, ti rawh u, a tul phawt chuan kan lo forward zel ang kan lo ti a. Mahse

hlawhtling ta tak tak hi tun thleng hian kan la nei thei lo a. Kan Chief Minister zahawm tak bialah hian, khimi Mat Valley-ah khian project chu a tlang dawn awm mang e aw tih te hi chu kan han nei a.

Tin, soil erosion, lei kalral zel tur venna tur project lian tak tak te pawh anrawn sawi a, tha kan ti a, kan lo tuipui zel a. Amaherawhchu, khulamah khuan funding agency zuk zawn dan hi sawi mai ai hian a lo har deuh hlek niin ka hria a. Delhi lama kan Residence Commissioner te leh kan O.S.D attached te pawh kan zuk pun a, amaherawhchu kan la sukaw hlei thei lova, vanneih ni kan la nei turah kan inggai a ni.

Member zahawm tak Pu K. Lalrinthanga sawi Dumthal, Phaisen ramami kha project cheng vaibelchhe 75 man lai kha siam a ni a, anti-erosion control works scheme, Brahmaputra Board hnuaiyah submit a ni a. Amaherawhchu, funding hmuh a nih mai loh avangin funding source zawn mek a ni.

Tin, rubber tree chungchang hi sawi thin a ni a, tunhnaiah pawh member zahawm tak takte ngei pawhin in sawi a, in bialte pawh an lo kal thin a. Heng hi chu kan sorkarin min enpuina hnuaiyah NABARD loan atang tein pek a ni a, pek zel tum pawh a ni a, tun hnaiah pawh NLUP hnuaiyah hmathar lakna tur ruahmanna siam mek a ni bawka ni. A tlangpui thuin member ten thahnem min ngaihpuina leh thurawn minrawn pekah khan lawmthu ka han sawi a ni.

Demand no. 36-na Environment & Forests Department chungchangah hian Pu Speaker, member sawitu kan thahnem deuh hlek a, member 14 laiin anrawn sawi lang a. Thawktute thawh dan chungchangah te pawh fakderna thu te kan han dawng a, a lawmawm hle a. Amaherawhchu, fak tlak tak taka hna thawk tur chuan tih tur kan la ngah zia department lam chuan kan inhria a. Pathianin min pek sa kan ngaw hi a lo tha em a, a tichhe zawng hian kan tal

nasa em em chung hian a la tha hle tho mai a. State of Forests Report 2014 leh tunhnaia Union Minister-in a released thar lehah pawh khan kan la sang chho ber ta zel a, India rama a tha zawnga ber kan nihna ve a ni a, kan han awihlo rum rum tak naa a dik a ni, hei hi chu keimahni phuah a ni reng reng lo. India ram pum thlirtuten mark an pek a ni a. Chuvangin, a va lawmawm em ti a kutben mai tur kha a ni a.

Sawi tak ang khan 14th Finance Commission Devolution-ah pawh sum kan hmuh tam phahna chhan 7.5% weightage nei a ni hei hi. Chuvang chuan, sum thawk chhuaktu a ni ve a kan ngaw hi, lehlamah chuan kan nei tha lo kan tih tak hi chu ngaw bit dik tak kan tih very dense forests kan tih kha a ni, a hnuaiia kal pawha chhunah pawh thim ruih khawp kha kan nei tlem a, 1% a tlinglo kan tih thin hi chu a ni. Amaherawhchu, green forests tih hrim hrim hi chu a data lo lang hi a dik a, nikum khan kan tlahniam thla hret nghe nghe a, mahse chuti chung pawh chuan kan la sang ber tho va, Andaman & Nicobar Island pawh khuan min tluklo a ni. Khu khu ngaw hlir deuhthaw emaw tih tur a ni a, mahse min tluk tlat lo a ni. Chuvangin, hemi ngaw tha tak mai kan neih hi keini pawh hian central sorkarah hian thil ngen nan tak hian hman kan tum ve a, engemaw chenah chuan Finance Commission Devolution-ah hian a hlawhtlinna chu kan hmu ve ta niin a lang a.

Tuna kan tihdanah hi chuan NGO-te nena kan thawhhona a tha a. Hrangturzo bialtu Vanlalawmpuii Chawngthu khan ‘NGO-te an thawhpui thiam a,’ a’n ti hluah tak na a, la thiam tawklo kan in ti a. NGO -te nena kan thawh dan hi thawkho han tih a NGO-te pawhin tha rawn thawh ta riaua inhriat hi a awm ve tho mai a, amaherawhchu hei hi a ni lo.

Hmanniah khawchhak hmun pakhata ka kalnaah chuan helaia sa in lo tirem a, introduce leh te in duh a ka ti a, YMA hrulaitu pakhat khan, ‘veng

hek lo che u minrawn ti a, ka ngawi duh miahlo a ni. Forests Department-a thawktu kawr uk hain a ven loh avanga i tichereu duh a nih chuan a dang pawh kap zel rawh, in tuilakna hnar te pawh hi kit zel rawh, tunge tuartu dik tak chu i hria ang, khatiang ngaihdan kha Mizoramah hian hmuh kan duh tawh lo. In ta a ni, i pi leh pute atanga i rochun a ni, heta Forest Department-a thawktu hmel a lo lan hma hian in thlahtute atanga in ta a ni. In ta hi kan venpui mai che u a ni tihah hian in chiang thin lo. Forests Department thawhpui leh an tana thiltha ti riaua inhria a, a man dil tlat hi NGO emaw, khawtlang emaw pawhin kan tihur pawh a ni lo. Mahse titha na na na leh bei nasa chu kan theih ang tawk tawkin kan chhang ve zel a, sum lamah te duhtawk kan neih loh vang erawh chuan hei hi duh angin kan chhang thei lo.

Tunah pawh Mizoram hmun tam takah YMA ten ngaw an ven a an riah thinna tur te, Nghafuan vengtute riahna tur in te nuai li nuai nga ten kan sak sak chho ve mek a. Kha kha kan chhan let vena a ni a, a tawk kan ti hauh lo a. Amaherawhchu, kan duh thal a department-in kan duh zawng zawng min pe tura kan beisei erawh chuan a dik bik lo a ni tih te pawh kha mipuite zirtirtu kan nih theuh pawh hi ngaiin ka hre ve a.

Member zahawm tak Pu K.Sangthuama'n nikum aia budget vaibelchhe 5 laia a tlahniam hi engti zia nge mawni le a tih kha, nikumah kha chuan 13th Finance Commission grant kan hmuh yearmark a kan hmuh thin kha nikuma kan budget-ah kha chuan cheng vaibelchhe 8 leh nuai 43 kha kan la chhawm chho ve vang a. Kuminah chuan kha kha a awm ta lova. 14th Finance Commission hian engmah kan sum hmuh atang hian kan department-in kan hmuh tak rih bawk si loh avangin hei hi tlahniam ta duai angin a lang deuh a, hniam lutuk pawh a ni chuang awm lo ve.

Tin, Serhmun khua location tih chungchang kha a awm a. Wild life nena an intawksir buaina nikhua khu a rei deuh hlek a. Kan hnung kar mai te pawh khan

khawchhung tuikhur bulah Sai a lo kal a, min rawn hrilh vat nghe nghe a. Keinin kan wildlife lam hotute pawh kan han hrilh a. Halpuah nen te lo um mai teh u te kan ti a. Kumin pawh hian an thlawhhma khu sanghal leh eng eng emaw zu va a nasat avangin an hlawhtlin tur ang khuan an hlawhtling phak lo nasa a. Thingtlang tlangram lo neih a thar thin dan vantlang pawh an phak lo a, an khawngaih thlak hle a ni.

Chhungkaw 200 zet an ni a, keimahni department zawk kan muan lutuk vang pawh a ni chuang lo a. District administration lam te pawh an lo inthlakin, duh angin hma kan la thei lova, relocation hi ala kal lo mai zawk a ni a. Hei hi anmahni ngen a ni a, a khua (head of family) chhungkaw lu ber hming sign hmang hian sorkarah ngenna vawi 3 an thelut tawh a ni. Chuvang chuan, kan ngaihthah thiang lova, kuminah tun kumhluiah khan tun kum chiah hi chance kan pe ang che u, hmalakna engmah in neih loh chuan in chhuah hi kan duh leh tawh ngai lo ang an ti a. Union Minister lo kal hnenah pawh khan an VCP te pawhin thu a rawn sawi a. Saw lampang Kawnpui leh Darngawn lam te pawh an rawn thawk phei a, Minister nena inkawmna te pawh an nei a. Tunah hian central sorkar lam Union Forest Ministry lamte nen pawh kan inbe pawp reng a.

Tin, final a house hold zat kha tun kan hnung karah khan Mamit DC, SDO Civil te leh Forest department-a kan officer ten a khuaah khan enumeration te an han bei a. A final state ah kan awm tawh a, a tih leh loh tih lam pawh hi member zahawm tak Pu Lalruatkima sawi ang khan han ti dawn pawh ni ila, a thleng thui lutuk tawh a. Zu kal pawh hian enge kan thlen tawh an ti reng mai bawk a. Thinlung chanvein a khuaah khuan an awm tawh a, hrehawm an ti a. Chhuah vat vat hi kan duh a ni an ti ve a ni. Hei hi chu kan lo hriat tlan a tha awm e.

Amaherawhchu, house hold enumeration-ah khuan engemaw ni lungawi lohna nei hi an awm ngei dawnin ka hria a. Ralkhata awm tum tlat te pawh an awm a ni awm e. Chhungkaw khata awm chung pawha chhungkaw 3 a inlan tir tum tih ang chi te,

anmahni pawhin an sawi ve neuh neuh a. Engpawhnise, khang avang khan ni lo loa lo sawi hnawna te pawh kan lo dawngsawng palh mai thei. Ma'rawhchu, khawtlang lungualnaa tih a ni tih kha member zahawm tak ten min hriat chian sak ka duh a ni.

Saw mill chungchangah hian nikum lam pawh khan kan sawi tawh a, saw mill hi neih a, chumi hnuaiah chuan saw mill lian te a lo awm takah chuan, chumi hnuaiah chuan secondary wood based industry kan tih zawng zawng, furniture industry ang chi hian registration te an ti thei anga tih a ni a. Amaherawhchu, hemi kan buaipui chhung hi rin aiin a kalmuang a. Central-ah khuta empower committee-in a approve tur a ni a. Quarry te anrawn nei ve a, duhte an nei a, information te kan han pek belh zel a. Chumi angah chuan kan lo pek thlak tawh hi Sairang, Bairabi, Serchhip, Hmunhmeltha leh Pukpui government notified industrial estates ho kha a document kimchangin kan pe thla tawh a. Industrial estate a declare tur a ni tlat si a, saw mill awmna kha fel tawh a ni tur a ni si a.

Tin, industrial growth centre Luangmual leh industrial estate Mamit atana an lo plan leh industrial estate Chengkawl road, College veng Lawngtlai leh Kawlchaw ami te hi notified turin, notification chhuah turin hma lak mek bawka ni. Heng hmun kuaah hian saw mill 15 awm tura ruahman a ni a. Mahse, hetih lai hian Supreme court order a awm a, nikum October ni 5-ah khan. Pu Speaker, chutah chuan awlsawm takin Saw Mill lam hi licence hi pek ni rawh se an ti a, state te pawh comment an dil a chungte pawh chu keini pawhin chhanna te pawh kan thawn ve thei tawh a ni. Member-ten kan duh ang teh puat a ni lo a nih pawhin rei lutuk lovah kan ti thei tawh awm mang e kan han ti a ni.

Tin, teak hrim hrim hralh hi ram chhungah chuan Pu Speaker, kan ram chhungah hi chuan kan tikhirh lo khawp mai, amaerawhchu a diltu tam tak hian tu te nge chu sawi lo ila, min dil a, Mizoram-ah na na chuan seng hawi rawh se kan ti a, mahse a hmuna en chian hian forest plantation dik tak a lo ni

palh leh thin a, kan chesual teuh thin khawp mai. Chutiang thuah chuan fimkhur a ngai kan ti a ni. Tin, permit hrim hrim hi ram chhunga phurh sawn khapna hi a awm lem lo a ni. Amaherawhchu zalen lutuka kan tih dur dur a hlauhawm ve tho tih te kha min lo hriat sak ka duh a ni.

Tin, working plan siam chungchangah hian approved tawh hi division 4 kan nei a ni. Kawrthah leh N.Vanlaiphai leh Lunglei leh Lawngtlai DCS hnuai ah Chakma Autonomous District Council area chin, hei hi working plan fel tawh a ni. Tin, Aizawl, Kolasib, Thenzawl, Mamit leh Tlabung hi buaipui mek a ni a, tin, a key hran deuhin Champhai leh Mara pawh buaipui mek a ni. Darlawn leh LEDC area pawh hi buaipui mek a ni. Mimal ram nei an lo tam avangin a buai deuh hlek a, approval panga kan han pek te pawh hi heng avang hian a muang ni berin kan hria a ni.

Tin, silai-ah khan Airgun chungchang kha ngaimawh an awm a, Arms Act hnuai hian Air-gun hi khap a ni lova, Air-gun hi a changkang em em tawh mai a, nuai chuang man te chu tha tak mai a ni a. Kan Sports Minister hian a hre Chiang ang a, kah pawh kap thiam deuh mai a ni a. Mahse khapna dan kan nei lo a ni, DC lamah hian khapna lamah hma han la teh u kan ti a, hei hi a sawt lo a nih chuan kan sorkar-ah hian thu thlen te pawh kan duh a ni. Ramsa leh rannung tihlumna chi reng reng a kum a kum ken chhuah theih miah lohna order te siam chhuak a, state sorkar kan inphut thei a, kan innawr chhuak thei a nih chuan kar lovah nungchate pawh an pung leh ang tih kan beisei a ni. Kimchang lo deuhin kha kha ka react theih dan ni mai sela.

Demand no.37-ah hian member zahawm tak tak pariatin an rawn sawi lang a, a lawmawm lam zel a ni a. Pu Hmingdailova Khiangte-in awareness a ngaihzia te a rawn sawi a; tin, member te pawhin awareness a tulzia an rawn sawi vek a ni. Er.Lalrinawma'n a sawi Co-operative sector kan ngaihthah chhung

hi chuan hmasawna tak tak hi kan nei thei dawn em ni tih a zawhna kha keini Co-operation chhannaah chuan kan thei lovang tih a ni.

India ram Prime Minister hmasa ber kha “Father of Co-operative movement” tih a ni. Ani leh mithiam tam takin an sawi chu, Mizopa hraitthiam zawngin development hi belpui ni ta se development kan neih a kan ei tak tak theihna tur chuan Mizopa tapchhakah chuan lungthu pathum a awm thin a ni. Development mipuiin kan chan tak tak theihna tur chuan sector pathum a awm a ni, public sector, private sector leh co-operative sector. Public sector kan tih chu sorkar thachakna ringa kan khawih theih te a ni, private sector chu mihaus a leh thil tithei bik ten company an din ang chi hi a ni a, co-operative chu kut hnathawktu ten an sawr khawm hi a ni a. Mizote hi co-operative chungchangah hian kan harh chhuak lo riau an ti thin a, kan harh chhuak, mahse kan harh chhuah dan hi a khingbai a ni. Kan harhchhuah chianna ber kohhran hi co-operative principle a ni, pastor te pawh hi police lalte angin han hlauh bur tur chu an ni lem lo na a, mahse kan zah viau a ni. Kohhran Upa te pawh chutiang chu a ni. Thawhlawm te pawh an han intuk a, dan ang teh bur a, IPC Section chuti zat tih lam ni lo mahse kan that tlanna tur a ni tih kan hria a, khum kan tum ngar ngar mai a ni Pu Speaker.

Co-operative principle diktakin kohhran hian hna a thawh avangin a chak zia chu Mizoram-ah hian, Kohhran hi a chak lutuk a, a hnuai a Thalai Wing te pawh a chak lutuk a, chumi avang chuan Mizoram-ah hian hei kan senior, kan hotupa Pu P.C.Zoram Sangliana nen kan sawi thin a, National Vice President a nih lai te pawh khan. Mizoramah chuan kohhran a chak lutuk avangin Young Mens kristian Association Movement te hi a chak thei miah lo a ni. Khawvel Christian organisation lian ber a ni chung hian. chutiang khawp chuan Kohhranah kan chiang a, tin, kan vantlang nunah YMA ah hian kan chiang leh em em a ni; Co-operative principle a ni tih lam kan chhut ngai lo. Kan khawsak dawm kang tur zawnga co-operative society kan han din chiah chu

kan veikhawr tlat zel a, kan kal thiam tlat lo a. Member zahawm tak Pu R.Vanlalvena'n a sawi ang khan, mangan thlak deuh ang hian a awm tlat a, awareness campaign hi kan mamawh nasa a ni tih hi member zahawm tak ten an rawn sawi ang khan keini pawh kan inhmuh dan a ni.

Tin, ICDP chungchangah khan LADC area chungah engatinge siam a nih ve loh tih ang chi te sawi a awm a. Zawhna lamah te pawh kan dawng a, Autonomous District Council lam saw tunah hian kan la inpawh pawlh deuh hlek a, member zahawm tak Dr.K.Beichhua rawn sawi ARCS office sawn tih te nen pawh khan a inlaichin nghal ang a. A thenah chuan kan office hmun hma leh ram te pawh kan chan zo lek lek tawh a, state sorkar lam va indah ah hi chuan. Tin, anmahni lam kha man power engkim kha a set up kha a fel ve deuh thlup tawh bawk si a. Tin, Co-operation lam hawi zawnga an grant-in-aid hmuh tur ang kha state sorkarin anmahni Council Co-operation Department-ah khan a hranin a pe tawh bawk si a, tun hma 1990 vela ICDP project-ah te kha chuan an tel vek a. Tunah erawh chuan Autonomous District Council lam hi kan telh ta lo a. Member zahawm tak Dr.K.Beichhua'n a sawi ang khan Saiha a kan ARCS office te pawh tunah hian kan Chief Minister opinion te pawh kan la tawh a, engtin nge ni ang, kan awm dan hi a khingbai deuh riau tawh mai a kan inti a, han chhuahsan hlawl lah chu a ni chiah lo deuh bawk si a. Chutiang chuan kan hotu ten, senior officer ten uluk takin meeting in lo thlir se ti a direction min pek angin kan thlir mek a ni.

Hmasawna tam tak kan hmu a, MIZOFED-ah te, Apex Bank-ah te, Zofishfed-ah te, state level co-operative lian 10 kan neihah hian hmasawna ropui tak kan hmu vek a. ICDP hnuaiah hian cheng vaibelchhe 44 leh nuai 94 chuang kum li chhungin kan hmu dawn a. Hmasawna ropui tak kan thlen theih kan inbeisei a, state sorkar chak tak leh min duhsaktu chungah lawmthu kan han sawi nghal bawk a ni.

Tichuan, Pu Speaker, heng ka demand no. -

28. Labour & Employment Department	₹ 25,88,27,000.00
33. Soil & Conservation Department	₹ 6,48,59,000.00

36. Environment & Forest Department	₹ 73,14,55,000.00
37. Co-operation Department	₹ 25,25,04,000.00

A vaiin ₹ 1,40,76,45,000/-te hi he House zahawm tak hian min pass sak turin ka ngen a ni. Ka lawm e.

* Speech not corrected

S P E A K E R : Awle, tunah khan kan Minister zahawm takin 2016-2017 chhunga hman tur Demand no. 28, 33,36 leh 37-na hnuaia pawisa hman tur a vaia belh khawm ₹ 1,40,76,45,000/- he House-in pass pui a rawn dil a, pass remti zawngin 'remti' ti ru le. (MEMBERS : Remti) Remti lo kan awm em? Remti lo kan awm lo va. Tichuan demand no. 28, 33, 36 leh 37 pawisa hman tur a vaia ₹ 1,40,76,45,000/- chu he House hian lungrual takin a pass a ni.

Pu LALRINMAWIA RALTE, MINISTER : Pu Speaker, ka lawm e.

S P E A K E R : Hei Pathian zarah vawiina kan tih tur tluang takin kan ti leh thei a, chumi piah lama min tilawm em emtu chu, tlai tak dar 5:30 P.M. kan thleng a ni a, chuti chung pawhin he House hi a khat a ni. A lawmawm em em, ka vei lam te phei hi chu an kim vek a ni a, hei hian ram leh hnam a chawimawi bakah kan Kristian-na hi a chawimawi tel a ni tih kha hria ila. Hetiang thil taimakna hi rinawmna nen a kal kawp a ni tih kha hria ila, chin zel tum ila a tha ang e.

Tichuan vawiina kan tih tur chu kan tizo ta a, kan chawl rih ang a, naktuk tahrik ni 24.3.2015 (Ningani) zing dar 10:30-a kal khawm leh turin i haw rih ang u. The sitting is adjourned.

Sitting adjourned at 5:32 P.M.